



嚴氏明理論



江蘇古籍出版社





四庫未收書提要

擘經室外集卷一

嚴氏明理論三卷後集一卷提要

宋嚴器之撰取寒證分為五十門詳為之論又取仲
景一百二十方之中擇其世人所常用者二十方各
係之以論別為後集一卷其說類多精詣可為讀仲
景書者之津筏讀書志讀書附志書錄解題文獻通
考皆無其書諸家著錄惟見於讀書敏求記案錢曾
云此書尾斷爛序作於開禧改元稱成公當乙亥丙
子歲其年九十餘則必生於嘉祐治平之間成公不
知誰何蓋北宋時人也曾之言如此今此書首尾完

好無斷爛處而失去開禧中之序蓋曾所藏本非宋
刻也案宋史藝文志醫家類有嚴器之傷寒明理論
四卷書名卷數若合符節此本從宋版影鈔雖不著
撰人姓名其為器之之書當無可疑成公與器之之
名厥義相配殆卽器之之表德也



嚴氏明理論目錄

卷上

發熱

惡寒

惡風

寒熱

潮熱

自汗

盜汗

頭汗

手足汗

無汗

頭痛

項強

頭眩

脅滿

心下滿

腹滿

少腹滿

煩熱

卷中

虛煩

躁煩

懊懷

舌上白胎

衄

噦

咳

喘

嘔吐

悸

渴

振

戰慄

四逆

厥

鄭聲

讖語

短氣

卷下

搖頭

瘕癥

不仁

直視

鬱冒

動氣

自利

筋惕肉瞤

熱入血室

發黃

發狂

霍亂

畜血

勞復

嚴氏明理論目錄

嚴氏明理論卷上

發熱第一

傷寒發熱何以明之發熱者謂怫怫然發於皮膚之間煊煊然散而成熱者是也與其潮熱若同而異與其煩躁相類而非煩躁者在內者也潮熱之熱有時而熱不失其時寒熱之熱寒已而熱相繼而發至於發熱則無時而發也有謂翕翕發熱者有謂蒸蒸發熱者此則輕重不同表裏之區別爾所謂翕翕發熱者謂若合羽所覆明其熱在外也故與桂枝湯發汗以散之所

謂蒸蒸發熱者謂若薰蒸之蒸明其熱在內也
故與調胃承氣湯攻下以滌之其發熱屬表者
即風寒客於皮膚陽氣怫鬱所致也其發熱屬
裏者即陽氣下陷入陰中所致觀其熱所從來
而汗下之證明其辨焉若熱先自皮膚而發者
知邪氣之在外也若熱先自裏生而發達於表
者知邪氣之在裏也舉斯二者為邪氣在表在
裏而發熱也惟其在表在裏俱有發熱故邪在
半表半裏者亦有發熱之證何者以表證未罷
邪氣傳裏裏未作實是為半表半裏其發熱者

或始自皮膚而漸傳裏熱或始自內而熱外連於表蓋邪氣在表發熱者則表熱裏不熱也邪氣在裏發熱者則裏熱甚而達於表也其在半表半裏發熱者則表裏俱發熱而但熱入輕於純在表者也經雖云發熱惡寒者發於陽也無熱惡寒者發於陰也然少陰病始得之亦有反發熱者蓋亦屬其表也特與麻黃細辛附子湯發汗者是也發熱為傷寒之常也一或陰陽俱虛與其下利新汗後又皆惡其發熱也經云脉陰陽俱虛熱不止者死下利發熱亦死內經云

汗出輒復熱而脉躁疾不為汗衰狂言不能食此名陰陽交交者死也斯亦發熱也詎可與常常發熱一槩而論耶醫者更當明辨之

惡寒第二

傷寒惡寒何以明之惡寒者風寒客於榮衛之中也惟其風寒客於榮衛則洒淅然惡寒也惟其榮衛之受風寒則嗇嗇然不欲舒也其惡寒者非寒熱之寒也又非惡風也且惡風者見風至則惡矣得以居密室之內幃帳之中則坦然自舒也至於惡寒者則不待風而寒雖身大熱

萬天月聖帝

也在陽者可發汗在陰者可溫裏惡寒雖悉屬表而在表者亦有虛實之別若汗出而惡寒者則為表虛無汗而惡寒者則為表實表虛可解肌表實可發汗又有止稱背惡寒者背者膏中之府諸陽受氣於膏中而輸行於背內經曰人身之陰陽者背為陽腹為陰陽氣不足陰寒氣盛則背為之惡寒若風寒在表而惡寒者則一身盡寒矣但背惡寒者陰寒氣盛可知也經曰所謂少陰病一二日口中和而背惡寒者當灸之處以附子湯者是矣又或乘陰氣不足陽氣

內陷入陰中表陽新虛有背微惡寒者經所謂傷寒無大熱口躁渴心煩背微惡寒者白虎加人參湯主之者是也二者一為陰寒氣盛一為陽氣內陷又何以明之也且陰寒為病則不能消耗津液故於少陰病則曰口中和及陽氣內陷則熱燥津液為乾故於太陽病則曰口燥舌乾而渴也二者均是背惡寒要辨陰陽寒熱不同者亦於口中潤燥可知矣

惡風第三

傷寒惡風何以明之黃帝鍼經曰衛氣者所以

溫分肉充皮膚肥腠理司開闔者也風邪中於衛也則必惡風何者以風則傷衛寒則傷榮為風邪所中於分肉不溫而熱矣皮毛不充而緩矣腠理失其肥即疎而不密開闔失其司則泄而不固是以惡風也是惡風惡寒二者均為表證其惡風則比之惡寒而輕也惡寒者嗇嗇然增寒也雖不當風而自然寒矣惡風者謂常居密室之中幃帳之內則舒緩而無所畏也一或用扇一或當風淅淅然而惡者此為惡風者也惡寒則有屬於陽者有屬於陰者及其惡風者

悉屬於陽非若惡寒之有陰也三陰之證並無惡風蓋以此也惡風雖悉在表又發散而自不同若無汗而惡風者則為傷寒也當發其汗若汗出而惡風者則為中風也當以解其肌裏證雖具而惡風未罷者皆當先解其外也又有發汗多亡陽與其風濕皆有惡風之證蓋以發汗多漏不止則亡陽外不固是以惡風也必以桂枝加附子湯溫其經而固其衛風濕相搏骨節疼煩濕勝自汗而皮腠不密是以惡風也必以甘草附子湯散其濕而實其衛由是觀之惡風

屬乎衛者可知矣

寒熱第四

傷寒寒熱何以明之寒熱者謂往來寒熱也經
曰邪正分爭往來寒熱者言邪氣之入也而正
氣不為之爭則但熱而無寒也但乃熱而寒者
惟其正氣與邪氣分爭於是寒熱作矣爭則氣
鬱不發於外而寒熱爭焉爭甚則憤然而熱故
寒已而熱作焉茲乃寒熱之理也或以謂寒熱
者陰陽爭勝也陽勝則熱陰勝則寒此陰陽之
爭也何則蓋以寒為陰而熱為陽裏為陰表為

陽邪之客於表為寒邪與陽相爭則為寒矣邪之入於裏者為熱邪與陰爭則為熱矣其邪氣在半表半裏外與陽爭而為寒內與陰爭而為熱矣表裏之不拘內外之不定或出或入由是而寒熱且往且來也是以往來寒熱屬半表半裏之證邪居表多則多寒邪居裏多則多熱邪氣半在表半在裏則寒熱亦半矣審其寒熱多少見其邪氣淺深矣小柴胡湯專主往來寒熱而又立成諸加減法亦為邪氣在半表半裏未有定處往來不常又寒熱如瘧與夫發熱惡寒

皆似而非也然寒熱如瘡者作止有時者也及往來寒熱則作止無時或往或來日有至於三五發者甚者十數發與其瘡狀有以異也至於發熱惡寒者為發熱時惡寒並不見惡寒時熱不見也不若此熱已而寒寒已而熱者雖然應往來寒熱屬半表半裏而當和解之而又有病至十餘日而結熱在裏復往來寒熱者亦可與大柴胡湯下之不可不知也

潮熱第五

傷寒潮熱何以明之若潮水之潮其來不失其

時也一日一發指時而發者謂之潮熱若日三五發者即是發熱非是潮熱也潮熱屬陽明必於日晡時發者乃為潮熱陽明者胃屬土應時而王於四季應日則發於未申經曰陽明屬土也萬物所歸無所復傳蓋邪氣入胃謂之入府府之為言聚也若府庫之府焉邪氣入於胃而不復傳邪氣鬱而為實熱隨王而潮是以日晡所發潮熱者屬陽明也惟其屬陽明故潮熱為可下之經曰潮者實也又曰潮熱者此外欲解也可攻其裏焉又曰其熱不潮未可與承氣湯

即此觀之潮熱屬於胃者昭然可見焉雖然潮熱為裏實可下之證一或脉浮而緊與其潮熱而利或小便難大便溏者皆熱未全入府猶帶表邪當和解其外外解已而小便利大便鞅者乃可攻之或謂潮熱有屬太陽少陽者乎少陽王於寅卯太陽王於巳午若熱於此時發者為邪未入胃豈得謂之潮熱必待日晡所發者乃謂之潮熱見其邪在胃也遇疾值病詳而驗之始見得真也

自汗第六

傷寒自汗何以明之自汗者謂不因發散而自然汗出者是也內經曰陽氣衛外而為固也衛為陽言衛護皮膚肥實腠理禁固津液不得妄泄汗者干之而出邪氣干於衛氣氣不能衛固於外則皮膚為之緩腠理為之疎由是而津液妄泄澌澌然潤熱熱然出謂之自汗也如發熱自汗出而不愈此衛氣不和風邪干於衛也太陽中暍汗出惡寒身熱而渴者暑邪干於衛也多汗出而濡此其風濕甚者濕邪干於衛者是知衛氣固護津液不令妄泄必為邪氣干之

而出也風寒暑濕之毒為四時之氣中人則為傷寒風與暑濕為邪皆令自汗惟寒邪傷人獨不汗出寒傷榮而不傷衛衛無邪氣所干則腠得密津液得以固是以汗不出也及其寒漸入裏傳而為熱則亦使自汗出也蓋熱則榮衛通腠理開而汗泄矣然自汗之證又有表裏之別焉虛實之異焉若汗出惡風及微惡寒者皆表未解也必待發散而後愈至於漏不止而惡風及發汗後惡寒者又皆表之虛也必待溫經而後愈諸如此皆邪氣在表也若汗出不惡

寒者此為表解而裏未和也經曰陽明發熱汗出此為熱越又曰陽明病發熱汗多者急下之又非若邪氣在表而汗出之可緩也傷寒自汗之證為常也設或汗出髮潤與其出之如油或大如貫珠着身出而不流皆為不治之證也必手足俱周遍身悉潤熱然一時間許煩熱已而身涼和乃為佳矣此則陰陽氣和水升火降榮衛通流邪氣出而解者也內經曰陽之汗與天地雨名之此之謂也

盜汗第七

傷寒盜汗何以明之盜汗者為睡而汗出者也
自汗則不以睡與不睡自然而出也及盜汗者
不睡而不能汗出方其睡也湊湊然出焉覺則
止而不復出矣雜病盜汗者責其陽虛也傷寒
盜汗者非若雜病之虛是由邪氣在半表半裏
使然也何者若邪氣一切在表干於衛則自然
汗出也此則邪氣侵行於裏外連表邪及睡則
衛氣行於裏乘表中陽氣不緻津液得泄故但
睡而汗出覺則氣散於表而汗止矣經曰微盜
汗出反惡寒者表未解也又陽明病當作裏實

而脉浮者云必盜汗是猶有表邪故也又三陽合病目合自汗是知盜汗為邪氣在半表半裏之間明矣且自汗有為之虛者有為之實者其於盜汗之證非若自汗有實者悉當和表而已不可不知也

頭汗第八

傷寒頭汗何以明之頭者諸陽之會也邪搏諸陽津液上湊則汗見於頭也邪熱內畜蒸發腠理遍身汗出者謂之熱越若身無汗則熱不得越熱蒸於陽故但頭汗出也何者以三陰之經

皆上至頸胃中而還不循於頭獨諸陽脉上循於頭爾經曰但頭汗出身無汗劑頸而還小便不利渴引水漿此為瘀熱在裏身必發黃為熱不得越而上達者也又熱入血室與其虛煩或陽明被火及水結胃皆但頭汗出也但是熱鬱於內而不得越者也此數者或吐或下皆欲除其熱也或謂頭汗之證悉屬陽明而為裏熱也而有不屬陽明屬表者乎且邪但在表者則無頭汗之證必也寒濕相搏與邪氣半在表半在裏者乃有頭汗也傷寒五六日已發汗而復下

之胃脇滿微結小便不利渴而不嘔但頭汗出
往來寒熱心煩及傷寒五六日頭汗出微惡寒
手足冷心下滿口不欲食大便鞭脉細者皆邪
氣半在表半在裏令頭汗出也濕家但頭汗出
欲得被覆向火者寒濕相搏令頭汗出也茲數
者皆邪氣所干令頭額自然汗出又不為之逆
其小便不利則惡見頭汗出也濕家下後亦惡
見頭汗出也茲二者乃為頭汗之逆者也何以
小便不利而成關格若頭汗出陽脫也經云關
格不通不得尿頭無汗者生有汗者死濕家下

後若額上汗出而微喘者亦陽脫也經云濕家下之額上汗出小便不利者死下利不止者亦死脉經曰陽氣上出汗見於頭者蓋陽脫也即知可治而治知其不可治而不治皆得十全之工者在於明辨而審的也

手足汗第九

傷寒手足汗出何以明之四肢者諸陽之本而胃主四肢手足汗出者陽明之證也陽經邪熱傳併陽明則手足為之汗出陽明為津液之主病則自汗出其有自汗出者有但頭汗出者有

手足汗出者悉屬陽明也何使之然也若一身自汗出者謂之熱越是熱外達者也但頭汗出者是熱不得越而熱氣上達者也及手足汗出者為熱聚於胃是津液之傍達也經曰手足濇然汗出者此大便秘也手足熱熱汗出大便秘難而譫語者下之則愈由此觀之手足汗出為熱聚於胃可知矣或謂熱聚於胃而手足為之汗出其寒聚於胃而有手足汗出者乎經曰陽明中寒者不能食小便不利手足濇然汗出此欲作痼瘕即是中寒者也且熱聚於胃為可下

之證其寒聚於胃為不可下又何以明之要明於此二者必曰大便初鞭後溏為胃中冷水穀不別故也是以不可下者也若大便難識語者為陽明證具則是可下之證臨病之際宜須兩審也

無汗第十

傷寒無汗何以明之腠理者津液湊泄之所為湊文理縫會之中為理津液為風暑濕氣所干外湊皮腠者則為自汗出若寒邪中經腠理緻密津液內滲則無汗無汗之由又有數種如傷

寒在表及邪行於腠理或水飲內畜與亡陽久
虛皆令無汗其傷寒無汗則腠理緻密也風中
於衛則腠理開而自汗寒中於榮則無汗謂腠
理閉也經所謂太陽病惡風無汗而喘及脉浮
緊無汗發熱及不出汗而煩躁陽明病反無汗
而小便利二三日嘔而欬手足厥苦頭痛鼻乾
不得汗脉浮無汗而喘與其剛瘕無汗是數者
皆寒邪在表而無汗者也其邪氣行於裏無汗
者為邪氣在表熏發腠理則汗出邪氣內傳不
外熏發者則無汗經所謂陽明病無汗小便不

利心中懊懣者身必發黃及發熱無汗渴欲飲水無表證者白虎加人參湯主之與夫三陰為病不得有汗是數者皆邪行於裏而無汗者也其水飲散而為津液津液布滲而為汗既水飲內畜而不行則津液不足而無汗經所謂服桂枝湯或下之仍頭痛項強翕翕發熱無汗心下滿微痛小便不利桂枝去桂加茯苓白朮湯主之是津液內畜而無汗者也其陽虛無汗者諸陽為津液之主陽虛則津液虛少故無汗經所謂脉浮而遲遲為無陽不能作汗其身必痒陽

明病反無汗其身如虫行皮中之狀此以久虛故也皆陽虛而無汗者也如是者病之常也又焉得為異哉一或當汗而不汗服湯一劑病證仍在至於服三劑而不汗者死病也又熱病脉躁盛而不得汗者黃帝為陽脉之極也死茲二者以無汗為真病詎可與其餘無汗者同日而語也

頭痛第十一

傷寒頭痛何以明之頭痛為邪氣外在經絡上攻於頭所致也難經曰三陽經受風寒伏留而

不去則名厥頭痛言三陽之經上於頭爾然傷寒頭痛者太陽之經起於目內眥上額交巔上入絡腦經所謂太陽受病者頭項痛腰脊強又曰七日病衰頭痛少愈雖然陽明少陽亦有頭痛不若太陽之專主也蓋太陽為病屬表而頭痛專為主表證雖有風寒之不同必待發散而後已太陽病頭痛發熱身疼腰痛骨節疼痛惡風無汗而喘者傷寒也麻黃湯主之太陽病頭痛發熱汗出惡風者中風也桂枝湯主之雖有傷寒六七日不大便頭痛有熱者而與調胃承

氣湯下之者又云若小便清者知熱不在裏仍在表也當與桂枝湯以頭痛未去雖不大便六七日其小便清者猶有在表是知頭痛屬表乎者明矣頭痛一切屬三陽經也而陰病亦有頭痛乎太陰少陰二經之脉皆上至頸膏中而還不上循頭則無頭痛之證唯厥陰之脉循喉嚨之後上入顙額連目系上出額與督脉會於巔病亦有頭痛經曰乾嘔吐涎沫頭痛者吳茱萸湯主之者是矣夫頭者精明之府也神邪居之小小邪氣作為頭痛者必曰發散而可也其或

痛甚入連於腦而手足寒者又為真病豈能發散而已哉嗚呼頭痛為外疾猶有不可治者又矧藏府之疾乎

項強第十二

傷寒項強何以明之太陽脉起於目内眦上額交巔上入絡腦還出別下項循肩臂内俠脊抵腰中經曰太陽之病項背強痛而惡寒以太陽感受風寒則經脉不利而項為之急頸為之強爾傷寒項強急者太陽表證也必發散而解之可也太陽病項背強几几反汗出惡風者桂

枝加葛根湯主之太陽病項背強几几無汗惡風者葛根湯主之是皆發散之劑也二者均是項背強而發散又有輕重者蓋發熱汗出惡風者為表虛表虛者可解肌無汗惡風者為表實表實者可發汗是以為治不同也桂枝加葛根湯方是桂枝加麻黃葛根又葛根湯方亦是桂枝湯中加麻黃葛根深詳究之無汗惡風為表實正可發汗則於桂枝湯中加葛根麻黃為當矣汗出惡風為表虛表虛者可解肌恐是桂枝湯中但加葛根而不加麻黃也凡音殊凡引頤

之貌凡短羽鳥也短羽之鳥不能飛騰動則先伸引其頭爾項背强者動亦如之非若凡按之凡而偃屈也太陽傷寒項背強其或太陽中風加之寒濕而成瘧者亦項強也經曰病者身熱足寒頸項強急惡風時頭熱面赤目脉赤獨頭面搖動卒口噤背反張者瘧病也金匱要略曰太陽病其證項背強凡凡然脉反沉遲者此為瘧桂枝加栝蒌湯主之雖項背強然太陽病表證悉當發散又有結胸病者項亦強如柔瘧狀下之則和宜大陷胸丸主之臨病之側審其表

裏可汗可下隨證投湯則萬全矣

頭眩第十三

傷寒頭眩何以明之眊非毛而見其毛眩非元而見其元眊為眼花也眩為眼黑眩者運也冒也三者形俱相近有謂之眩運者有謂之眩冒者運為運轉之運世謂之頭旋者是矣冒為蒙冒之冒世謂之昏冒者是也少陽之為病口苦咽乾目眩以少陽居表裏之間表邪初傳漸行於裏表中陽虛故時時目眩也二者陽併病頭項強痛或眩冒者以少陽與太陽併病故眩者

責其虛也傷寒有起則頭眩與眩冒者皆發汗吐下後所致是知其陽虛也故針經有曰上虛則眩下虛則厥眩雖為虛而風家亦有眩者蓋風主運動故爾傷寒陽明病但頭眩不惡寒者故能食而效其人必咽痛為陽明中風是風亦主頭眩也諸如此者皆非逆也及其諸逆發汗劇者言亂目眩者死命將難全嗚呼病勢已成可得半愈及病勢已深雖神醫其能已之邪

膏脇滿第十四

傷寒膏脇滿何以明之膏脇滿者謂膏膈間氣

塞滿悶也非心下滿者也脇滿者謂脇肋下氣
脹臍滿也非腹滿者也邪氣自表傳裏必先自
膏脇已次經心腹而入胃為入府也是以膏滿
多帶表證脇滿多帶半表半裏證也經曰下後
脉促膏滿者桂枝去芍藥湯主之又曰陽明病
喘而膏滿者不可下宜麻黃湯是膏滿屬表而
須發汗者也蓋膏中至表猶近也及脇者則更
不言發汗但和解而已經曰設膏滿痛者與小
柴胡湯又曰膏滿不去者小柴胡湯主之本太
陽病不解轉入少陽者脇下鞅滿乾嘔不能食

往來寒熱脉沉緊者小柴胡湯主之是知脇滿
屬半表半裏明矣大抵膏脇滿以邪氣初入裏
未停留為實氣鬱積而不行致生滿也和解而
可矣若邪氣留於膏中聚而為實者非湧吐則
不可已故華佗曰四日在膏吐之則愈是邪氣
已收斂而不散漫者則可吐之內經曰其高者
因而越之病在膏膈之上為高越之為吐也經
曰病在膏中當吐之發汗若下之而煩熱膏中
窒者則以梔子豉湯吐之若膏中痞鞭氣上衝
咽喉不得息者此為膏中有寒也則以瓜蒂散

吐之二者均是吐利則施子豉湯吐胃中虛煩
客熱也瓜蒂散吐胃中痰實宿寒也若能審明
藥劑之輕重辨別邪氣之淺深對證投湯不為
效者未之有也

心下滿第十五

傷寒心下滿何以明之心下滿者謂正當心下
高起滿鞭者是矣不經下後而滿者則有吐下
之殊若下後心下滿又有結胃痞氣之別經曰
病人手足厥冷脉乍緊邪結在胃中心滿而煩
飢不能食病在胃中當吐之又曰脉浮而大心

下反鞭有熱屬藏者攻之不令發汗屬府者不
令攻之茲二者為不經汗下而心下滿者或吐
之或下之看其邪氣之高下高者則因而越之
下者則引而竭之要在泄其邪也至如陽明病
雖心下鞭滿又未可攻經曰陽明病心下鞭滿
不可攻之攻之利遂不止者死利止者愈是邪
氣自表傳裏至於心下留結為實者則不可下
乃吐之可也若未全為實者則不可下故有此
戒也又邪氣在表未應下而強下之邪氣乘虛
結於心下實者鞭滿而痛為結實虛者滿而不

痛為虛痞經曰嘔而發熱者柴胡湯證具而以
他藥下之柴胡證仍在者復與柴胡湯此雖下
之不為逆必蒸而振却復發熱汗出而解若心
下滿而鞭痛者此為結膏但滿而不痛者此為
虛痞蓋實邪留結則為鞭為痛虛邪留滯則但
滿而不鞭痛也結膏熱實脉沉而緊心下痛按
之石鞭者大陷膏湯主之明其邪實可知矣脉
浮而緊而反下之緊反入裏則作痞按之自濡
但氣痞耳明其虛實可知矣病發於陽而反下
之熱入因作結膏病發於陰而反下之因作痞

表邪未罷醫反下之胃中空虛客氣動隔陽氣
內陷心下因鞭則為結膏須陷膏湯丸攻之可
也傷寒中風醫反下之心下痞鞭而滿醫見心
下痞為病不盡而復下之其痞益甚此非結熱
但以胃中空虛客氣上逆故使鞭也須諸瀉心
湯散之可也二者俱是心下滿鞭一為虛一為
實凡投湯者大須詳審結膏雖為實邪衆皆共
知當用陷膏湯丸下之或脉浮大者則不可下
下之則死即是猶帶表邪未全結實下之重虛
其裏邪深結則死設其結膏形證悉具而加之

煩躁者又為不治之疾藥之所以能勝邪者必待胃氣施布藥力始能溫汗吐下之其邪氣勝胃氣絕者湯藥綴下胃氣不能施布雖神丹其能為効耶

腹滿第十六

傷寒腹滿何以明之腹滿者俗謂之肚脹是也華佗曰傷寒一日在皮二日在膚三日在肌四日在膏五日在腹六日入胃入胃謂入府也是在腹者猶未全入裏者雖腹滿為裏證故亦有淺深之別經曰表已解而內不消非大滿猶生

寒熱則病不除是其未全入府若大滿大實堅有燥屎自可除下之雖四五日不能為禍謂之邪氣已入府也傷寒邪入腹是裏證已深故腹滿乃舉下之者多矣如經曰其熱不潮未可與承氣湯若腹大滿不通者可與小承氣湯發汗不解腹滿痛者急下之本太陽病醫反下之因而腹滿時痛者屬太陽也桂枝加芍藥湯主之大實痛者桂枝加大黃湯主之少陰病腹脹不大便者急下之諸如此者皆為裏證是也雖曰腹中滿痛者此為實也當下去之然腹滿不減

者則為實也若腹滿時減者又為虛也則不可
下經曰腹滿不減減不足言當下之金匱要略
曰腹滿時減復如故此虛寒從下上也當以溫
藥和之蓋虛氣留滯亦為之脹但比之實者不
至堅痛也大抵腹滿屬太陰證也陽熱為邪者
則腹滿而咽乾陰寒為邪者則腹滿而吐食不
下自利益甚時腹自痛太陰者脾土也治中央
故專主腹滿之候又發汗吐下之後因而成腹
滿者皆邪氣乘虛內客為之而所主又各不同
經曰發汗後腹脹滿者厚朴生薑甘草半夏人

參湯主之傷寒吐後腹脹滿者調胃承氣湯主之傷寒下後心煩腹脹滿卧起不安者梔子厚朴湯主之三者有當溫者有當下者有當吐者何邪氣不一也且發汗後腹脹滿當溫之邪氣在表因發散則邪去胃為津液之主發汗亡陽則胃氣虛而不能敷布諸氣壅滯而為脹滿是當溫散可也吐後腹脹滿可下之邪氣在胃者則可吐之吐之邪去則安若吐後邪氣不去加之腹脹滿者是胃中之邪下傳入胃擁而為實故生脹滿當須下之可也下後腹脹滿可吐者邪氣在

表未傳入府而妄下之邪自表乘虛而入鬱於
膏中而為虛煩氣上下不得通利者腹為之滿
故當吐之可也凡為醫者要識邪氣所起所在
審其所起知邪氣之由來觀其所在知邪氣之
虛實發汗吐下不差溫補針艾之適當則十全
之功自可得也

少腹滿第十七

傷寒少腹滿者何以明之少腹滿者臍下滿者
是也少腹者下焦所治難經曰下焦者當膀胱
上口主分別清濁其治在臍下邪氣自上而下

至於下焦結而不利故少腹滿也膏中滿皆氣
爾即無物色及腹滿者又有燥屎為之者至於
少腹滿者非正氣也必有物聚於此而為之滿
爾所以然者身半已上同天之陽清陽歸之身
半已下同地之陰濁陰歸之清者在上而濁者
在下內經謂清陽出上竅濁陰出下竅當出不
出積而為滿是在上而滿者氣也在下而滿者
物也所謂物者溺與血爾邪氣聚於下焦則津
液不得通血氣不得行或溺或血留滯於下是
生脹滿而鞭痛者若後心下至少腹皆鞭滿而

痛者是邪實也須大陷膏湯下之若但少腹鞭滿而痛小便利者則畜血之證小便不利者則是溺澁之證經曰少腹滿應小便不利今反利者為有血也又曰少腹鞭小便不利者為無血也小便自利其人如狂者血證諦也其小便利而少腹滿者為太陽隨經瘀血在裏太陽自入府者也經曰太陽病熱結膀胱其人如狂自血下下者愈其外未解者尚未可攻當先解外外解而已但少腹急結者可攻之桃仁承氣湯主之是少腹鞭滿為物聚於下可知矣滲之利之

參的隨宜可為上工

煩熱宜十八

傷寒煩熱何以明之煩者熱也與其發熱若同而異也發熱者怫怫然發於肌表有時而已者是也煩者為煩而熱無時而歇者是也二者均是表熱而煩熱為熱所煩非若發熱而時發時止也故謂之煩熱經曰病人煩熱汗出則解又曰發汗已解半日許復煩脉浮數者再與桂枝湯又曰服桂枝湯反煩不解者先刺風池風府却與桂枝湯則愈即此觀之煩為表熱明矣故

又有煩疼即是熱疼又有煩渴即是熱渴也以煩為熱又何疑焉至於膏中煩心中煩內煩虛煩皆以煩為熱設傷寒至六七日手足三部脉皆至大煩而口噤不能言其人躁擾者與其脉和大煩目重臉內際黃者又皆為欲解所以言大煩者以肌表大熱則是邪熱欲去泄達於外也故為欲解內經曰謹孰陰陽以意調之

嚴氏明理論卷上

嚴氏明理論卷中

虛煩第十九

傷寒虛煩何以明之虛煩者心中鬱鬱而煩也
有肯中煩有心中煩有虛煩諸如此者皆熱也
若止云煩者表熱也及其邪熱傳裏故有肯中
煩心中煩虛煩之別三者要在觀其熱所從來
審其虛實而治為不同也如不經發汗吐下而
煩者則是傳經之熱不作鬲實者但多和解而
已故經曰心煩喜嘔或肯中煩而不嘔者小柴
胡湯主之少陰病二三日心中煩不得卧者黃

連阿膠湯主之少陰病背滿心煩者猪膚湯主之是知和解而徹熱者也若因吐下發汗後而煩者則是內陷之煩但多湧吐而已吐下後虛煩不得眠若劇者必反覆顛倒心中懊懣者梔子豉湯主之若少氣者梔子甘草豉湯主之若嘔者梔子生薑豉湯主之心煩腹滿卧起不安者梔子厚朴湯主之九藥大下後身熱不去微煩者梔子乾薑湯主之是皆取其吐而湧其熱者也虛煩之狀心中溫溫然欲吐憤憤然無奈欲嘔不嘔擾擾亂亂是名煩也非吐則不能已

經曰若下後更煩心下濡者為虛煩也梔子豉湯主之脉乍結心下滿而煩飢不能食病在胃中瓜蒂散主之二者證均是煩也藥均是吐也而又輕重之不同吐下發汗後邪氣乘虛而入為煩者則為之虛煩與梔子豉湯則是吐劑之輕者不因吐下發汗後邪氣結於胃中則為實與瓜蒂散則是吐劑之重者又陽明病不吐不下心煩者則是煩之實者也與調胃承氣湯下之傷寒二三日者心中悸而煩者則是煩之虛者也與小建中湯補之煩為熱也悸而煩復

為虛者以悸為虛悸甚而煩故為虛也少陽之邪入府者煩而悸則為熱也大抵先煩而悸者是為熱也先悸而煩者是為虛也內經曰治病必先求其本誠哉是言也

煩躁第二十

傷寒煩躁何以明之煩為擾擾而煩躁為憤躁之躁合而言之煩躁為熱也析而分之煩也躁也有陰陽之別焉煩陽也躁陰也煩為熱之輕者躁為熱之甚者經有煩疼煩滿煩渴虛煩皆以煩為熱也有不煩而躁者為怫怫然便作躁

悶此為陰盛隔陽也雖大躁欲於泥水中卧但
飲水不得入口者是矣所以煩躁者謂先煩漸
至躁也所謂躁煩者謂先發躁而迤邐復煩者
也煩躁之由又為不同有邪氣在表而煩躁者
有邪氣在裏而煩躁者有因火劫而煩躁者有
陽虛而煩躁者有陰盛而煩躁者皆不同也經
曰當汗不汗其人煩躁太陽中風脉浮而緊不
汗出而煩躁大青龍湯主之者是邪氣在表而
煩躁者也病人不大便六七日繞臍痛煩躁發
作有時此有躁屎也邪氣在裏而煩躁者也太

陽病以火熏之不得汗其人必躁太陽病二三日及躁凡熨其背令人大汗出大熱入胃躁煩者火劫令煩躁者也陽微發汗躁不得眠與下之後復發汗晝日煩躁不得眠夜而安靜不嘔不渴無表證脉沈微身無大熱者乾薑附子湯主之及發汗若下之病仍不去煩躁者茯苓四逆湯主之者陽虛煩躁者也少陰病吐利手足厥冷煩躁欲死者吳茱萸湯主之者陰盛而煩躁者也諸如此者證之常也非逆也設或結胸證悉具煩躁者死發熱下利厥逆躁不得卧者

死少陰病吐利煩躁四逆者死少陰病四逆惡寒而趺脉不出不煩而躁者死少陰病五六日自利復煩躁不得卧寐者死是數者又皆為不治之診嗚呼煩躁為常有之疾復有諸不治之證臨病之側又當熟審焉

懊懷第二十一

傷寒懊懷何以明之懊者懊惱之懊懷者鬱悶之貌即心中懊惱惱煩煩懷懷中鬱鬱而不舒暢憤憤然無奈比之煩悶而甚者懊懷也由下後表中陽邪乘虛內陷鬱而不發結於膏心之

間故如是也經曰表未解醫反下之胃中空虛客氣動隔心中懊懣又曰下之益煩心懊懣如飢即是陽氣內陷為諸懊懣也其治之法或吐之或下之若發汗吐下後虛煩不得眠劇者必反覆顛倒心中懊懣與陽明病下之其外有熱手足溫而不結胸心中懊懣飢不能食但頭汗出二者為邪熱鬱於胸中當須梔子豉湯吐之以湧其結熱也陽明病下之心中心懊懣而煩胃中有燥屎者與陽明病無汗小便不利心中懊懣者必發黃二者為邪熱結於胸中當須大承

氣湯茵陳湯攻之以滌其內熱也識諸此者吐下之不差湯劑之適當則無不愈者一或當汗反吐療熱以溫則變證自出斑出黃生者多矣其為醫者請精究之

舌上胎第二十二

傷寒舌上胎何以明之舌者心之官法應南方火本紅而澤傷寒三四日已後舌上有膜白滑如胎甚者或燥或澁或黃或黑是數者熱氣淺深之謂也邪氣在表者舌上即無胎及邪氣傳裏津液結搏則舌上生胎也寒邪初傳未全成

熱或在半表或在半裏或邪氣客於胷中者皆
舌上胎白而滑也經曰舌上如胎者以丹田有
熱胷上有寒邪初傳入裏者也陽明病脅下鞅
滿不大便而嘔舌上白胎者可與小柴胡湯是
邪氣在半表半裏者也太陽病若下之則胃中
空虛客氣動隔心中懊懣舌上胎者梔子豉湯
主之是邪客於胷中者也藏結宜若可下舌上
胎滑者則云不可攻也是邪未全成熟猶帶表
寒故也及其邪傳為熱則舌上之胎不滑而澀
也經曰傷寒七八日不解熱結在裏表裏俱熱

時時惡風大渴舌上乾燥而煩欲飲水數升者
白虎加人參湯主之是熱耗津液而滑者已乾
也若熱聚於胃則舌為之黃是熱已深也金匱
要略曰舌黃未下者下之黃自去若舌上色黑
者又為熱之極也黃帝針經曰熱病口乾舌黑
者死以心為君主之官開竅於舌黑為腎色見
於心部心者火腎者水邪熱已極鬼賊相刑故
知必死觀其口舌亦可見其逆順矣

衄第二十三

傷寒衄者何以明之鼻中血出者是也雜病衄

者責熱在裏傷寒衄者責熱在表何以言之病源曰心主血肝藏血肺主氣開竅於鼻血得熱則散隨氣上從鼻中出則為衄是雜病者責其裏熱也經曰傷寒脉浮緊不發汗因致衄者宜麻黃湯傷寒不大便六七日頭痛有熱者與小承氣湯其小便清者知不在裏仍在表也當須發汗若頭痛者必衄宜桂枝湯以此觀之是傷寒衄者責其表熱也千金翼曰吐血有三種一曰肺疸二曰傷胃三曰內衄既吐血家謂之內衄則其鼻中出血者可謂之外衄是經絡之血

妄行也經絡熱盛陽氣擁重迫血妄行出於鼻則為衄經曰其人發煩目瞑劇者必衄衄乃解所以然者陽氣重故也又曰陽盛則欲衄陰虛小便難言衄為經中陽盛也凡傷寒脉浮鼻中燥口燥但欲漱水不欲嚥者是欲衄也經曰陽明病口乾鼻燥能食者則衄又有不應發汗而強發汗因致衄者經曰少陰病但厥無汗而強發之必動其血未知從何道出或從口鼻或從目出是名下厥上竭為難治是也衄家雖為邪熱在經而又不可發汗經曰衄家不可發汗發

汗則額上陷脉緊急直視不能眴不得眠前云
桂枝湯麻黃湯治衄者非治衄也即是發散經
中邪氣爾若邪氣不得發散擁盛於經逼迫於
血則因致衄也即非桂枝麻黃湯專治衄也太
陽病脉浮緊發熱身無汗自衄者愈是經中之
邪隨而散則解矣故知衄者不待桂枝湯麻黃
湯發散之也衄者若但頭汗出身無汗及汗出
不至足者死黃帝又皆為不治之疾臨病之上
審而治之則不失矣

噦第二十四

傷寒噦者何以明之噦者俗謂之欬逆者是也
飢近於噦飢者但膏喉間氣飢塞不得下通然
而無聲也噦者則若飢吃吃然有聲者是也噦
者氣爭也胃受疾故噦噦也飢也皆胃之疾但
輕重有差爾虛寒相搏反飲水令汗大出水得
寒氣冷必相搏其人即飢言胃氣虛竭也傷寒
大吐大下之後極虛復極汗出者其人外氣拂
鬱復與之水以發其汗因得噦所以然者胃中
寒冷故也又胃中虛冷不能食者飲水則噦即
是觀之噦飢皆胃疾可知矣經曰跌陽脉浮則

為氣餉脉滑則為嘔此為醫咎責虛取實之過也。大抵妄下之後胃虛氣逆則成嘔也。經曰濕家若下之太早則嘔。本虛攻其熱則嘔。而陽明病不能食攻其熱必嘔。諸如此者皆下之後胃虛而嘔者也。然餉者正為水寒相搏必曰小青龍湯去麻黃加附子而可矣。至於嘔者則又熱氣擁鬱氣不得通而成者也。輕者有和解之證重者有攻下之候。經曰有潮熱時時嘔與小柴胡湯者即是和解之證也。嘔而腹滿視其前後知何部不利利之則愈即可攻下之候也。傷寒

至於噦則病已極也非若渴煩等輕緩之候如
太陽中風以火劫發汗陰陽俱虛竭身體枯燥
但頭汗出劑頸而還腹滿微喘口乾咽爛或不
大便久則識語甚者至噦是言其極也又不尿
腹滿加噦者不治是為真病其若是者雖有神
醫之術當斯脫絕之候又如何以措其手足哉
效第二十五

傷寒效者何以明之效者謦效之效俗謂之嗽
者是也肺主氣形寒飲冷則傷之使氣上而不
下逆而不收衝擊膈咽令喉中淫淫如痒習習

如梗是令欬也甚者續續不已連連不止坐卧不安語言不竟動引百骸嗙聞四近矣欬之由來有肺寒而欬者有停飲而欬者有邪氣在半表半裏而欬者雖同曰欬而治各不同也內經曰肺之令人欬何也皮毛者肺之合也皮毛先受寒氣寒氣以從其合其寒飲食入胃從肺脉上至於肺肺寒則內合邪因而客之則為欬嗽者是肺寒而欬也傷寒表不解心下有水氣乾嘔發熱而欬小青龍湯主之少陰病腹痛小便不利四肢沉重疼痛自下利者此為有水氣其

人或欬者真武湯加五味細辛乾薑主之二者
是停飲而欬者也雖皆為水飲所作而青龍湯
所主為水飲與表寒相合而欬者真武湯所主
為水飲與裏寒相合而欬者又不可不知也傷
寒中風往來寒熱胸脇苦滿默默不欲飲食心
煩喜嘔或欬者小柴胡湯去人參大棗生薑加
乾薑五味子主之少陰病四逆其人或欬者四
逆散加乾薑五味子主之二者是邪氣自表傳
裏而欬者雖皆為邪氣傳裏而小柴胡湯所主
為陽邪傳裏動肺而欬者四逆散所主為陰邪

傳裏動肺而欬者又不可不識表寒也裏寒也
協水飲則必動肺以形寒寒飲則傷肺故也陽
邪也陰邪也自表傳裏則必動肺以藏真高於
肺故也欬為肺疾治之必發散而可矣而又有
不可發汗者經曰欬而小便利者不可發汗發
汗則四肢厥冷又曰欬而發汗蹇而苦滿腹中
復堅茲雖逆也又脉散者為心火刑於肺金鬼
賊相刑必死臨病之側可不察之

喘第二十六

傷寒喘者何以明之肺主氣形寒飲冷則傷肺

故其氣逆而上行衝衝而氣急喝喝而見數張口擡肩搖身滾肚是為喘也傷寒喘者有邪氣在表氣不利而喘者有水氣射肺而喘者各不同也喘家作桂枝加厚朴杏仁湯太陽病頭疼腰疼骨節疼痛惡風無汗而喘者發汗後飲水多必喘以水灌之亦喘傷寒心下水氣乾嘔發熱而欬或喘者小青龍湯去麻黃加杏子主之是欲發散水寒也經曰喘而汗出者與葛根黃芩黃連湯以和之汗出而喘者與麻黃杏子甘草石膏湯以發之二者如何而然也且邪氣

內攻氣逆不利而喘者因喘而汗出見其邪氣在裏也雖表未解亦可和之若邪氣外盛壅遏使氣不利而喘者雖汗而喘不已見其邪氣在表也雖經汗下亦可發之此亦古人之奧義傷寒止於邪氣在表而喘者心腹必濡而不堅設或腹滿而喘則又為可下之證經曰短氣腹滿而喘有潮熱者此外欲解可攻裏也為因滿脹而喘矣又或邪氣內盛正氣欲脫氣塞上逆亦主喘也經曰直視譫語喘滿者死又汗出髮潤喘不休者此為肺絕身汗如油喘而不休此為

命絕皆為不治之喘也省疾問病更宜消息

嘔吐第二十七

傷寒嘔吐何以明之嘔者有哕者也俗謂之哕吐者吐出其物也故有乾嘔而無乾吐是以於嘔則曰食穀欲嘔及吐則曰飲食入口則吐嘔吐其有輕重可知矣傷寒嘔有責為熱者有責為寒者至於吐家則悉言虛冷也經曰太陰之為病腹滿而吐食不下自利益甚時腹自痛又曰胃中虛冷故吐也嘔家則不然嘔有熱者有寒者有停飲者有胃脘有膿者皆當明辯之嘔

而發熱者柴胡湯證具與其嘔不止心下急鬱鬱微煩大柴胡湯主之者是邪熱為嘔者也膈上有寒飲乾嘔者不可吐也當溫之與其乾嘔吐涎沫頭痛者吳茱萸湯主之是寒邪為嘔者也先嘔後渴者此為欲解先渴後嘔者為水停心下此屬飲家是停飲嘔者嘔家有癰膿不須治膿盡自愈是胃脘有膿而嘔也諸如此者雖有殊別大抵傷寒表邪欲傳裏裏氣上逆則為嘔也是以半表半裏證多云嘔也傷寒三日三陽為盡三陰當受邪其人反能食而不嘔此為

三陰不受邪是知邪氣傳裏者必致嘔也至於乾薑附子湯證云不嘔不渴為裏無熱十棗湯證云乾嘔短氣汗出不惡寒者此表解裏未和也即此觀之其嘔為裏熱明矣嘔家之為病氣逆者必散之痰飲者必下之千金曰嘔家多服生薑此是嘔家聖藥是要散其逆氣也金匱要略曰嘔家內半夏必去其水水去嘔則止是要下其痰飲也嘔多雖有陽明證不可攻者謂其氣逆而未收斂為實也其嘔而脉弱小便復利身有微熱見厥者為難治蓋謂其虛寒之甚也

醫者必審其邪氣之虛實疾證之逆順為施藥丸治則當矣

悸第二十八

傷寒悸者何以明之悸者心忪是也築築然踢踢然動怔怔忪忪不能自安者是矣心悸之由不越二種一者氣虛也二者停飲也傷寒二三日心悸而煩者小建中湯主之少陰病四逆其人或悸者四逆散加桂五分是氣虛而悸者也飲水多必心下悸是停飲而悸者也其氣虛者由陽氣內弱心下空虛正氣內動而為悸也其

停飲者由水停心下心為火而惡水水既內停
心不自安則為悸也又有汗下之後正氣內虛
邪氣交擊而令悸者與其虛氣而悸者則又甚
焉太陽病發汗過多其人叉手自冒心心下悸
太陽病若下之身重心下悸者不可發汗少陽
病不可吐下吐下則悸而驚少陽病不可發汗
發汗則譫語此屬胃胃和則愈胃不和則煩而
悸是數者皆汗後協邪者與其氣虛而悸者有
以異也或鎮固或化散之皆須定其氣浮也又
飲水過多水飲不為宣布留心下甚者則悸金

匱要略曰食少飲多水停心下甚者則悸飲之
為悸甚於他邪雖有餘邪必先治悸何者以水
停心下若水氣散則無所不至浸於肺則為喘
為欬傳於胃則為噦為噎溢於皮膚則為腫漬
於腸間則為利下不可緩之也經曰厥而心下
悸宜先治水與茯苓甘草湯後治其厥不爾水
漬於胃必作利也厥為邪之深者猶先治水况
其邪氣淺者乎醫者可不深究乎

渴第二十九

傷寒渴者何以明之渴者裏有熱也傷寒之邪

自表傳至裏則必有名證隨其邪淺深而見焉
雖曰一日在皮二日在膚三日在肌四日在膚
五日在腹六日入胃其傳經者又有證形焉太
陽主氣而先受邪當一二日發頭項痛而腰脊
强者是矣太陽傳陽明則二三日發身熱目疼
鼻乾不得卧也陽明傳少陽則三四日發脅脇
痛而耳聾此三陽皆受病為邪在表而猶未作
熱故不言渴至四五日少陽傳太陰則邪氣漸
入裏寒邪漸成熱當是時也津液耗少故腹滿
而噎乾至五六日太陰傳少陰是裏熱又漸深

也當此之時則津液為熱所搏漸耗而乾故口燥舌乾而渴及至六七日則少陰之邪傳於厥陰厥陰之為病消渴為裏熱已極矣所謂消渴者飲水多而小便少者是矣謂其熱能消水也所以傷寒病至六七日而渴欲飲水為欲愈之病以其傳經盡故也是以厥陰病云渴欲飲水者少少與之愈者是也邪氣初傳入裏熱氣散漫未收斂成熱裏蒸焦膈搏耗津液遂成渴也病人雖渴欲得飲水又不可多與之若飲水過多熱少不能消故復為停飲諸疾經曰凡得時

氣病至五六日渴欲飲水水飲不能多不多與也何者以腹中熱尚少不能消之便更與人作病也若大渴欲飲水猶當依證與之常令不足勿極意也言能飲一斗與五升又曰渴欲飲水少少與之但以法救之渴者宜五苓散至於大渴欲飲水數升者白虎加人參湯主之皆欲潤其燥而生津液也凡得病反能飲水此為欲愈之病其不曉病者但聞病飲水自差小渴者乃強與飲之因成不測之禍不可復數為悸動也支結也喘咳噎噦乾嘔腫滿下利小便不利數

者皆是飲水之過傷而診病之工當須識此勿令誤也

振第三十

傷寒振者何以明之振者森然若寒聳然振動者是也傷寒振者皆責其虛寒也至於欲汗之時其人必蒸蒸而振却發熱汗出而解振近戰也而輕者有振矣戰為正與邪爭則為鼓慄而戰振但虛而不至爭故止聳動而振也下後復發汗必振寒者謂其表裏俱虛也亡血家發汗則寒慄而振者謂其血氣俱虛也諸如此者止

於振聳爾其振振欲擗地者有身為振振搖者
二者皆發汗過多亡陽經虛不能自主持故身
為振搖也又非若振慄之比經曰若吐下後心
下逆滿氣上衝肯起則頭眩發汗則動經身為
振振搖者茯苓桂枝白朮甘草湯主之太陽病
發汗不解其人仍發熱心下悸頭眩身瞤動振
振欲擗地者真武湯主之二湯者皆溫經益陽
滋血助氣之劑經虛陽弱得之未有不獲全濟
之效者

戰慄第三十一

傷寒戰慄何以明之戰慄者形相類而實非一也合而言之戰慄一也析而分之有內外之別焉戰者身為之戰搖者是也慄者心戰是也戰之與慄內外之診也昧者以通為戰慄而已即不知有逆順之殊經曰胃無穀氣脾瀆不通口急不能言戰而慄者即此觀之戰之與慄豈不異哉戰之與振振輕而戰重也戰之與慄戰外而慄內也戰慄者皆陰陽之爭也傷寒欲解汗出之時正氣內實邪不能與之爭則便汗出而不發戰也邪氣欲出其人本虛邪與正爭微者

為振甚者則戰戰已正勝而解矣經曰病有戰而汗出因得解者何也其人本虛是以發戰者是也邪氣外與正爭則為戰戰其愈者也邪氣內與正氣爭則為慄慄為甚者也經曰陰中為邪必內慄也表氣微虛裏氣不守故使邪中於陰也方其裏氣不守而為邪中於正氣正氣怯弱故成慄也戰者正氣勝也慄者邪氣勝也傷寒六七日欲解之時當解而汗出其有但心慄而鼓頷身不戰者已而遂成寒逆似此時多不得解何者以陰氣內盛正氣大虛不能勝邪反

為邪所勝也非大熱劑與其灼火又焉得而禦之矣

四逆第三十二

傷寒四逆何以明之四逆者四肢逆而不溫者是也積涼成寒積溫成熱非一朝一夕之故其所由來者漸矣傷寒始者邪在皮膚當太陽陽明受邪之時則一身手足盡熱當少陽少陰受邪之時則手足自溫是表邪漸緩而欲傳裏也經曰有傷寒四五日手足溫而渴者小柴胡湯主之是太陽之邪傳之少陽也傷寒脉浮手足

自溫者是為繫在太陰是少陽邪傳於太陰也
是知邪氣在半表半裏則手足不熱而自然溫
也至於邪傳少陰為裏證已深雖未至厥而手
足又加之不溫是四逆也若至厥陰則手足厥
冷矣經曰少陰病四逆其人或欬或悸或小便
不利或腹中痛或泄利下重者四逆散主之方
用柴胡枳實芍藥甘草四者皆是寒冷之物而
專主四逆之疾是知四逆非虛寒之證也又有
四逆諸湯亦治四逆手足寒方用乾薑附子熱
藥者厥有旨哉若手足自熱而至溫從四逆而

至厥者傳經之邪也四逆散主之若始得之手
足便厥而不溫者是陰經受邪陽氣不足可用
四逆湯溫之大須識此勿令誤也四逆與厥相
近而非也經曰諸四逆厥者不可下是四逆與
厥有異也吐利煩躁見四逆者死是惡見其四
逆也診視之間熟詳究之

厥第三十三

傷寒厥者何以明之厥者冷也甚於四逆也經
曰厥為陰陽氣不相順接便為厥厥者手足逆
冷是也謂陽氣內陷熱氣逆伏而手足為之冷

也經曰傷寒一二日至四五日厥者必發熱前
熱者後必厥厥深者熱亦深厥微者熱亦微是
知內陷者手足冷為厥矣少陰病但厥無汗而
強發之必動其血未知從何道出或從口鼻或
從目出是名下厥上竭亦是言發動其熱也先
熱而後厥者熱伏於內也先厥而後熱者陰退
而陽氣得復也若始得之便厥者則是陽氣不
足而陰氣勝也大抵厥逆為陰所主寒者多矣
又有進退之別經曰病厥五日熱亦五日設六
日當復厥不厥者自愈發熱四日厥反三日若

厥少熱多其病自愈厥四日熱反三日復厥五日其病為進寒多熱少陽氣退故為進也病至厥陰傳經盡也當是之時陽氣勝陰厥少熱多其病則愈若或陰氣反勝陽不得復厥多熱少其病則進厥為陰氣至也熱為陽氣復也至於下利則曰先厥後發熱而利必自止見厥復利為陽氣得復而利必自止熱者復為厥是陰氣還勝也故復下利矣諸陽受氣於胃中邪氣客於胃中鬱鬱留結則陽氣不得敷布而手足為之厥經曰手足厥冷脉乍結邪結在胃中心中

滿而煩飢不能食病在胃中當吐之者是矣厥
為陰之盛也若更加之惡寒而蹇是陰氣之極
也則難可制經曰少陰病惡寒身蹇而利手足
厥冷者不治是厥冷之逆者神丹將就其能生
乎

鄭𠵽第三十四

傷寒鄭𠵽為邪音也孔子曰惡鄭𠵽之亂雅樂
也又曰惡鄭𠵽遠佞人鄭𠵽淫佞人殆是為鄭
𠵽為不正之音也傷寒鄭𠵽者則其𠵽如鄭衛
之音轉不正也經曰虛則鄭𠵽今汗後或病久

人哤轉者是矣以此為虛從可知也又鄭哤者重語也正為哤轉也若哤重之轉其本音者亦是矣昧者殊不知此妄以重為重疊之語與譌語混而莫辨遂止以身熱脉數煩渴便難而多言者為譌語以身涼脉小自利不渴而多言者為鄭哤如此則有失仲景之本意兼則語以正之則鄭哤不為重疊正為不正也况仲景之書三百九十餘證曲盡傷寒形候未有脫落而不言者若是鄭哤為多言則於三陰門中亦須條見所以鄭哤別無證治者是不與譌語為類也

雖曰虛矣止為正氣虛而不完故使轉呻而不正也明者鑒此幸詳究之

讖語第三十五

傷寒讖語何以明之讖者為呢喃而語也又作譫為妄有所見而言也斯皆真氣昏神識不清之所致夫心藏神而主火病則熱氣歸焉傷寒胃中熱盛上乘於心心為熱胃則神昏亂而語言多出識昏不知所以然遂言無次而成譫妄之語輕者睡中呢喃重者不睡亦語言差謬有讖語者有獨語者有狂語者有語言不休者有

言亂者此數者見其熱之輕重也讖語與獨語
謂雖間有妄錯之語若與人言有次是熱未至
於極者也經曰獨語如見鬼若劇者發則不識
人是病獨語未為劇也狂語者熱甚者也由神
昏而無所見覺甚則至於喊叫而言語也言語
不休者又其甚也至於言亂者謂妄言罵詈善
惡不避親疎為神明已亂也經曰諸逆發汗微
者難差劇者言亂是難可復制也讖語之由又
自不同皆當明辨之有被火劫讖語者有汗出
讖語者有下利讖語者有下血讖語者有燥屎

在胃讖語者有三陽合病讖語者有過經讖語者有亡陽讖語者經曰太熱入胃中水竭躁煩必發讖語又腹滿微喘口乾咽爛或不大便久則讖語是因被火劫讖語也汗出讖語此為風也須下之過經可下之下之若早語言必亂以表虛裏實故也是汗出讖語者也下利讖語者有燥屎也小承氣湯主之是下利讖語者也下血讖語者此為熱入血室當刺期門隨其虛實而瀉之是下血讖語者也讖語有潮熱反不能食者胃中必有燥屎五六枚也是謂燥屎在胃

譫語者也腹滿身重難以轉側口不仁面垢譫語遺尿是三陽合病譫語者也過經譫語者以有熱也當以湯下之是過經譫語者也發汗多亡陽譫語者不可下與柴胡桂枝湯和其榮衛以通津液後自愈是亡陽譫語也諸如此者脉短則死脉自和則愈又身微熱脉浮大者生逆冷脉沈細不過一日死實則譫語氣收斂在內而實者本病也或氣上逆而喘滿或氣下奪而自利者皆為逆也經曰直視譫語喘滿者死下利者亦死謂其正氣脫絕也能知虛實之診能

識逆從之要治病療病則不失矣

短氣第三十六

傷寒短氣何以明之短氣者氣短而不能相續者是矣似喘而非喘若有氣上衝而實非氣上衝也喘者張口擡肩搖身滾肚謂之喘也氣上衝者腹裏氣時時上衝也所謂短氣者呼吸雖數而不能相續似喘而不搖肩似呻吟而無痛者短氣也經所言短氣者衆實為難辨之證愚醫莫識之為治有悞者多矣要識其短氣之真者氣急而短促謂之氣促者是也短氣有責為

虛者有責為實者要當明辨之經曰跌陽脉浮而緊緊則為寒微則為虛微虛相搏則為短氣此為短氣之虛者也短氣腹滿而喘有潮熱此外欲解可攻裏也此為短氣之實者也又有屬表又有屬裏者要當審視之經曰短氣但坐以汗出不徹故也更發汗則愈與其風濕相搏汗出短氣小便不利惡風不欲去衣甘草附子湯主之者是邪氣在表而短氣者也乾嘔短氣汗出不惡寒者此表解裏未和也十棗湯主之與其太陽病醫反下之短氣躁煩心中懊懣陽氣

內陷心下因鞅則為結胃大陷胃湯主之是邪
氣在裏而短氣者也虛也實也在表也在裏也
皆作短氣又何以辨其虛實也大凡心腹脹滿
而短氣者邪在裏而為實也腹濡滿而短氣者
邪氣在表而為虛也大抵短氣為實金匱要略
曰短氣不足以息者實也又水停心下亦令短
氣金匱要略曰食少飲多水停心下微者短氣
即此觀之短氣之由亦衆矣必審其形候使的
而不惑必審其邪氣在表裏之不差隨證攻之
了無不愈者矣

何氏明理論卷中

嚴氏明理論卷中

嚴氏明理論卷下

搖頭第三十七

傷寒搖頭何以明之頭者諸陽之會也諸陽之脉皆上於頭諸陰脉皆至頸胛中而還陽脉不治則頭為搖傷寒搖頭有三皆所主不同也有曰搖頭言者裏痛也以裏有痛者語言則劇欲言則頭為之戰搖也有曰獨搖頭卒口噤背反張者痙病也以風盛於上風主動搖故也裏痛非邪也痛使之然痙病非逆也風使之然至於陽反獨留形體如煙熏直視搖頭者又謂之心

絕蓋心藏神而為陰之本陽根於陰陰根於陽
陰陽相根則榮衛上下相隨矣絕則神去而陰
竭陽無根者則不能自主持故頭為之搖矣王
冰曰滋苗者以固其根伐下者必枯其上內絕
其根外作搖頭又何疑焉心絕者真病也風痙
裏痛者邪氣也觀其頭搖又當明其臧否焉

瘈瘲第三十八

傷寒瘈瘲何以明之瘈者筋脉急也瘲者筋脉
緩也急者則引而縮緩則縱而伸或縮或伸動
而不止者名曰瘈瘲俗謂之搖者是也黃帝內

經曰病筋脉相引而急名曰瘈瘲為若契合之
契也爰則緩卧則緊從則縱疾之縱者為若放
縱之縱也以急為瘈以緩為瘲理至明矣瘈瘲
者風疾也而癰瘡則瘈瘲焉傷寒瘈瘲者邪熱
氣極也熱盛則風搏併經絡風主動致四肢瘈
瘲而不寧也故風溫被火者曰發微黃也劇者
如驚癇時瘈瘲言其熱氣之劇盛也傷寒病至
於發瘈瘲者疾勢已過矣多難可制內經有曰
太陽終者戴眼反折瘈瘲絕汗乃出大如貫珠
著身不流是見其瘈瘲為已過之疾也又有四

肢熱習為四肢動而不止似瘕瘕而無力不得伸縮者也此為肝絕瘕瘕之證雖難已若能以祛風滌熱之劑折其火熱則瘕瘕亦有生者若妄加灼火或飲以發表之藥則死不旋踵經曰一逆尚引日再逆促命期

不仁第三十九

傷寒不仁何以明之仁柔也不仁謂不柔和也痒不知也痛不知也寒不知也熱不知也任其屈伸灸刺不知所以然者是謂不仁也由邪氣擁盛正氣為邪氣閉伏鬱而不發榮衛血氣虛

少不能通行致斯然也內經曰榮氣虛則不仁
針經曰衛氣不行則為不仁經曰榮衛不能相
將三焦無所仰身體痺不仁即是言之知榮衛
血氣虛少不能通行為不仁者明矣經曰諸乘
寒者則為厥鬱冒不仁言此厥者是正氣為寒
氣所乘為厥氣也非四肢逆冷之厥也何者蓋
以鬱冒為昏冒不仁又不知痛痒得不為尸厥
之厥耶經曰少陰脉不至腎氣微少精血奔氣
促迫上入膂膈寒氣反聚血結心下陽氣退不
熱歸陰股與陰相動令身不仁此為尸厥其乘

傷寒之厥鬱冒不仁即此尸厥可知矣昔越人入
虢診太子為尸厥以鬱冒不仁為可治刺之而
得痊濟者寔神醫之診也嗚呼設或脉浮而洪
是汗如油喘不休水漿不下形體不仁此又為
命絕雖越人其能起之歟

直視第四十

傷寒直視何以明之直視者視物而目睛不轉
動者是也若目睛轉者非直視也水之精為志
火之精為神目者心之使也神所寓焉肝之外
候也精神榮焉鍼經曰五藏六府之氣皆上注

於目而為之精精之窠為眼骨之精為瞳子筋之精為黑睛血之精為絡氣之精為白睛肌肉之精為鈞束裏攢筋骨血氣之精與脉并為系上屬於腦五藏血氣調和精氣充榮則目和而明矣傷寒目直視者邪氣擁盛冒其正氣使神志不慧藏精之氣不上榮於目則目為之直視傷寒至於直視為邪氣已極證候已逆多難治經曰衄家不可發汗汗則額上陷脉急緊直視不能眴不得眠以肝受血而能視亡血家肝氣已虛自氣已弱又發汗亡陽則陰陽俱虛所致

也此雖錯逆其未甚也逮乎狂言目反直視又為腎絕直視搖頭又為心絕皆藏氣脫絕也直視譏語喘滿者死下利者亦死又劇者發則不識人循衣摸床惕而不安微喘直視脉絃者生瀉者死皆邪盛而正脫也其或有目中不了了睛不和無表裏證大便難身微熱者是非直視也此為內實也可用大承氣湯大柴胡湯下之直視為不治之疾目中不了了為可治之候二者形證相近其為二者宜熟視之

鬱冒第四十一

傷寒鬱冒何以明之鬱為鬱結而氣不舒也胃
為昏冒而神不清也世謂之昏迷者是也鬱冒
之來皆虛極而乘寒則有之矣經曰諸乘寒者
則為厥鬱冒不仁又曰太陽病先下之而不愈
因復發汗以此表裏俱虛其人因致冒冒家汗
出自愈所以然者汗出表和故也是知因虛乘
寒乃生鬱冒金匱要略曰新產婦人有三病一
者病瘵二者病鬱冒三者大便難亡血復汗寒
多故令鬱冒又曰產婦鬱冒其脉微弱不能食
大便堅所以然者血虛而厥厥而必冒冒家欲

解必大汗出即此觀之鬱冒為虛寒可知矣又或少陰病下利止而頭眩時時自冒者又為死證蓋謂其虛極而脫也觀其鬱冒幸無忽焉

動氣第四十二

傷寒動氣何以明之動氣者為築築然動於腹中者是矣藏氣不治隨藏所主發泄於臍之四傍動跳築築然謂之動氣難經曰肝內證臍左有動氣按之牢若痛心內證臍上有動氣按之牢若痛肺內證臍右有動氣按之牢若痛腎內證臍下有動氣按之牢若痛是藏氣不治腹中

氣候發動也動氣應藏見皆真氣虛雖有表裏
攻發之證即不可汗下經曰動氣在左不可發
汗汗則頭眩汗不止筋惕肉瞤是發汗而動肝
氣者也動氣在左不可下下之則腹內拘急食
不下動氣更劇雖有身熱卧則欲蹶是下之而
動肝氣者也動氣在上不發汗汗則氣上衝正
心端是發汗而動心氣者也動氣在上不可下
下之則掌握熱煩身上浮冷熱汗自泄欲得水
自灌是下之而動心氣者也動氣在右不可發
汗汗則衄而渴心苦煩飲則吐水是發汗而動

肺氣者也動氣在右不可下下之則津液內竭咽燥鼻乾頭眩心悸是下之而動肺氣者也動氣在下不可發汗汗則無汗心中大煩骨節苦痛目運惡寒食則反吐穀不得下是發汗而動腎氣者也動氣在下不可下下之則腹滿卒起頭眩食則下清穀心下痞是下之而動腎氣者也且脾內證當臍有動氣經特舉臍之四傍動氣不可汗下獨不言脾候當臍有動氣者以脾者中州為胃主津液發汗吐下耗損津液必先動脾其餘四藏動氣發動妄有汗下猶先動脾

況脾家發動氣者詎可動之也所以特不言之也傷寒所以看外證為當者盖有不在脉之可見必待問之可得者發汗吐下務要審諦舉此動氣類可知矣

自利第四十三

傷寒自利何以明之自利者有不經攻下自然溇瀉者謂之自利也傷寒自利多種須知冷熱虛實消息投湯無致失差雜病自利多責為寒傷寒下利多由協熱與其雜病有以異也表邪傳裏裏虛協熱則利不應下而便攻之內虛協

熱遂利是皆協熱也又合病家皆作自利太陽
與陽明合病必自下利葛根湯主之太陽與少
陽合病必自下利黃芩湯主之陽明與少陽合
病必自下利大承氣湯主之三者皆合病下利
一者發表一者攻裏一者和解所以不同者蓋
六經以太陽陽明為表少陽太陰為在半表半
裏少陰厥陰為在裏太陽陽明合病為在表者
也雖曰下利必發散經中邪氣而後已故與葛
根湯以汗之太陽與少陽合病為在半表半裏
者也雖曰下利必和解表裏之邪而後已故與

黃芩湯以散之陽明少陽合病為少陽邪氣入
府者也雖曰下利必逐去胃中之實而後已故
與承氣湯以下之是三者所以有異也下利家
何以明其寒熱邪且自利不渴屬太陰以其藏
寒故也下利欲飲水者以有熱也故大便溏小
便自可者此為有熱自利小便色白者少陰病
形悉具此為有寒惡寒脉微自利清穀此為有
寒發熱後重泄色黃赤此為有熱皆可理其寒
熱也凡腹中痛轉氣下趣小腹者此欲自利也
自利家身涼脉小為順身熱脉大為逆少陰病

脉緊下利脉暴微手足反溫脉緊反去者此為欲解下利脉大者為未止脉微弱者為欲自止雖發熱不死是知下利脉大為逆而脉小為順也自利宜若可溫理中白通諸四逆輩皆溫藏止利之劑又有腸胃有積結與下焦客邪皆溫劑不能止之必也或攻泄之或分利之而後已經曰理中者理中焦此利在下焦宜赤石脂禹餘糧湯利復不止當利其小便是泄在下焦滲泄而聚利者也少陰病自利清水色純青心下必痛口乾燥與下利三部皆平按之心下鞭或

脉沈而滑或不欲食而譏語或差後至年月日復發此數者皆腸胃有積結而須攻泄者也內經有曰大熱內結注泄不止熱宜寒療結伏須除以寒下之結散利止大寒凝內久利泄溏愈而復發縣歷歲年以熱下之寒去利止謂之通因通用下利雖有表證又不可發汗以下利為邪氣內攻走津液而胃虛也故經曰下利不可攻其表汗出必脹滿者是矣大抵下利脫氣至急五奪之中此為甚者其或邪盛正虛邪擁正氣下脫多下利而死何以言之經曰下利日十

餘行脉反實者死發熱下利至甚厥不止者死
直視譫語下利者死下利手足厥冷無脉者灸
之不溫脉不還死少陰病自利復煩躁不得卧
寐者死此數者皆邪擁正氣下脫而死者也金
匱要略曰六府氣絕於外者手足寒五藏氣絕
於內者利不禁下嗚呼疾成而後藥雖神醫不
可為也氣既脫矣孰能治之

筋惕肉瞤第四十四

傷寒筋惕肉瞤何以明之傷寒頭痛身疼惡寒
發熱者必然之證也其於筋惕肉瞤非常常有

之者必待發汗過多亡陽則有之矣內經曰陽氣者精則養神柔則養筋發汗過多津液枯少陽氣大虛筋肉失所養故惕惕然而跳躍惕然而動也太陽病脉微弱汗出惡風者不可服大青龍湯服之則厥逆筋惕肉瞤此為逆也太陽病發汗汗出不解其人仍發熱頭眩身瞤動振振欲擗地者真武湯主之動氣在左不可發汗發汗則頭眩汗出不止筋惕肉瞤即是觀之筋惕肉瞤由發汗多亡陽陽虛可見矣茲雖逆也止於發汗亡陽而表虛治以溫經益陽則可矣

或因吐下發汗後表裏俱虛而有此狀者又非
若但發汗後所不同也經曰傷寒吐下後發汗
虛煩脉甚微八九日心下痞脇下痛氣上衝咽
喉眩冒筋脉動惕者久而成痿此為逆之甚也
太陽病發汗復下之後表裏俱虛復加燒針因
背煩面色黃膚濇者難治茲為逆之甚者也發
汗吐下庸可忽諸

熱入血室第四十五

傷寒熱入血室何以明之室者屋室也謂可以
停止之處人身之血室者榮血停止之所經脉

留會之處即衝脉是也衝脉者奇經八脉之一脉也起於腎下出於氣衝並足陽明經夾臍上行至膻中而散為十二經脉之海王冰曰衝於血海言諸經之血朝會於此男子則運行之女子則上為乳汁下為月水內經曰任脉通衝脉盛月事以時下者是也王冰曰陰靜海滿而去血謂衝脉盛於海滿也即是觀之衝是血室可知矣傷寒之邪婦人則隨經而入男子由陽明而傳以衝之脉與少陰之絡起於腎女子感邪太陽隨經便得而入衝之經並足陽明男子陽

明內熱方得而入也衝之得熱血必妄行在男子則下血讖語在婦人則月水適來陽明病下血讖語此為熱入血室者斯蓋言男子不止謂婦人而言也婦人傷寒經水適來與經水適斷者皆以經氣所虛宮室不闢邪得乘虛而入針經有言曰邪氣不得其虛不能獨傷人者是矣婦人熱入血室有須治而愈者有不須治而愈者又各不同也婦人中風發熱惡寒經水適來得之七八日熱除而脉遲身涼和胷下滿如結胷狀讖語者此為熱入血室當刺期門隨其

實而瀉之與其婦人中風七八日續得寒熱發
作有時經水適斷者此為熱入血室其血必結
故使如瘧狀發作有時小柴胡湯主之二者是
須治而愈者也婦人傷寒發熱經水適來晝則
明了暮則譫語如見鬼狀此為熱入血室無犯
胃氣及上二焦必自愈是不須治而愈者也譫
語為病邪之甚者何不須治而愈耶且胃脇滿
如結胸譫語是邪氣留結於胃脇而不去者必
刺期門隨其實而瀉之寒熱如瘧發作有時者
是血結而不行者須小柴胡散之二者既有留

邪必須治之可也若發熱經水適來晝日明了
暮則譫語此則經水既以裏無留邪但不妄犯
熱隨血散必自愈經曰血自下下者愈故無犯
胃氣及上二焦必自愈所謂妄犯者謂恐以譫
語為陽明內實攻之犯其胃氣也此無脅脇之
邪恐刺期門犯其中焦也此無血結恐與小柴
胡湯犯其上焦也小柴胡湯解散則動衛氣衛
出上焦動衛氣是犯上焦也刺期門則動榮氣
榮出中焦動榮氣是犯中焦也脉經有曰無犯
胃氣及上二焦豈謂藥不謂針耶此其是歟

發黃第四十六

傷寒發黃何以明之經曰濕熱相交民當病瘴瘴者黃也單陽而無陰者也傷寒至於發黃為疾之甚也濕也熱也甚者則發黃內熱已盛復被火者亦發黃也邪風被火熱兩陽相熏灼其身必發黃陽明病被火額上汗出而小便不利者必發黃是由內有熱而被火致發黃者也陽明病無汗小便不利心中懊懣者必發黃是由陽明熱盛致發黃者也傷寒發汗已身目為黃所以然者寒濕在裏不解故也以為不可下也

於寒濕中求之是由寒濕致發黃也濕亦令黃也熱亦令黃也其能辨之乎二者非止根本來有異而色澤亦自不同濕家之黃也身黃如似熏黃雖黃而色暗不明也至於熱盛之黃也必身黃如橘子色甚者勃勃出染着衣正黃如麤是其正黃色也由是觀之濕之與熱豈不異矣大抵黃家屬太陰太陰者脾之經也脾者土黃土色也脾經為濕熱蒸之則色見於外必發身黃經曰傷寒脉浮緩手足自溫者是為繫在太陰太陰當發身黃者是矣熱雖內盛若已自汗

出小便不利者則不能發黃必也頭汗出身無汗劑頸而還小便不利渴引水漿此為瘀熱在裏身必發黃黃家為熱盛而治法亦自有殊傷寒八九日身如橘子色小便不利少腹滿者茵陳蒿湯主之此欲泄滌其熱也傷寒身黃發熱者梔子蘘皮湯主之此欲解散其熱也傷寒瘀熱在裏身必發黃麻黃連翹赤小豆湯主之此欲解散其熱也此數者泄滌解散乃為之不同亦皆折火徹熱之劑也一或身黃脉沉結少腹鞭而小便自利其人如狂者又為畜血在下焦

使之黃也必須抵當湯下之而愈黃家既是病之已極是以有不治之者多矣非止寸口近掌無脉鼻氣出冷為不治之疾又若形體如煙熏直視搖頭者是為心絕環口顰黑柔汁發黃是為脾絕皆不治之診醫者更詳視之

發狂第四十七

傷寒發狂何以明之狂猖狂也謂其不寧也難經曰狂之始發也少卧不饑而自高賢也自辯智也自貴倨也妄笑好歌樂也妄行不休是也狂家所起皆陽盛致然內經曰陰不勝其陽脉

留薄疾并乃狂也又曰邪入於陽則狂邪入於陰則瘖難經曰重陽者狂重陰者癲脉經曰陰附陽則狂陽附陰則癲病源曰陽邪併於陽則狂陰邪并於陰則癲即諸經之狂為陽盛也明矣又陽明之病惡人與火聞木音則惕然而驚心不欲動獨閉戶牖而處甚則欲上高而歌棄衣而走踰垣上屋其所上之處皆非素能者是謂陽邪併於陽明也傷寒熱獨在胃併於心藏使神不寧而志不定遂發狂也傷寒至於發狂為邪熱至極也非大吐下則不能已又有熱在

下焦其人如狂者經曰熱入膀胱其人如狂謂之如狂則未至於狂但卧起不安尔其或狂言目反直視又為腎之絕汗出則復熱狂言不能食又為失志死若此則殆非藥石之所及是為真病焉

霍亂第四十八

傷寒霍亂何以明之上吐而下利揮霍而撩亂是也邪在上焦者但吐而不利邪在下焦者但利而不吐若邪在中焦胃氣不治為邪所傷使陰陽乖隔遂上吐而下利若止嘔吐而利經止

謂之吐利必也上吐下利躁擾煩亂乃謂之霍亂與其但稱吐利者有以異也傷寒吐利者邪氣所傷霍亂吐利者飲食所傷也其有兼傷寒之邪內外不和者加之頭痛發熱而吐利也經曰病發熱頭痛身疼惡寒吐利者此屬何病答曰此名霍亂霍亂自吐下又利止復更發熱也是霍亂兼傷寒者也霍亂者頭痛發熱熱多欲飲水者五苓散主之寒多不飲水者理中丸主之以其中焦失治陰陽乖隔必有偏之者偏陽則多熱偏陰則多寒許仁則曰病有乾霍亂有

濕霍亂乾霍亂死者多濕霍亂死者少蓋吐利則所傷之物得以出泄雖霍亂甚則止於胃中水穀泄盡則止矣所以死者少及其乾霍亂而死者多以其上不得吐下不得利則所傷之物不得出泄擁閉正氣隔絕陰陽煩擾悶亂躁無所安喘脹乾霍亂而死嗚呼食飲有節起居有常者豈得其霍亂耶飲食自倍腸胃乃傷喪身之由實自致爾

畜血第四十九

傷寒畜血何以明之畜血者血在下焦結聚而

不行畜積而不散者是也血菀於上而吐血者謂之薄厥留於下而瘀者謂之畜血此由太陽隨經瘀熱在裏血為熱所搏結而不行畜於下焦之所致經曰太陽病七八日表證仍在脉微而沉反而不結胸其人如狂者以熱在下焦少腹當鞕滿小便自利者下血乃愈抵當湯主之者是也大抵看傷寒必先觀兩目次看口舌然後自心下至少腹以手攝按之覺有滿鞕者則當審而治之如少腹覺有鞕滿便當問其小便若小便不利者則是津液留結可利小便若小

便自利者則是畜血之證可下瘀血經曰傷寒有熱少腹滿應小便不利今反利者為有血也又曰太陽病身黃脉沈結少腹鞭小便不利者為無血也小便自利其人如狂者血證諦也皆須抵當丸下之愈陽明病其人喜忘屎雖鞭大便秘反易其色必黑亦是畜血之證畜血於下所以如狂者經為熱結膀胱其人如狂者是也血瘀於下所以喜忘者內經曰謂血并於下亂而喜忘者是也二者若有其一則為畜血證明矣畜血之證又有輕重焉如狂者喜忘也皆畜血

之甚也須抵當湯丸以下之如外解已但少腹
急結者則為畜血之輕也須桃仁承氣湯以利
之醫之妙者何也在乎識形證明脉息曉虛實
知傳變其於形證之明者衆人所共識又何以
見其妙必也形證之參差衆人所未識獨先識
之乃所以為妙且如病人無表裏證發熱七八
日雖脉浮數者可下之假令已下脉數不解今
熱則消穀喜飢至六七日不大便者此有瘀血
抵當湯主之當不大便六七日之際又無喜忘
如狂之證亦無少腹鞭滿之候當是之時與承

氣下者多矣獨能處以抵當湯下之者是為醫之妙者也若是者何以知其有畜血也且脉浮而數浮則傷氣數則傷血熱客於氣則脉浮熱客於血則脉數因下之後浮數俱去則已若下之後數去其脉但浮者則榮血間熱去而衛氣間熱在矣為邪氣獨留心中則飢邪熱不殺穀潮熱發渴也及下之後浮脉去而數不解者則衛氣間熱去而榮血間熱在矣熱客氣合覆血乃下行胃虛協熱消穀喜飢血至下焦若下不止則血得以去泄必便膿血也若不大便六七

日則血不得出泄必畜在下焦為瘀血是須抵當湯下之此實疾證之奇異醫法之元微能審諸此者真妙醫也

勞復第五十

傷寒勞復何以明之勞為勞動之勞復為再發也是傷寒差後因勞動再發者是也傷寒新差後血氣未平餘熱未盡勞動其熱熱氣還經絡遂復發也此有二種一者因勞動外傷二者因飲食內傷其勞動外傷者非止強力搖體持重遠行之勞至於梳頭洗面則動氣憂悲思慮則

勞神皆能復也况其過用者其飲食內傷者為多食則遺食肉復者也內經曰熱病已愈而時有遺者何也以熱甚而強食之病已衰而熱有所藏因其穀氣留薄兩陽相合故有所遺經曰病已差尚微煩煩不了了者以新虛不勝穀氣故令微煩損穀則愈夫傷寒邪氣之傳自表至裏有次第焉發汗吐下自輕至重有等差焉又其勞復則不然見其邪氣之復來也必迎奪之不待其傳也經曰大病差後勞復者枳實梔子豉湯主之若有宿食加大黃且枳實梔子豉湯

則吐之豈待虛煩懊懷之證加大黃則下之豈待腹滿譏語之候經曰傷寒差後更發熱者小柴胡湯主之脉浮以汗解之脉沉實者以下之亦是便要折其邪也蓋傷寒之邪自外入也勞復之邪自內發也發汗吐下隨宜施用焉嗚呼勞復也食復也諸勞皆可及御內則死矣若男子相易則為陰陽易其不易自病者謂之女勞復以其內損真氣外動邪熱真虛邪盛則不可治矣昔督郵顧子獻不以華敷之證為信臨死致有出舌數寸之驗由此觀之豈不與後人誠

信美曰王言卷下
為鑒誠

嚴氏明理論卷下終

嚴氏明理論後集

論方例序

制方之體宣通補瀉輕重溫滑燥濕十劑是也
制方之用大小緩急奇偶七方是也是以制方
之體欲成七方之用者必本於氣味生成而制
方成焉其寒熱溫涼四氣者生乎天酸苦辛鹹
甘淡六味者成乎地氣味生成而陰陽造化之
機存焉是以一物之內氣味兼有一藥之中理
性具矣主對治療由是而出斟酌其宜參合為
用君臣佐使以相宜宣攝變化不可勝量一千

四百五十三病之方悉自此而始矣其所謂君臣佐使者非特謂上藥一百二十種為君中藥一百二十種為臣下藥一百二十五種為佐使三品之君臣也制方之妙的與病相對有毒無毒所治病為主主病之謂君佐君之謂臣應臣之謂使擇其相須相使制其相畏相惡去其相反相殺君臣有序四方道備矣方宜一君二臣三佐五使又可一君三臣九佐使也多君少臣多臣少佐則氣力不周君一臣二制之小也君一臣三佐五制之中也君一臣三佐九制之大

也君一臣二奇之制也君二臣四偶之制也君一臣三奇之制也君二臣六偶之制也近者奇之遠者偶之所為遠近者身之遠近也在外者身半已上同天之陽其氣為近在內者身半已下同地之陰其氣為遠心肺位膈上其藏為近腎肝位膈下其藏為遠近而奇偶制小其服遠而奇偶制大其服腎肝位遠數多則其氣緩不能速達於下必劑大而數少取其氣迅急可以走下也心肺位近數少則其氣急不能散發於上必劑小而數多取其氣易散可以補上也所

謂數者腎一肝三脾五心七肺九為五藏之常制不得越也補上治上制以緩補下治下制以急又急則氣味厚緩則氣味薄隨其攸利而施之遠近得其宜矣奇方之制大而數少以取迅走於下所謂下藥不以奇偶方之制少而數多以取發散於上所謂汗藥不以偶經曰汗者不可奇下者不以偶處方之制無逾是也然自古諸方歷歲浸遠難可考評惟張仲景方一部最為衆方之祖是以仲景本伊尹之法伊尹本神農之經醫帙之中特其樞要參合古法不越毫

末實乃大聖人之所作也一百一十二方之內
擇其醫門常用者方二十首因以方制之法明
之庶幾小發古人之用心焉

方目

桂枝湯

麻黃湯

大青龍湯

小青龍湯

大承氣湯

大柴胡湯

小柴胡湯

梔子豉湯

瓜蒂散

大陷胸湯

半夏湯

茵陳蒿湯

白虎湯

五苓散

理中湯

四逆湯

真武湯

建中湯

脾約元

抵當湯

嚴氏明理論後集目錄終

嚴氏明理論後集

桂枝湯方

經曰桂枝本為解肌若其人脉浮緊發熱汗不出者不可與之常須識此勿令悞也蓋桂枝湯本專主太陽中風其於腠理緻密榮衛邪實津液禁固寒邪所勝者則桂枝湯不能發散必也皮膚疎湊又自汗風邪干於衛氣者乃可投之也仲景以解肌為輕以發汗為重是以發汗吐下後身疼不休者必與桂枝湯而不與麻黃湯者以麻黃湯專於發汗其發汗吐下後津液內

耗雖有表邪而止可解肌故須桂枝湯小和之也桂味辛熱用以為君必謂桂猶主也宣導諸藥為之先聘是由辛甘發散為陽之義蓋發散風邪必以辛為主故桂枝所以為君也芍藥味苦酸微寒甘草味甘平平者用以為臣佐者內經所謂風淫所勝平以辛佐以苦甘以甘緩之味辛溫大棗味甘溫二物為使者內經所謂風淫於內以甘緩之以辛散之是以薑棗之使者也薑棗味辛甘固能發散而此又不特專於發

散之用以脾主為胃行其津液薑棗之用專行脾之津液而和榮衛者也麻黃湯所以不用薑棗者謂專於發汗則不待行化而津液得通矣用諸方者請熟究之

桂枝

三兩去皮

芍藥

三兩

甘草

二兩炙

生薑

三兩切

大棗

一十二枚擘

右五味㕮咀三味以水七升微火煮取三升去滓適寒溫服一升服已須臾飲熱稀粥一升餘以助藥力溫覆令一時許遍身熱熱似

有汗者益佳不可令如水流離病必不除若
一服汗出病差停後服不必盡劑若不汗更
服依前法又不汗後服小促其間半日許令
三服盡若病重者一日一夜服周時觀之服
一劑盡病證猶在者更作服若汗不出乃服
至二三劑禁生冷粘滑肉麵五辛酒酪臭惡
等物

麻黃湯方

本草有曰輕可去實即麻黃葛根之屬是也實
謂寒邪在表皮腠堅實榮衛勝津液內固之表

實非腹滿便難之內實也聖濟經曰汗不出而
腠密邪氣勝而中蘊輕劑所以揚之即麻黃葛
根之輕劑耳麻黃味甘苦用以為君者以麻黃
為輕劑而專主發散之是以為君也桂枝為臣
者以風邪在表又緩而膚理疎者則必以桂枝
解其肌是用桂枝為臣寒邪在經表實而腠密
者則非佳枝所能獨散必專麻黃以發汗是當
麻黃為主故麻黃為君而桂枝所以為臣也內
經有曰寒淫于內治以甘熱佐以辛苦辛者茲
是數歟甘草味甘平杏仁味甘苦溫用以為佐

使者內經曰肝苦急急食甘以緩之傷寒榮者肝之主也榮勝衛固血脉不利是專味甘之物以緩之故以甘草杏仁為之佐使且桂枝湯主中風又風則傷衛風邪併於衛實而榮弱仲景所謂汗出惡風者此為榮弱衛強者是矣故桂枝湯佐以芍藥用和榮也麻黃湯主傷寒寒則傷榮寒邪併於榮則榮實而衛虛內經所謂氣之所并為血虛血之所并為氣虛者是矣故麻黃佐以杏仁用利氣也若是之論實處方之妙理制劑之淵微該通君子熟明察之乃見功焉

麻黃

三兩
去節

桂枝

二兩
去皮

甘草

一兩
炙

杏仁

七十箇
去皮尖

右四味以水九升先煮麻黃減二升去上沫
內諸藥煮取二升半去滓溫服八合覆取微
似汗不須啜粥

餘如桂枝法將息

大青龍湯

青龍東方甲乙木神也應春而主肝專發生之
令為敷榮之主萬物出甲開甲則有兩歧焉肝
有兩葉以應木葉所以謂之青龍者以發散榮

衛兩傷之邪是應肝木之體耳桂枝湯主中風
麻黃湯主傷寒二者發散之純者也及乎大青
龍湯則不然雖為發汗之劑而所主又不一必
也中風脉浮緊為中風見寒脉是風寒兩傷也
傷寒脉浮緩為傷寒見風脉是風寒兩傷也風
兼寒寒兼風乃大青龍湯專主之也見茲脉證
雖欲與桂枝湯解肌以祛風而不能已其寒則
病不去或欲以麻黃湯發汗以散寒則病仍在
茲仲景所以特處大青龍湯以兩解之麻黃味
辛熱寒則傷榮必以甘緩之風則傷衛必以辛

散之此風寒兩傷榮衛俱病故以甘辛相合而為散發之劑表虛膚緩者則以桂枝為主此以表實腠理密則以麻黃為主是先麻黃後桂枝麻黃為君桂枝為臣也甘草味甘平杏仁味甘苦苦甘為助佐麻黃以發表大棗味甘溫生薑味辛溫辛甘相合佐桂枝以解肌石膏味甘辛微寒風陽邪也寒陰邪也風則傷陽寒則傷陰榮衛陰陽為風寒兩傷則非輕劑所能獨散也必須輕重之劑以同散之乃得陰陽之邪俱已榮衛之氣俱和是以石膏為重劑而又專達

肌表者也。大青龍湯發汗之重劑也。非桂枝湯之所同用之。稍過則又有士陽之失經。曰若脉微弱汗出惡風者不可服。服之則厥逆筋惕。此為逆也。又曰一服汗者停後服。若復服汗當亡陽。遂虛惡風煩躁不得眠也。即此觀之。劑之輕重可見矣。其用湯者宜詳慎之。

麻黃

六兩
去節

桂枝

二兩
去皮

甘草

二兩
炙

杏仁

四枚
去皮尖

生薑

三兩

大棗

十枚
擘

石膏

如雞子
大碎

右七味以水九升先煮麻黃減二升去上沫
內諸藥煮取三升去滓溫服一升取微似汗
出多者溫粉粉之一服汗者停後服若復服
汗多亡陽遂逆一作虛惡風煩躁不得眠也
又溫粉方

白朮 藁本 川芎 白芷 各等分

右搗羅為細末每末一兩入米粉三兩和令
勻粉撲周身止汗無藁本亦得

小青龍湯方

青龍象肝木之兩歧而主兩傷之疾中風見寒

脉傷寒見風脉則為榮衛之兩傷故以青龍湯主之傷寒表不解則麻黃湯可以發中風表不解則桂枝可以散惟其表且不解而又加之心下有水氣知非麻黃湯所以能發而桂枝湯所以能散乃須小青龍湯始可祛除表裏之邪氣耳麻黃味甘辛溫為發散之主表不解應發散之則以麻黃為君桂味辛熱甘草味甘平甘辛為陽佐麻黃表散之用二者所以為臣芍藥味酸微寒五味子味酸溫二者所以為佐者寒飲傷肺咳逆而喘則肺氣逆內經曰肺欲收急食

酸以收之故用芍藥五味子為佐以收逆氣乾薑味辛熱細辛味辛熱半夏味辛微溫三者所以為使者心下有水津液不行則腎氣燥內經曰腎苦燥急食辛以潤之是以乾薑細辛半夏為使以散寒水逆氣收寒水散津液通行汗出而解矣心下有水氣散行則傳不一故又增損之證若渴者去半夏加栝樓根水畜則津液不行氣燥而渴半夏味辛溫燥津液者而去之則津液易復栝樓根味苦微寒潤枯燥者也加之則津液通行是為渴所宜也若微利去麻黃加

芫花水氣下行漬入腸間則為利下利者不可
攻其表汗出必脹滿麻黃專為表散非下利所
宜故去之芫花味苦寒酸苦為湧泄之劑水去
利則止芫花下去水故加之若噎者去麻黃加
附子經曰水得寒氣冷必相搏其人即噎又曰
病人有寒復發汗胃中冷必吐蚘噎為胃氣虛
竭麻黃發汗非胃虛冷所宜故去之附子辛熱
熱則溫其氣辛則散其寒而噎者為當兩相侵
之是以祛散冷寒之氣若小便不利少腹滿者
去麻黃加茯苓水畜在下焦不行為小便不利

少腹滿凡邪客於體者在外者可汗之在內者可下之在上者可湧之在下者可泄之水畜下焦滲泄可也發汗則非所當故去麻黃茯苓味甘淡專行津液內經曰濕淫於內以淡滲之滲溺行水甘淡為所宜故加茯苓若喘者去麻黃加杏仁喘為氣逆麻黃發陽去之則氣易順杏仁味甘苦溫加之以泄逆氣金匱要略曰其形腫者故不內麻黃乃內杏子以麻黃發陽故喘逆形腫標本之疾加減所同蓋其類矣

麻黃去節

芍藥

細辛

乾薑

甘草炙

桂枝各三兩
去皮

五味子半升

半夏洗升

右八味以水一斗先煮麻黃減二升去上沫
內諸藥煮取三升去滓溫服一升

大承氣湯

承順也傷寒邪氣入胃者謂之入府府之為言
聚也胃為水穀之海榮衛之源水穀會聚於胃
變化而為榮衛邪氣入於胃也胃中氣鬱滯糟
粕秘結壅而為實是正氣不得舒順也本草曰

通可去滯洩可去閉塞而不利閉而不通以湯
蕩滌使塞者利而閉者通正氣得以舒順是以
承氣名之王冰曰宜下必以苦宜補必以酸言
酸收而苦泄也枳實味苦寒潰堅破結則以苦
寒為之主是以枳實為君厚朴味苦溫內經曰
燥淫於內治以苦溫洩滿除燥則以苦溫為輔
是以厚朴為臣芒硝味鹹寒內經曰熱淫於內
治以鹹寒人傷於寒則為病熱熱氣聚於胃則
謂之實鹹寒之物以除消熱實故以芒硝為佐
大黃味苦寒內經曰燥淫所勝以苦下之熱氣

內勝則津液消而腸胃燥苦寒之物以蕩滌燥熱故以大黃為使是以大黃有將軍之號也承氣湯下藥也用之尤宜慎焉審知大滿大實堅有燥屎乃可投之也如非大滿則猶生寒極而病不除况無滿實者而結痞氣之屬由是而生矣是以脉經有曰傷寒有承氣之戒古人亦特慎之

大黃

酒洗兩

厚朴

半斤去皮

枳實

炙五枚

芒硝

三合

右四味以水一斗先煮二物取五升去滓內

大黃更煮取二升去滓內芒硝更上微火一兩沸分溫再服得下餘勿服

大柴胡湯

虛者補之實者瀉之此言所共知至如峻緩輕重之劑則又臨時消息焉大滿大實堅有燥屎非駛劑則不能泄大小承氣湯峻所以泄堅滿者也如不至大堅滿邪熱甚而須攻下者又非承氣湯之可投必也輕緩之劑攻之大柴胡湯緩用以逐邪熱也經曰傷寒發熱七八日雖脈浮數者可下之宜大柴胡湯又曰太陽病過經

十餘日反二三下之後四五日柴胡證仍在者
先與小柴胡嘔不止心下急鬱鬱微煩者為未
解也可大柴胡下之則愈是知大柴胡為下劑
之緩也柴胡味苦平微寒傷寒至於可下則為
熱氣有餘應火而歸心苦先入心折熱之劑必
以苦為主故以柴胡為君黃芩味苦寒王冰曰
大熱之氣寒以取之推除邪熱必以寒為助故
以黃芩為臣芍藥味酸苦微寒枳實味苦寒內
經曰酸苦湧泄為陰泄實折熱必以酸苦故以
枳實芍藥為佐半夏味辛溫生薑味辛溫大棗

味甘溫辛者散也散逆氣者必以辛甘者緩也
緩正氣必以甘故半夏生薑大棗為之使也一
方加大黃以黃有將軍之號而功專於蕩滌
不加黃恐難攻下必應以黃為使也用湯
者審而行之則十全之功可得矣

柴胡半斤

枳實四枚

生薑

五兩

黃芩

三兩

芍藥

三兩

半夏

半升

大棗

十二枚

右件七味以水一斗二升煮取六升去滓再

煎溫服一升日三服一方加大黃二兩若不
加恐不名大柴胡湯

小柴胡湯方

傷寒邪氣在表者必漬形以為汗邪氣在裏者
必蕩滌以取利其於不外不內半表半裏又非
發汗之所宜又非吐下之所對是當和解而可
矣小柴胡為和解表裏之劑也柴胡味苦平微
寒黃芩味苦寒內經曰熱淫於內以苦發之邪
在半表半裏則半成熱矣邪氣內餘傳之不可
測迎而奪之必先散熱是以苦寒為主故以柴

胡為君黃芩為臣以成徹熱發表之劑人參味甘平邪氣傳裏則裏氣不治甘以緩之是以甘物為之助故用人參甘草為佐以扶正氣而復也半夏味辛微溫邪初入裏則裏氣逆辛以散之是以辛物為之助故用半夏為佐以順逆氣而散邪也裏氣平正則邪氣不得深入是以三味佐柴胡以和裏生薑味辛溫大棗味甘溫內經曰辛甘發散為陽表邪未已迤邐內傳既未作實宜當兩解其在外者必以辛甘之物發故生薑大棗內為使輔柴胡以和表七物相合兩

解之劑當矣邪氣自表未斂為實乘虛而湊則所傳不一故有增損以禦之胷中煩而不嘔去半夏人參加栝樓實煩者熱也嘔者氣逆也胷中煩而不嘔則氣熱多而氣不逆邪氣欲漸成實也人參味甘為補劑去之使不助熱也半夏味辛為散劑去之以無逆氣也栝樓實味苦寒除熱必以寒泄熱必以苦加栝樓實以通胷中鬱熱若渴者去半夏加人參栝樓根津液不足則竭半夏味辛性燥滲津液物也去之則津液易復人參味甘而潤栝樓根味苦而堅堅潤相

合津液生而渴自己若腹中痛者去黃芩而加芍藥宜通而寒為痛邪氣入裏裏氣不足寒氣壅之則腹中痛黃芩苦寒苦性堅而寒中去之則中氣易和芍藥味酸苦微寒酸性泄而利中加之則裏氣得通而痛自己若脇下痞鞭去大棗加牡蠣內經曰甘者令人中滿大棗甘溫去之則鞭浸散鹹以熯之牡蠣味鹹寒加之痞消而鞭者熯若心下悸小便不利水畜而不行也內經曰腎欲堅急食苦以堅之堅腎則水益堅去黃芩則蓄水浸行內經曰淡味滲泄為陽茯苓

苓甘淡加之則津液通流若不渴外有微熱去人參加桂不渴則津液足去人參以人參為主內物也外有微熱則表證多加桂以取汗發散表邪也若欬者去人參大棗生薑加五味子乾薑肺氣逆則欬甘補中則氣愈逆故去人參大棗之甘五味子酸溫肺欲收急食酸以收之氣逆不收故加五味子之酸生薑乾薑一物也生者溫而乾者熱寒氣內淫則散以辛熱蓋諸欬皆本於寒是相假之以正溫熱之功識諸此者小小變通觸類而長焉

柴胡半斤

黃芩

人參

甘草

生薑

略切

大棗

十二枚

半夏

洗升

右七味以水一斗二升煮取六升去滓再煎
取三升溫服一升日三服

梔子豉湯方

內經曰其高者因而越之其下者引而竭之中
滿者寫之於內其有邪者漬形以為汗其在皮
者汗而發之治傷寒之妙雖有變通終不越此

數法也傷寒邪氣自表而傳裏留於胃中為邪
有高分則可吐之是越之之法也所吐之證亦
自不同如不經汗下邪氣蘊鬱於隔則謂之隔
實應以瓜蒂散吐胃中實邪者也若發汗吐下
後邪氣乘虛留於胃中則謂之虛煩應以梔子
豉湯吐之梔子豉湯吐胃中虛煩者也梔子味
苦寒內經曰酸苦湧泄為陰湧為吐之也湧吐
虛煩必以苦為主是以梔子為君煩為熱勝也
湧熱者必以苦勝熱者必以寒香豉味苦寒助
梔子以吐虛煩是以香豉為臣內經曰氣有高

下病有遠近證有中外治有輕重適其至所為
故依而行之所謂良矣

梔子

枚十學

香豉

絲四裏合

右二味以水四升煮梔子取二升半去滓內
豉更煮取一升半去滓分二服溫進一服得
快吐者止後服

瓜蒂散

華佗曰四日在肯則可吐之此迎而奪之法也
千金曰氣浮上部填塞心肯肯中滿者吐之則
愈此隨證治之法也大約傷寒四五日邪氣客

於胃中之時也加之胃中煩滿氣上衝咽喉不得息者則為吐證具乃可投諸吐藥而萬全之功有之矣瓜蒂味苦寒內經曰濕氣在上以苦吐之寒濕之氣留於胃中以苦為主是以瓜蒂為君赤小豆味酸溫酸苦湧泄為陰分湧隔實必以酸為助是以赤小豆為臣香豉味苦寒以苦湧泄寒以勝熱去上膈之熱必以苦寒為輔是以香豉為使酸苦相合則胸中痰熱湧吐而出矣其於亡血虛家所以不可與者以瓜蒂散為跌劑重亡津液之藥亡血虛家補養則可更

亡津液必不可全用藥君子熟詳究焉

瓜蒂

一分
熬黃

赤小豆

一分

右二味各別搗篩為散以合治之取一錢匕以香豉一合用熱湯七合煮作稀糜去滓湏取汁和散溫頓服之不吐者少少加得快吐乃止諸亡血虛家不可與瓜蒂散

大陷胸湯方

結胸猶邪在胸中處身之高分邪結於是宜若可吐然所謂結者若繫結之結不能分解者也諸陽受氣於胸中邪氣與陽氣相結不能分解

氣不通盤於心下為鞭為痛是邪正因結於胃
中非虛煩隔實之所同是須攻下之物理佐者
舉之高者陷之以平為正結胃為高邪陷下以
平之故治結胃曰陷胃湯甘遂味苦寒苦性泄
寒勝熱雖曰泄熱而甘遂又直達之氣陷胃破
結非直達者不能透是以甘遂為君芒硝味鹹
寒內經曰鹹味下泄為陰又曰鹹以熯之氣堅
者以鹹熯之熱勝者以寒消之是以芒硝為臣
大黃味苦寒大黃將軍也蕩滌邪寇除去不平
將軍之功也陷胃滌熱是以大黃為使利藥之

中此為駛劑傷寒諸惡結皆為甚非此湯則不能通利之大而數少取其迅疾分解結邪此竒方之制也黃帝鍼經曰結雖大由可解也在傷寒之結又不能久非陷胷湯孰可解之矣

大黃

六兩
去皮

芒硝 一升

甘遂

七錢

右三味以水六升先煮大黃取二升去滓內芒硝煮一兩沸內甘遂末溫服一升得快利止後服

半夏瀉心湯

凡陷胃湯攻結也瀉心湯攻痞也氣結而不散
壅而不通為結胃陷胃湯為直達之劑塞而不
通否而不分為痞瀉心湯為分解之劑所謂之
瀉心者謂瀉心下之邪也痞與結胃有高下焉
結胃者邪結在胃中故治結胃曰陷胃湯痞者
留邪在心下故治痞曰瀉心湯黃連味苦寒黃
芩味苦寒內經曰苦先入心以泄之瀉心者必
以苦為主是以黃連為君黃芩為臣以降陽而
昇陰也半夏味辛溫乾薑味辛熱內經曰辛走
氣辛以散之散痞者必以辛為助故以半夏乾

薑為佐以分陰而行陽也甘草味甘平大棗味甘溫人參味甘溫陰陽不交曰痞上下不通為滿欲通上下交陰陽必和其中所謂中者脾胃是也脾不足者以甘補之故用人參甘草大棗為使以補脾而和中中氣得和上下得通陰陽得分水升火降則痞消熱已而大汗解矣

半夏洗升

黃芩

乾薑

人參

甘草

炙各三兩

黃連

一兩

大棗

十二枚擘

右七味以水一斗煮取六升去滓再煎取三升溫服一升日三服

茵陳蒿湯方

王冰曰小熱之氣涼以和之大熱之氣寒以取之發黃者熱之極也非大寒之劑則不能徹其熱茵陳蒿味苦寒酸苦湧泄為陰酸以湧之苦以泄之泄甚熱者必以苦為主故以茵陳為君心法南方火而主熱梔子味苦寒苦入心而寒勝熱大熱之氣必以苦寒之物勝之故以梔子為臣大黃味苦寒宜補必以酸宜下必以苦蕩

滌邪熱必假將軍攻之故以大黃為使苦寒相近雖甚熱大毒必祛除分泄前後復得利而解矣

茵陳蒿

六兩

梔子

十四枚

大黃

二兩
去皮

右三味以水一斗二升先煮茵陳蒿減六升內三味煮取三升去滓分三服小便當利尿如皂莢汁狀色正赤一宿腹減則黃從小便去也

白虎湯方

白虎西方金神也應秋而歸肺熱甚於內者以

寒下之熱甚於外者以涼解之其有中外俱熱
內不得泄外不得發者非此湯則不能解之也
夏熱秋涼暑暍之氣得秋而止秋之令曰處暑
是湯以白虎名之謂能止熱也知母味苦寒內
經曰熱淫所勝佐以苦甘又曰熱淫於內以苦
發之欲徹表熱必苦為主故以知母為君石膏
味甘寒熱則傷氣寒以勝之甘以緩之熱勝其
氣必以甘寒為助是以石膏為臣甘草味甘平
粳米味甘平脾欲緩急食甘以緩之熱氣內餘
消燥津液則脾氣燥必以甘平之物緩其中故

以甘草粳米為之使是太陽中暍得此湯則頓
除之即熱見白虎而盡矣立秋後不可服以秋
則陰氣半矣白虎為大寒劑秋生之時若不能
禁服之而為噦逆不能食成虛羸者多矣

知母六兩

石膏

碎一斤

甘草二兩

粳米六合

右四味以水一斗煮米熟湯成去滓溫服一
升日三服

五苓散

苓令也號令之令矣通行津液剋伐腎邪專為

號令者苓之功也五物之中茯苓為主故曰五
苓散茯苓味甘平甘雖甘也終歸甘淡內經曰
甘味滲泄為陽利大便曰攻下利小便曰滲泄
水飲內畜當須滲泄之必以甘淡為主是以茯
苓為君猪苓為臣白朮味甘溫脾惡濕水飲內
畜則脾氣不治益脾勝濕必以甘為助故曰白
朮為佐澤瀉味鹹寒內經曰鹹味下泄為陰泄
飲導溺必以鹹為助故以澤瀉為使桂味辛熱
腎惡燥水畜不行則腎氣燥內經曰腎惡燥急
食辛以潤之散濕潤燥可以桂枝為使多飲煖

水令汗出愈者以辛散水氣外泄是以汗潤而解也

猪苓

十八銖
去皮

澤瀉

六銖
兩

白朮

十八銖

茯苓

同上

桂枝

半兩
去皮

右五味搗為散以白飲和服方寸匕日三服
多飲煖水汗出愈如法將息

理中元方

心肺在膈上為陽腎肝在膈下為陰此上下藏
也脾胃應土處在中州在五藏曰孤藏居三焦

曰中焦自中焦獨治在中一有不調此丸專治
故名曰理中元人參味甘溫內經曰脾欲緩急
食甘以緩之緩中益脾必以甘為主是以人參
為君白朮味甘溫內經曰脾惡濕甘勝濕溫中
勝濕必以甘為助是以白朮為臣甘草味甘平
內經曰五味所入甘先入脾脾不足者以甘補
之補中助脾必先甘劑是以甘草為佐乾薑味
辛熱喜溫而惡寒者胃也胃寒則中焦不治內
經曰寒淫所勝平以辛熱散寒溫胃必先辛劑
是以乾薑為使脾胃居中病則邪氣上下左右

無病不知故又有諸加減焉若臍下築者腎氣動也去白朮加桂氣壅而不泄則築然動白朮味甘補氣去朮則氣易散桂辛熱腎氣動者欲作奔豚也必服辛味以散之故加桂以散腎氣經曰以腎能泄奔豚氣故也吐多者去朮加生薑氣上逆者則吐多朮甘而壅非氣逆者之所宜也千金曰嘔家多服生薑此為嘔家聖藥生薑辛散是於吐多者加之下多者還用朮氣泄而不收則下多朮甘壅補使正氣收而不泄也或曰濕勝則濡泄朮專除濕是於下多者加之

右四味搗篩蜜丸如雞子黃許大以沸湯數合和一丸研碎服之日三四夜二服

四逆湯方

四逆者四肢逆而不溫也四肢者諸陽之本陽氣不足陰寒加之陽氣不相順接是致手足不溫而成四逆此湯中發陽氣却散陰寒溫經煖肌是以四逆名之甘草味甘平內經曰寒淫于內治以甘熱却陰扶陽必以甘為主是以甘草為君乾薑味辛熱內經曰寒淫所勝平以辛熱逐寒正氣必先辛熱是以乾薑為臣附子味辛

大熱內經曰辛以潤之開發腠理致津液通氣也暖肌溫經必憑大熱是以附子為使此奇制之大劑也四逆屬少陰少陰者腎也腎肝位遠非大劑則不能達內經曰遠而奇耦制大其服此之謂也

甘草

二兩

乾薑

半兩

附子

一枚生用去皮咀八片

右三味以水三升煮取一升二合去滓分溫再服強人可大附子一枚乾薑三兩

真武湯方

真武北方水神也而屬腎用以治水焉水氣在心下外帶表而屬陽必應發散故治以真武湯青龍湯主太陽病真武湯主少陰病少陰腎水也此湯可以之和之真武之名得矣茯苓味甘平白朮味甘溫脾惡濕腹有水氣則脾不治脾欲緩急食甘以緩之滲水緩脾必以甘為主故以茯苓為君白朮為臣芍藥味酸微寒生薑味辛溫內經曰濕淫所勝佐以酸辛除濕正氣是用芍藥生薑酸辛為佐也附子味辛熱內經曰寒淫所勝平以辛熱溫經散濕是以附子為使也

水氣內漬至于散則所行不一故有加減之方
焉若欬者加五味子細辛乾薑欬者水寒射肺
也肺氣逆者以酸收之五味子酸而收也肺惡
寒以辛潤之細辛乾薑辛而潤也若小便利者
去茯苓茯苓專滲泄也故若下利者去芍藥加
乾薑酸之性泄去芍藥以酸泄也辛之性散加
乾薑以散寒也嘔者去附子加生薑氣上逆則
嘔附子補氣生薑散氣兩不相損氣則順矣增
損之功非大智孰能貫之

茯苓 三兩

白朮 二兩

芍藥 三兩

生薑 三兩

附子

一枚
臍破
泥去皮
作八片

右五味以水八升煮取三升去滓溫服七合
日三服夜二服

建中湯方

內經曰肝生於左肺藏於右心位在上腎處在下左右上下四藏居焉脾者土也應中央處四藏之中為中州治中焦生育榮衛通行津液一有不調則榮衛失所育津液失所行必以此湯溫建中藏是以建中名焉膠飴味甘溫甘草味

甘平脾欲緩急食甘以緩之建脾者必以甘為主故以膠飴為君甘草為臣桂辛熱辛散也潤也榮衛不足潤而散之芍藥味酸微寒酸收也泄也津液不逮收而行之是以桂芍藥為佐生薑味辛溫大棗味甘溫胃者衛之源脾者榮之本黃帝鍼經曰榮出中焦衛出上焦是矣衛為陽不足者益之必以辛榮為陰不足者補之必以甘辛甘相合脾胃建而榮衛通是以薑棗為使或謂桂枝湯解表而芍藥數少建中湯溫裏而芍藥數多殊不知二者遠近之制皮膚之邪

為近則制小其服也桂枝湯芍藥佐桂枝以發散非與建中同體尔心腹之邪為遠則制大其服也建中湯芍藥佐膠飴以建脾非與桂枝同用尔內經曰近而奇耦制小其服遠而奇耦制大其服此之謂也

膠飴一升

甘草二兩

桂枝三兩

芍藥六兩

大棗一十二枚

生薑三兩

右六味以水七升煮取三升去滓內膠飴更上微火消解溫服一升日三服嘔家不用

建中湯以甜故也

脾約元方

約者結約之約又約束之約也內經曰飲入于胃遊溢精氣上輸於脾脾氣散精上歸于肺通調水道下輸膀胱水精四布五經並行是脾為胃行其津液者今胃強脾弱約束津液不得四布但輸膀胱致小便數而大便鞭故曰其脾為約麻仁味甘平杏仁味甘溫內經曰脾欲緩急食甘以緩之麻仁杏仁潤物也本草曰潤可去枯腸胃乾燥必以甘潤之物為之主是以麻仁

為君杏仁為臣枳實味苦寒厚朴味苦溫潤燥者必以甘甘以潤之破結者必以苦苦以泄之枳實厚朴為佐以散脾之結芍藥味酸微寒大黃味苦寒酸苦湧泄為陰芍藥大黃為使以下脾之結燥腸潤結化津液還入胃中則大便利小便少而愈矣

麻子仁 二兩

杏仁

一升去皮尖熱作脂

枳實

半斤

厚朴

一尺炙去皮

芍藥

半斤

大黃

一斤去皮

右六味蜜和丸桐子大每服十丸日三服漸

加以知為度

抵當湯方

人之所有者氣與血也氣為陽氣流而不行則易散以陽病易治故也血為陰血畜而不行者則難散以陰病難治故也血畜於下非大毒駛劑則不能抵當其甚邪故治畜血曰抵當湯水蛭味鹹苦微寒內經曰鹹勝血血畜於下勝血者必以鹹為主故以水蛭為君蟲蟲味苦微寒苦走血血結不行破血者必以苦為助是以蟲蟲為臣桃仁味苦甘平肝者血之源血聚則肝

氣燥肝苦急急食甘以緩之散血緩肝是以桃
仁為佐大黃味苦寒濕氣在下以苦泄之血亦
濕類也蕩血逐熱是以大黃為使四物相合而
方劑成病與藥對藥與病宜雖苛毒重疾必獲
全濟之功矣

水蛭 三十枚

蝨蟲

翅三十箇去
足熱去

桃仁

三十枚
去皮尖

大黃

三兩去
皮酒浸

右四味搗如麻豆大以水五升煮取三升去
滓溫服一升未利再服

嚴氏明理論後集終

千金寶要

江蘇古籍出版社



四庫未收書提要

擘經室外集卷二

千金寶要六卷提要

唐孫思邈原本宋郭思采錄刻石案舊唐書思邈本傳止載千金方三十卷葉夢得避暑錄語稱其作千金方時已百餘歲後三十年又作千金翼方郡齋讀書志書錄解題並載兩書云各三十卷今俗間傳本千金翼方九十三卷兩書淆溷不復可別不知何人所定也郭思刻石在宋宣和間其所依據當是思邈原本刻石在華州公署明正統景泰間又重刻石本又有本刻本至隆慶時耀州真人祠復有石刻案酉

陽雜俎謂昆明池龍宮有仙方三十首思邈以療龍疾得之乃著千金方三十卷每卷置一仙方信為方書中之最可寶貴者書中稱痘瘡為小兒丹毒卽元人奇効良方所謂痘疹也或謂此疾出自近代者殆不可從今從石本錄副以備唐人方書之厓畧云

此書初得華州石刻舛訛最多繼得華州木刻及蜀中及郭武定木刻其訛猶華之石刻也其門類錯亂者茲皆類明拾遺一段茲皆附之各類小兒兩類併而為一為其便于檢閱也其間有字句之謬可以意會者乃敢更之中有文字高古不能讀者不敢輒易乃仍舊焉自千金論起至若有所舉重段止似欲人知所避忌也自五勞七傷有小腹急痛起至婦人新產上廁段止既無治法又無令人避忌之意自五勞段數至第二十二段中有凡是病者皆須服之之句後淋閉論末又云悉服之立驗或亦萬病玉壺各有所主也因併及之

委官李海立

生員謝沾書

祔羽鄒鳳臯刻

千金寶要目錄

婦人第一

小兒第二

中毒第三

飲食中毒第四

解百藥毒第五

蛇蝎等毒第六

喉痺金瘡第七

瘡疽癰腫第八

霍亂吐瀉第九

虎犬馬傷第十

針折入肉附

舌耳心目等大小便第十一

中風大風水氣第十二

瘧痢癥等第十三

頭風吐逆第十四

疫瘴濁淋第十五

頭面手足癰瘰瘡漏第十六

痔第十七

論

千金須知

千金寶要目錄終

千金寶要卷之一

婦人第一

妊娠難產燒車軋脂內酒中服亦治腹中痛并欬嗽
妊娠忽苦心腹痛燒鹽令赤熱三指撮酒服之立產
又方吞槐子二七箇

又方菟絲子或車前子以酒或米汁服方寸匕即生
又方水或酒服家中黑塵

子死腹中及小難橫生倒生難生者半夏白斂各二
兩末之服方寸匕亦可加代赭瞿麥各二兩佳小
難一服橫生二服倒生三服子死四服

又方榆白皮細切煮三升服之

子死衣不出上搶心者急取蟻垤土三升熬之令熱
囊盛熨心良

又方末竈突中墨三指撮水或酒服之

乳無汁者土瓜根末之一服半錢匕日三

衣不出及橫生逆生者小麥小豆煮濃汁飲立出

產三日不出者燒大刀鏤以酒一盞沃之頓服

又方燒藥杵令赤內酒中飲之救死不分挽者

產乳暈絕者製了半夏一兩末之丸如大豆內鼻孔

中愈

又方神麴末水服方寸匕

又方含醢醋喫面

子死腹中牛屎塗母腹上立出

胎死腹中服水銀三兩立出

未足月而胎死者以苦酒濃煮大豆一服一升死胎立出

妊娠時疾子不下竈中黃土水或酒或泔清調塗臍方寸乾再上

又方酒服車轄脂

又方菹白一把水三升煮熟食菹令盡亦安胎胎死者即出

妊娠中蠱燒敗鼓皮酒服方寸匕

妊娠傷寒菹白十莖生薑二兩切水三升煮去半服

取汗

產後血不盡煩悶搗生藕取汁飲二升良
產後腹脹痛者煮黍粘根為飲一服即愈

五色帶下者煮鰾帶汁服一盃良

月水不斷灸內踝下白肉際青脉上隨年壯

又方服地黄酒良或大豆服亦佳

月水不利及無子灸四滿三十壯穴在丹田兩邊相
去各一寸半丹田在臍下二寸

漏下積年因篤者取鵲重巢燒灰末之服方寸匕日
三服三十日愈重巢者連二年鵲產其上者是

產後月水往來多少不定或不通痛小腹急腰身重

白馬尿一升服之良

逆生橫生者竈下黃土三指撮酒服立出

小兒第二

凡小兒生下不啼者取兒臍帶向身却將之仍呵之
百度亦可以菰白鞭之

浴新生兒以猪膽一箇汁入湯中令兒無瘡疥

小兒生輒死者便覷兒口中懸癰前上脣有胞者急
以指摘取頭決令潰去血勿令血入咽入咽即殺
兒慎之

小兒臍不合燒蜂房灰末傅之

小兒中風口噤雀屎如麻子丸之飲下即愈

小兒生三日內朱蜜多則生陰癰朱蜜三日內通得用
三豆許朱蜜後與牛黃亦三豆許除兒百病牛黃
後可與米飲研米作厚飲如豆大與兒三豆許止
日二七日後方哺乳

小兒解顱熬蛇脫皮末之和猪頰車中髓傳頂上日
三四

小兒肚皮卒然青黑以酒和胡粉傳上若不急治須
臾便死

又方灸臍左右上下各半寸並鳩尾骨下一寸凡五
處各三壯

小兒暴脹欲死半夏隨多少微炮之為末酒丸如粟

米大日三

小兒丹毒搗慎火草絞取汁塗之

小兒赤遊腫若徧身入心腹殺人搗伏龍肝為末以雞子白和傅之乾易之

又方白豆末水和傅之勿令乾

又身赤腫起者熬米粉令黑以唾和傅之

小兒傷寒發黃搗土瓜根汁三合服之

又方搗青麥汁服之

又方搗韭根汁澄清滴兒鼻中如大豆許即出黃水差

小兒霍亂研尿滓乳上服之

又方牛涎灌口中一合

小兒客忤吞麝香大豆許立愈

又方以母月衣覆兒上大良

又方取牛鼻津服之

又方取牛口沫傅乳頭飲之

又方取熟馬屎一九絞取汁飲兒下便愈亦治嘔啼
面青腹強者

小兒誤吞針取磁石如棗核大吞之或含之其針立
出

誤吞鐵物等艾蒿一把剉以水五升煮取一升半服
之即下

誤吞髮亂髮燒灰酒服一錢

吞錢艾蒿五兩以水五升煮取一升頓服之即下
又方末火炭酒服方寸匕水服亦得

又方服蜜二升即出

吞金銀釵鏤白糖二斤一頓漸漸食之多食益佳
又方吞水銀一兩再服之

吞鏤及指強燒鴈毛二七箇末服鵞毛亦得

吞釵暴韭令萎蒸熟勿切食一束即出或生麥葉筋
縷如韭法皆可用但力意多食自消

吞銅鐵而哽燒銅弩牙令赤內酒中飲之立愈
吞釘針及箭簇等但多食脂肥肉令飽自裹出

吞針取懸針磁石末飲服方寸匕即下

小兒尿竈丹初起兩股入臍陰頭皆赤者水二升桑皮切二升煮取汁浴之良

又方燒李根為灰以田中流水和傅之良

小兒朱田火丹一日夜即成瘡先從背漸徧身如棗大赤者濃煮棘根洗之已成瘡者赤小豆末傅之

小兒野火丹徧身皆赤者用油塗之

小兒茱萸丹初起背徧身如纈一宿成瘡者煮赤小豆作末以傅之

小兒廢竈火丹初起足趺正赤色者以棗根煮汁沐浴五六度自愈

小兒風瘙隱疹心迷悶巴豆二兩以水七升煮取三升故帛染汁拭之大人加減用之

又方礬石二兩末之酒三升清令消帛染拭病上

又方吳茱萸一升酒五斤煮取一升半帛拭病上

小兒隱疹入腹體強舌乾蕪菁子末酒服方寸匕日

三

又方蚕沙二升水二升煮去渣洗之

又方鹽湯洗了以蓼子按傳之

又方車前子作末傳之

諸丹毒渠中藻菜細切熟搗傳丹上厚三分乾易之

又方芸薹菜熟搗厚封之隨手即消如餘熱氣未愈

但三日內封之使醒醒好差止

五色油丹縛母猪枕頭卧之良

又方牛屎塗之乾則易之

赤流腫搗火麻子水和傅之

又方以羊脂煎了磨之赤黑丹起徧身者殺人

小兒瘡初起燥漿似火瘡熟搗桃仁以麴脂和傅之
亦治徧身赤腫

小兒身體頭面生瘡榆白皮隨多少暴令乾末之醋
和塗縣以傅瘡上虫自出

小兒丹毒馬齒莧一握搗取汁飲之以滓傅之

又方搗赤小豆五合水和取汁飲之一合良滓塗五

心

又方濃煮大豆汁塗之良差亦無癥痕

又方臘月猪脂和釜下土傳之乾則易之

小兒五色丹搗薊葉傳之

又方薤白一把鼓一升以水三升煮取二升分三服

又方柏葉一升麻子末一升以水五升煮三沸百日

兒每服三合

又方搗石榴汁服之

又方亂髮灰鹿角灰等分三歲兒以水和服三錢匕

日二

小兒赤白痢單服生地黃汁一合

小兒熱痢煮木瓜葉飲之

小兒冷痢蓼菜搗汁量大小飲之一作芥菜

又方搗蒜傳兩足下

小兒暴痢赤小豆末酒和塗足下日三油和亦得

小兒蠱毒痢藍青汁一升二合分為四服飲之

小兒渴痢搗木瓜汁飲之

小兒頭不生髮楸葉搗汁傳之

小兒瘰癧冢中石灰厚傳之

小兒浸淫瘡以竈下黃土髮灰等分末之以猪脂和

傳之

小兒疥瘡以臭酥和胡粉傳之

小兒濕癬煎馬尿洗

小兒斑瘡入眼浮萍陰乾為末以生羊子肝半箇入
盞內以杖子刺碎沒水半合絞取肝汁食後調下
不甚者一服已傷目者十服見効大人亦可用

小兒赤熱腫目川大黃白礬朴硝等分為末冷水調
作掩子貼目上

小兒重舌腫起舌下以朴硝研水敷咽喉外其內用
成塊者含涎出乃平

又方地蜉虫和薄荷研汁帛包蘸舌下腫起重舌
極證用指去爪先于舌下筋上擦至根漸深深擦如
此三次又用指蘸水取項後燕窠小坑中筋自下

趕下至小窟深深擦入三次小兒若飲乳勝前則病去矣

小兒禿瘡及惡瘡以苦練皮燒灰以豬脂調傳大人惡瘡亦可用

小兒卵腫偏墜防風牡丹皮等分為末每服二錢匕溫酒調服鹽湯亦可

小兒卒客忤以竈中黃土蚯蚓糞等分研細水調塗兒頭上及五心良

又方米粉鹽等分炒變色腹上摩之

小兒頭瘡經年不差者取屋塵末和油瓶下滓以皂角湯洗傳之

小兒頭瘡胡粉一兩黃連二兩末之洗瘡去痂拭乾
傅之即差再發再傅之

禿瘡葶藶子細末先洗傅之

小兒惡瘡熬豉令黃末之傅瘡上不過三傅愈

小兒手足及身腫者以小便溫煖漬之即愈

又方巴豆五十枚去心皮以水三升煮取一升以絲
內湯中拭病上隨手消并治隱疹

小兒脫肛灸頂上旋毛中三壯即入

又方灸尾翠骨三壯

又方灸臍中隨年壯

小兒疳瘡嚼麻子傅之日六七度

小兒濕瘡濃煮地榆汁洗浴日兩度

小兒尿血燒鵲巢灰并花水服之亦可治尿牀

小兒解顱猪牙頰車髓傳顱上差

小兒風瘙隱疹牛膝末酒服方寸匕漏瘡多年不差搗末傅之亦治骨疽癰疾瘰癧絕妙

小兒胎寒嘔啼驚癇腹脹不嗜食大便青黃并大人虛冷或有實不可吐下者馬齒礬一斤燒半日以棗膏和大人服如梧子二丸日三小兒以意減之以腹內溫為度

小兒五色丹猪槽下爛泥傅之乾則易之以愈為度又方服黃龍湯二合并傅瘡上

小兒赤丹芸臺葉汁服三合滓傳上

小兒赤丹斑駁唾和胡粉從外向內傳之良

又方煨鐵屎為末以豬脂和傳之

又方屋塵以臘月豬脂和傳之

小兒火丹赤如朱走皮中酢和鼓研傳之即愈

又方搗荏子傳之

又方猪尿水和絞取汁服少許

小兒天火丹赤如丹大如手徧身或痛或癢生麻油

塗之

小兒火丹其瘡見骨者搗小蒜厚封之着足踝者是

小兒殃火丹每着兩脇及腋下者伏龍肝末和油傳

之乾則易之若入腹及陰則以慎火草取汁服之
小兒夜啼不已醫所不治者取狼糞中骨燒作灰末
水服如黍米大二枚其啼即已

又方取馬骨燒灰傅乳上飲兒即止

小兒吐痢燒特猪屎水解取汁少少服之良

小兒大小便不通灸口兩吻各一壯

又方搗白花胡葵子末煮汁服之

又方雞屎白服一錢匕

又方灸臍下一寸三壯又灸橫紋百壯又灸口兩吻

各一壯

小兒溫瘧鹿角末先發時便服一錢匕

又方灸兩乳下一指三壯

小兒洞注下痢蒺藜子二升搗汁溫服以差為度

又方木瓜搗汁飲之

又方炒倉米末飲服之

又方酸石榴燒灰服半錢匕日三

又方炒豉令焦水淋汁服之神驗冷則酒淋服

小兒赤白帶下薤白一把豉一升以水三升煮取一升分三服

又方柏葉一升麻子末一升以水五升煮取三沸百日兒每服三合

又方搗石榴汁服之

又方亂髮灰鹿角灰等分三歲兒以水和服三錢匕
二

中毒第三

凡卒死無脈無佗形候牽牛臨鼻上二百息牛舐必
差牛不肖舐鹽汁塗面上即牛肖舐

又方牛馬屎絞取汁飲之無新者水和乾者亦得一
法以人溺解之

又方灸熨斗熨兩脇下又治尸厥

魘死慎燈火勿令手動牽牛臨其鼻上即覺

又方搗韭汁灌鼻孔中劇者灌兩耳一云灌口中
鬼魘不悟末伏龍肝吹鼻中

又方末皂角少大豆許吹鼻中嚏則氣通起死人亦
治中惡

又方灸兩足大指叢毛中二七壯亦救卒死中惡
中惡菖心黃刺鼻孔中血出愈一云入七八寸無苦
使目中血出差一云男左女右

又方使人尿其面上愈

中惡并蠱毒冷水調伏龍肝如雞子大服之必吐
又方溫二升猪肪頓服之

又方車軋脂如雞子大酒服之

又方中惡灸胃管五十壯愈

卒忤中惡也鹽八合以水三升煮取一升半分二服

得吐即愈若小便不通筆頭七枚燒作灰末水調服即通

又方犢子屎半盞酒三升煮服之亦治霍亂一云治鬼擊又云大牛尿亦可用

又方書墨末之水服一錢匕

又法卒忤死灸手十指爪下各三壯又灸人中三壯又灸肩井百壯又灸間七壯又灸巨闕百壯

卒中鬼擊及刃兵傷血漏腹中煩滿欲絕雄黃粉酒服一刀圭一日三服血化為水

鬼擊之狀卒着人如刀刺胸腹絞痛或吐血或口鼻血出或下血雞屎白如棗大青花麻一把以酒七

升煮取三升熱服須臾發汗不汗熨斗盛火炙兩肋下熱汗出愈

又方艾如雞子大三枚以水五升煮取二升頓服
又方吹酢少許鼻中

救自縊死極須按定其心勿截繩徐徐抱解之心下尚溫者以氈氍覆口鼻兩人吹其兩耳立活

又方僵卧以物塞兩耳竹筒內口中使兩人痛吹之塞口傍勿令氣出半日死人即噫噫即勿吹也

又方搗皂角細辛屑如胡豆大吹之兩鼻中

又方搗藍青汁灌之

又方刺雞冠血出滴之口中即活男雌女雄

又方雞血塗

又方雞屎白如棗大酒半盞灌口及鼻中佳

又方菹葉吹臑角末兩鼻中逆出更吹乃可

又方梁上塵如大豆各內一小竹筒子中西人各捉一筒同時吹兩耳兩鼻中即活

又方尿鼻口眼耳中并捉頭髮如筆管大一撮掣之立活

又方自縊死灸四肢大節陷大指本文名曰地神各七壯

熱暈着熱死者取道上熱塵以壅心上若少冷即易氣通即止

又方仰卧喝人熱土壅臍上令人尿之臍中溫即愈
又方可飲熱湯亦可內少乾薑橘皮甘草煮飲之稍
稍咽勿使飽但以熱土及熬灰土壅臍上佳

又方濃煮蓼取汁三升飲之即愈如不愈再飲
又方地黃汁一盞即愈

又方水半盞和麴一大抄服之

又方張死人口令通以暖湯徐徐灌口中小舉死人
頭令湯入腹須臾即蘇

又方灌地漿一盞即愈

又方使人噓其心令暖易人為之

又方抱狗子或雞著心上熨之

又方屋上南畔瓦熱慰心冷易之

救落水死者以竈中灰布地令厚五寸以甑側著灰上令死人伏于甑上使頭少垂下抄鹽二方寸匕內竹管中吹下孔中即當吐水水下因去甑下死人着灰中壅身使出鼻口即活

又方掘地作坑熬數斛灰內坑中下死人覆灰溼徹即易之勿令大熱燂人灰冷更易半日即活

又方取大甑傾之死人伏其上令死人口臨甑口然葦火二七把燒甑中當死人心下令煙出小入死人鼻口中鼻口中水出盡則活火盡則復益之常以手候死人身及甑勿令甚熱當令火氣能使死

人心下足得暖卒無甌者于岸側削地如甌空下如竈燒令暖以死人着上亦可用車轂為之勿令隱其腹令死人低頭水得出并炒灰數斛令暖以粉身溼更易溫者

又方但埋死人暖灰中頭足俱沒惟開七孔

又方倒懸死人以好酒灌鼻中又灌下部又醋灌鼻亦得

又方繇裹阜角内下部中須臾水出

又方裹石灰内下部中水出盡則活

又方熬沙覆死人面上下有沙但出鼻口耳沙冷溼即易

又方倒懸解去衣去臍中垢極吹兩耳起廼止

又方竈中灰二石埋死人從頭至足出七孔即活

又方屈兩脚着生人兩肩上死人背向生人背即負持走行吐出水便活

又方落水死解死人衣灸臍中凡落水經一宿猶可活

冬日落水凍四肢直口噤有微氣者以大器中熬灰使暖盛以囊薄其心上冷即易心暖氣通目得轉口廼開可溫尿粥稍稍吞之即活若不先溫其心便持火灸身冷氣與火爭即死

卒中惡風心悶煩毒欲死者急灸足大指下橫文隨

年壯即愈

上件病若筋急不能行者內踝筋急灸內踝上四十壯外踝筋急灸外踝上三十壯立愈

卒中惡風眼戴睛灸目兩眥後二七壯

上件病若不識人者灸季肋頭七壯

卒中惡心痛苦參三兩呔咀以好酢一升取八合強人頓服老小二服

又方桂心八兩呔咀以水四升煮取一升半分作二服

飲食中毒第四

凡諸食中毒飲黃龍湯及犀角汁無不治也飲馬尿

亦良

又方食百物中毒掘地坑中著水取以飲之

又方含貝子一枚須臾吐食物差

又服生韭汁數升亦得

中毒煩悶苦參三兩咬咀以酒二升半煮一升頓服之取吐愈

食六畜肉中毒各取六畜乾屎末水服之佳

食自死六畜肉毒服黃蘗末方寸匕須臾復出

又方燒小豆一升末服三方寸匕

又方水服竈底黃土方寸匕

食生肉中毒掘地深三尺取下土三升以水五升煮

土五六沸取上清飲一升立愈

食牛肉中毒狼牙灰水服方寸匕一作猪牙

又方溫湯服猪脂良

又方水煮甘草汁飲之

食馬肉血洞下欲死豉二百枚杏仁二十枚咬咀蒸之五升米下飯熟搗之再服令盡

又方蘆根汁飲以浴即解

食猪肉中毒燒猪屎末服方寸匕犬屎亦佳

食百獸肝中毒頓服猪脂一斤佳

食陳肉毒方同上

食馬肝中毒北鼠屎二七枚兩頭尖者是以水研飲

之不差更作

食野菜馬肝肉諸脯肉毒取頭垢如棗核大吞之可起死人

又方燒狗屎灰水和絞取汁飲之立愈

又方燒猪骨末之水服方寸匕日三

茅屋漏水沾脯上有毒搗韭汁服之良大豆亦得

肉閉在密器中者名鬱肉有毒燒狗屎末水服方寸

匕凡生肉熟肉皆不藏蓋不泄氣皆殺人又肉汁

在器中密蓋氣不出亦殺人

脯在黍米中有毒麴一兩水一升鹽兩撮煮服之

食中射罔脯毒末貝子水服如豆佳不差又服

食餅臙中毒方同上

以肉作餅臙食多吐下服犀角末方寸匕甚良

食鵝鴨肉成病胸滿面赤不下食者服秫米泔大良
食中魚毒煮橘皮湯停極冷飲之其效甚大

食中魚毒及中鱸魚毒剉蘆根舂取汁多飲良亦可
取蘆葦茸汁飲之

蟹毒方同上又冬瓜汁服二升亦可食冬瓜

山中木菌毒人尿汁服一升良

食魚膾不消燒魚鱗水服方寸匕

食諸鮑魚中毒方同上

食牛馬肉中毒飲人乳汁良

酒病豉菰白各一升以水四升煮取二升頓服之
飲酒中毒煮大豆三沸飲汁三升

又方酒漬乾栴汁服之

酒醉不醒葛根汁一斗三升飲之取醒止又治大醉
連日煩毒不堪

千金寶要卷之一終

千金寶要卷之二

解百藥毒第五

凡解百藥毒甘草薺芫大小豆汁藍汁藍實汁藍根汁並解

雄黃毒防已解

礬石毒大豆汁解

金銀毒服水銀數兩即出鴨屎解水和雞屎汁煮菹汁並解

鐵粉毒磁石解

防葵毒葵根汁解

桔梗毒白粥解

甘遂毒大豆汁解

芫花毒防已防風甘草桂汁並解

大戟毒菖蒲汁解

蜀椒毒葵子汁桂汁豉汁人尿冷水土漿蒜雞毛燒
吸煙及水調服解

斑猫芫青毒猪脂大豆汁或鹽藍汁鹽湯煮猪骨並
解

馬刀毒清水解

杏仁毒藍子汁解

野芋毒土漿人糞汁解

諸菌毒掘地作坑以水沃中攪之令濁澄清飲之名

地漿解

解鴆毒及一切毒藥不止者甘草蜜四兩梁米粉一升以水五升煮甘草取二升去滓歇大熱內粉湯中攪令勻調內白蜜更煮令熟如薄粥適寒溫飲一升最佳

解一切毒母猪屎水和服之又水三升三合和米粉飲之

野葛毒已死口禁者取青竹去兩節柱兩肋臍上內冷水注之暖即易之須臾口開即服藥立活惟須數易水

石藥毒白鴨屎人參汁並解

食茱萸悶亂如卒中風者飲甘草汁藍青汁即愈
中鉤吻毒欲死者薺芫八兩咬咀以水六升煮取三
升冷如人體服五合日三夜二凡煮薺芫惟濃佳
又方煮桂汁飲之

又方噉芫涕

諸毒方同上

中蠱蝥根蘘荷根各三兩咬咀以水四升煮取二升
頓服

又方槲樹北陰白皮一大握長五寸水三升煮取一
升空腹服即吐虫出

中蠱下血方同上

諸熱毒或蠱毒口鼻血出取人屎七枚燒作火色
置水中研之頓服即愈亦解百毒時氣熱病之毒
服已溫覆取汗勿輕此方極神驗

諸服藥過劑悶亂者飲藍汁水和胡粉地漿蘘荷汁
水和芎粉粳米瀋乾羌黃連飴糖豉汁並解

瘡中水毒炭白灰胡粉等脂調塗瘡孔上水出則痛
止

瘡中水腫方同上

卒刺手足中水毒搗韭及藍青置上以火灸熱微即
愈

破傷風腫厚塗杏仁膏然麻燭遙灸之

蛇蝎毒等第六

凡蛇毒消蠟注瘡上不差更消注之又以母猪耳中
垢傳之牛耳垢亦可

蝮蛇毒令婦人尿瘡上

又方令婦人騎度三過又令坐上

又方末羗薄之乾則易

又方以射罔塗腫上血出即愈

又方生麻楮葉合搗以水絞去滓漬之

衆蛇毒乾羗雄黃等分末和射罔着竹筒中有急用
之

又方雄黃末傅瘡上日一

又方用銅青傳瘡上

又方搗大蒜和胡粉傳之

又方雞屎二七枚燒作灰投酒服之

又方以麴圍上令童男尿其中燒鐵令赤投中冷復燒着二三度差

又方口嚼大豆葉塗之

又方猪脂和鹿角灰塗之

又方鹽四兩水一斗煮十沸定以湯浸冷易之

又方搗紫莧取汁飲一升以滓封瘡以少水灌之

又方梳中垢如指大長一寸尿和傳之

又方炙梳汗出熨之

又方取合口椒胡荽苗等分搗傅之無不差

又方灸螫處三七壯無艾以火頭稱瘡孔大小熱之蛇啣人屎厚塗帛裏即消

睡中蛇入口挽不出以刀破蛇尾内生椒三兩枚裹着須臾即出

又方艾灸蛇尾即出

又方以刀周匝割蛇尾截令皮斷仍將皮倒脫即出蛇入口並七孔者割母猪尾頭瀝血着口即出

又方以患人手中指等截三歲大猪尾以器盛血傍蛇瀉血口中拔出之

卒為蛇繞不解以熱湯淋之

又方令人尿之

蛇蝎螫服小蒜汁滓傳上

又方熟搗葵取汁服

又方取齒中殘飯傳之

又方猪脂封之

又方射罔封之

又方碓砂和水塗上立愈

又方若着手足冷水浸水微暖則易之着餘處冷水浸故布揅之小暖則易

又方生烏頭末唾和傳之

射工毒不治七日能殺人鬼白葉一把內苦酒中漬

之熟搗絞汁服一升日三為妙

又方取生吳茱萸莖葉一握斷去前後握中熟搗以水二升煮取七合頓服之立愈

又方取葫切貼瘡灸七壯

又方赤莧菜搗絞取汁一服一升日四五服

又方白雞屎取白頭者三枚湯和塗中毒

已有瘡者取芥子熟搗苦酒和厚塗瘡上半日痛便止

又方取狼牙葉冬取根搗之令熟□□中處又飲汁四五合

蚰蜒入耳炒胡麻搗之以葛袋盛傾耳枕之即出

又方以牛酪灌之滿耳即出出口口消若入腹中空
腹食好酪一二升即化為黃水而出不盡更服于
真人自云手用神効

水毒凡山水有毒虫人涉水中人似射工而無物其
診法初得之惡寒微似頭痛目眊疼心中煩懊四
肢煖腰背百節皆強兩膝痛或翕翕而熱但欲睡
旦醒暮劇手足逆冷至肘膝一三日腹中生虫食
人下部肛中有瘡不痛不癢令人不覺不急治過
六七日下部出濃潰虫上食人五臟熱盛毒煩下
利不禁八九日良醫不能治矣不過二十日殺人
欲知是中水與非者當作五六升湯以小蒜五升

咬咀投湯中消息勿令大熱去滓以浴之是水毒
身體當發赤斑無異者非也治中水毒取梅若桃
葉搗絞取汁三升許或乾以少水絞取汁飲之小
兒不能飲以汁傅乳頭與喫

又方搗蒼耳汁服一升又以繇裹杖沾汁導下部日
二過即差

又方蓼一把搗以酒和絞取汁一升服之不過三服
一作藜葉

又方藍一把搗水解以塗浴面目身體令遍

又方搗蛇莓根末水飲之并導下部生者用汁凡夏
月行常多賣此藥屑入水以方寸匕投水上流無

所畏又能辟射工凡洗浴以少許投水盆中即無毒

人忽中水毒手足指冷或至肘膝者浮萍暴乾末之酒服方寸匕

八九月中刺手足犯惡露腫殺人生桑枝三枝內燂灰中推引之令極熱斫斷正以頸柱瘡口上熱盡即易之盡三枝則瘡自爛仍取薤白搗絲裹着熱灰中使極熱去絲取薤白薄瘡上以布帛急裹之若有腫者便作之用薤白第一佳

竹木刺皮中不出羊糞燥者燒為灰和豬脂塗刺若不出再塗一云用乾羊屎末

又方服王不留行即出兼取根末貼之

又方煮山藿麥汁飲之日三差止

又方用牛膝根莖生者併搗以薄之即出瘡雖合猶出

又方嚼白梅塗之

又方白茅根燒末以膏和塗之亦治瘡因風致腫

又方燒鹿角末以水和塗之立出久者不過一夕

又方頸垢傅之即出

惡刺苦瓠開口內兒尿煮三兩沸浸病上

又方濃煮大豆汁漬取差

又方葭荍根水煮浸之冷復易

喉痺金瘡等第七

喉痺桂心末如棗核大絲裹着舌下即破

又方荆瀝稍稍咽之

又方只將顙上近頭心髮直上作力提之其喉痺剝然一聲遂破最奇

墮落車馬及車輟木打已死者以死人安着以手袖掩其口鼻眼上一食頃活眼開與熱小便二升

凡墮落傷損欲死取淨土五升蒸之令溜分半以故布數重裹之以熨病上勿令大熱恐破肉冷則易之取痛止則已凡有損傷以此法治之神効已死不能言者亦活三十年者亦差

腕折骨損者以大麻根葉搗汁飲一升無生麻煮乾
麻汁服

腕折四肢骨碎及筋傷蹉跌生地黄不限多少熟搗
用薄所損處又云爛搗熬之以裹傷處以竹編夾
裹令遍縛令急勿令轉動一日可十易三日差若
血聚在折處以刀子破去血

四肢骨碎筋傷蹉跌豉三升水三升漬取汁服之
頭破腦出中風口噤大豆一斗熬去腥勿使太熟搗
末熟蒸之氣徧合甑下以酒一斗淋之溫服一升
覆取汗傳杏仁膏於瘡上

凡被打損血悶搶心氣絕不能言可闢開口尿其中

令下咽即醒

卒中毒矢搗藍汁一升飲之并薄瘡上若無藍取青布漬絞汁飲之并淋瘡中

又方內鹽臍中灸之

又方煎地黃汁作丸服之百日矢當出

又方煮蘆根汁飲三升

又方多飲葛根汁并治一切金瘡

又方末雄黃傅之當沸汁出愈

又方末貝齒服一錢匕大良

又方搗葛根汁飲之葛白屑熬黃傅瘡止血

金瘡破腹腸突出欲令入取人屎乾之以粉腸即入

矣

又被傷腸出不斷者作大麥粥取汁洗腸內之當研
米粥飲之二十日稍稍作強糜百日後乃可差耳
金瘡煩滿赤小豆一升以苦酒漬之熬令燥復漬滿
三日令色黑服方寸匕日三

箭鏃及諸刀刃在咽喉胸膈諸隱處不出者牡丹皮
一分白鹽二分一方作白欬二味治下篩以酒服
方寸匕日三出

又方取苦薑汁塗箭瘡上即出

又方酒服薤麥方寸匕日三差

卒為弓弩矢所中不出或肉中有聚血取婦人月經

布燒作灰屑酒服之

又方白欬半夏等分治下節酒服方寸匕日三淺瘡
十日出深瘡二十日出

金瘡血出不止桑根十沸服一升即止

又方柳絮封之

又方搗車前汁傅之血即絕連根用立効

又方飲人尿三升愈

又方以蜘蛛幕貼之

金瘡腹中瘀血大麻子三升大菟白二七枚使數人
各搗令熟用九升水煮取一升半頓服之若血出
不盡腹中有濃血更合服當吐膿血耳

金瘡內漏還自取瘡中血着杯中水和服

又方七月七日麻勃一兩蒲黃六兩酒服一錢匕日

五夜二

又方牡丹皮為散水服三指撮立尿出血

金瘡若痛楊木白皮熬令燥末之服方寸匕日三又

末傅瘡愈

金瘡若刺瘡痛不可忍百治不差者菰一把以水三升煮數沸漬洗瘡止痛良

傷墜車馬及諸物隱體肉斷者以酢和麴塗之

筋骨傷初破時以熱馬尿傅之無癰

又方大豆二升水五升煮取二升以醇酒六七升合

和豆汁服之一日盡如湯沃雪用小豆亦佳

落車墜馬及木崩血腹滿短氣大豆五升以水一斗煮取二升去豆一服令盡劇者不過三作

金瘡便以石灰厚傅無石灰只灰亦可裹之止痛又速愈若深未宜速合者內少滑石令瘡不時合也針灸瘡血出不止燒人屎灰傅之

金瘡出血多其人必渴當忍之噉燥食并肥脂之物以止渴慎勿鹹食若多飲粥及漿犯即血動溢出血殺人又忌嗔怒大言笑思想陰陽行動作勞多食酸醎飲酒熱羹臙葷差後猶須如此出百日半年乃可復常也

又方燒乾梅作炭搗末傅之一宿即差亦治被打傷
又方磁石末傅之止痛斷血

又方桑白汁塗桑白皮裏或石灰封之妙

又方麻葉三升以水三升煮取三升半為一服

又方飲麻子汁數升亦治毒箭所傷

又方蚯蚓屎以水服方寸匕日三

又方杏仁石灰細末猪脂和封亦主犬馬金

又方搗穀子傅之

瘡疽癰腫第八

發背亂髮灰酒服方寸匕亦治癰疽

又方飲鐵漿二升取利

又方三年醋滓微火煎令稠和牛脂傅上日一易

又方猪脂傅上日四五亦治發乳

又方猪羊脂切作片冷水浸貼上暖則易之五六十片差初貼少許即寒寒定好眠甚妙

又方燒鹿角灰醋和傅之日四五

標疽手足肩背累累如赤豆剝之汁出燕菁子熬搗帛裹展轉傅上良

又方以麻子熬作末摩其上良

又方酒和麵傅之

又方剝去瘡痂溫醋泔清洗之以胡燕窠百日男兒屎如膏傅之

又方亂髮灰服方寸匕日三亦治發背

又方煮芸薹菜取汁一升服之并食乾熟芸薹數頓少與鹽醬冬月用其子水和服之

又方以猪膽傳之良

又方枸杞根葵根葉煮汁煎如糖服之隨意

又方臘月糖晝夜浸之數日乃愈

疽潰後鹽湯洗拭了燒阜角灰粉之良

又方以牛耳中垢傳之良

又方以生麻油淳縣裹帛瘡上虫出

又方以沸湯灌瘡中三四徧

疽似癰而小有異今日去膿了明日還滿膿如小豆

汁者芸薹熟搗濕布袋盛之埋熱灰中更互熨之
即快得安不過再三即差冬用乾者

又方阜角煎湯洗拭乾以藥皮末傅勿令作痂

一切腫毒痛不可忍者取草麻子搗傅之即差

惡毒腫一宿可殺人者茴香草搗取汁飲一升日三

四服滓傅腫上冬中根亦可用起死神方

魚臍丁瘡不大痛者殺人以寒食餚傅之良又硬者

燒灰塗貼即差

又方先以針刺瘡上四畔作孔搗白芷取汁滴瘡孔

內

丁腫忌見麻勃見即死者以針刺四邊及中心塗雄

黃末立愈一云塗黃土

又方鼠新坩土和小兒尿傳之

又方鐵衣末和人乳汁傳之立可

又方小豆花為末傳之差

又方人屎尖傳之立差

又方以四神丹一枚當頭上安經宿則根出矣四神

丹方在第十二卷中

凡腫病須百方內外攻之生商陸一斤猪脂一斤煎
可得二升二味如煎令黃去滓以磨腫處亦可服
少許并塗以解清之燥輒傳之不過三日差

因瘡腫痛者皆中水及中風寒所作其腫入腹則殺

人溫桑灰汁漬之冷復溫之常令熱神秘

治癰芫花為末膠和如粥傅之

瘡發心胸以下者武都雄黃松脂各三兩和為塊刀
子刮為散飲服方寸匕日三不差更合

石癰堅如石不作膿者生商陸根搗傅之乾則易之
取軟為度又治濕漏諸癰節

又方蜀桑根白皮陰乾搗末炷膠以酒和藥傅腫即
拔出根

又方醋和葇荑子末傅頭上即拔出根

又方蛇脫皮貼之經宿差

又方梁上塵葵根莖灰等分醋和傅之即差

又方櫟子一枚以醋于青石上磨之以塗腫上乾更塗不過十度即愈

又方當上灸之百壯石子當碎出如不出益壯乃佳
癰腫痛煩悶生楸葉十重貼之以帛包令緩急得所
日二易止痛兼消腫蝕膿其良勝于衆物如冬月
先收乾者用時鹽潤之亦可薄消楸皮用之

始覺腫令消以葭苕末三指撮水和服之日三神良
已結膿使聚苦萋根末之苦酒和傳上燥則易赤小
豆亦佳

癰腫芥子末湯和傳紙上貼之

又方白薑石末蒜和搗傳上差

又方馬鞭草搗傳上即頭出

又方灸兩足大拇指竒中立差仍隨病左右

癰無頭者吞葵子一枚不得多服

又方燒菖蔓灰封上自消牛糞灰亦佳

又方鼠粘根葉貼之

又方水和雀糞傳之

又方生椒末釜下土等分醋和塗之一法有麴末

癰有膿令潰雞羽三七枚燒末服之即潰

又方人乳和麴傳上比曉膿血出并盡不用近手

又方箔經繩燒灰末臘月猪脂和傳下畔即潰不須

針灸

膿潰後瘡不合熟嚼大豆傳之

又方炒烏麻令黑熟搗傳之

又方牛糞傳之乾則易

又方燒破蒲席灰臘月猪脂和內孔中

癰久不差馬齒葉搗汁煎傳之

癰瘡潰後膿不斷及諸物刺傷瘡不差者石硫黃粉

一兩筋一片搥頭碎少濕內硫黃中以刺瘡孔瘡

差為度

癰肉中如眼諸藥不効犯丁瘡蕪菁根鐵生衣等分

和搗以大針刺作孔復削蕪菁根如針大以前鐵

生衣塗上刺孔中又塗所搗者封上仍以方寸匕

緋帛塗貼之有膿出易之須臾拔根立差忌油膩生冷醋滑五辛陳臭粘食

又方刺瘡頭及四畔令汁極出搗生栗黃傅上以麴圍之勿令黃出從旦至午根即拔矣

又方以麴圍瘡如前法以針亂刺瘡銅器煮醋令沸瀉麴圍中令容一盞冷則易之三度即拔根出

又方取蛇脫皮如雞子大以水四升煮三四沸去滓頓服立差

又方取蒼耳苗搗取汁一二升飲之淳傳上立差一方灸掌後橫文後五指男左女右七壯

癰肉中如眼諸藥不効取附子削令如碁子安腫上

唾貼以火灸之令附子欲焦復唾濕復以火灸之如是三度令附子熟氣微內即差

一切毒腫疼痛取華麻子熟搗傳之即差

腳腫向上至腹即殺人者赤小豆一斗以水三斗煮令爛出豆以汁浸腳至膝每日一度差止若已入腹不須浸但煮豆食之忌鹽菜米麪等渴飲汁差乃止

瘡久不差差而復發骨從孔出名骨疽以豬脂和楸葉搗封之

又方搗白楊葉傳之

又方蕪菁子搗傳之帛裹一日一易

又方穿地作坑口小裏大深三尺取乾雞屎二升以艾及荊葉搗碎和雞屎令可然火坑中燒之令煙出將疽就坑口熏之以衣擁口勿泄氣半日當有虫出甚効

附骨疽槲皮燒灰飲服方寸匕

又方灸間使後一寸隨年壯立差

一切丁腫蒼耳根莖苗子但取一色燒為灰酢泔淀和如泥塗上乾則易之不過十度即拔根出神良

又方取鐵漿每飲一升立差

又方麴和臘月豬脂封上立差

又方蒺藜子一升燒灰醎醋和封上經宿便差或針

破頭封上更佳

又方阜角子取仁作末傅之五日内差

又方艾蒿一担燒作灰于竹筒中淋取汁以一二合和石灰如麪漿以針刺瘡中至痛即點之點三遍其根自拔

赤眼丁熬白粉令黑蜜和傅之良

又方以新罌鼠壞水和塗之熱則易之

又方搗馬牙齒末臘月豬脂和傅之可拔根出亦燒灰用

火燒瘡慎不得以冷水洗熱得冷更深入骨壞人筋骨□□初被火燒急更向火灸雖大痛強忍之一

食久即不痛神驗

又方家中一女子火燒手且浸浸至掌急以酸酢升
餘浸之出酢尚痛時不痛止不瘡不膿不癢神妙
神妙

又方末熬油麻和梔子仁塗之惟厚為佳

又方已成瘡者燒白糖灰粉之即燥立差

因瘡而腫痛劇者數日死或中風寒或中水或中狐
尿刺燒黍穰若牛馬屎若生桑條燒取多煙以熏
之汗出愈如無生桑條取得多煙之物燒熏汗出
愈

又方熱蠟內瘡中新瘡亦善

又方以鳧公英草根莖白汁塗之惟多塗為佳大神
効此草蜀中名耳癰菜關中名苟乳乳奴狗切
腸癰雄雞頂上毛并屎燒作末空心酒服

又方截取檐頭尖少許燒作灰水和服當作孔出膿
血愈

又方瓜子三升末之以水三升煮取一升五合分三
服

又方死人冢上土作泥塗之

內癰未作頭者服雞屎即差

又方腸癰屈兩肘正灸肘頭銳骨各百壯則下膿血
即差

婦人妬乳取葵莖灰末之飲服方寸匕日三□□□
法為末不為灰

又一方取研米槌二枚灸令熱以絮及故帛搗乳上
以槌更互熨之差止

乳癰以水礮盛酢泔清燒石令熱內中沸止更燒如
前少熱內乳漬之冷更燒石內漬不過三燒石即
愈

又一方取菰白搗傅之并絞汁一升頓服即愈

又方柳根削取上皮搗令熟熬令溫盛練袋中熨乳
上乾則易之一宿即愈

又方鹿角治下篩以猪脂上清汁服方寸匕不過再

千金寶要卷之二
服亦可以醋漿水服

千金寶要卷之二終

千金寶要卷之三

霍亂吐瀉第九

霍亂轉筋蓼一把去兩頭以水二升煮取一升頓服
之一方作梨葉

又方燒故木梳灰末之酒服一枚小者永差

又方車轂中脂塗足下差

又方作極鹹鹽湯于槽中煖漬之
又方以醋煮青布搨之冷復易之

轉筋不止若男子以手挽其陰牽之女子挽其乳近
左右邊

轉筋在兩臂及胸中者灸手掌白肉際七又灸亶中

中府巨闕胃管尺澤并治筋拘頭足皆愈

霍亂引飲飲輒乾嘔生薑五兩呋咀以水五升煮取二升半分二服高良薑大佳

中熱霍亂暴利心煩脉數欲得冷水者新汲井水頓服一升立愈先患胃口冷者勿服之

霍亂吐下腹痛以桃葉煎汁服一升立止冬用皮走哺轉筋灸踵踝白肉際各三七壯又灸小腹下橫骨中央隨年壯

轉筋四厥灸兩乳根黑白際各一壯

轉筋灸湧泉六七壯在足心下當拇趾大筋上又灸足大趾下約中一壯

又方轉足踝聚筋上白肉際七壯立愈

轉筋入腹痛欲死四人持手足灸臍上一寸十四壯
自不動勿復持之又灸股裏大筋去陰一寸

霍亂轉筋令病人合面正卧伸兩手著身以繩橫量
兩肘尖頭依繩下夾脊骨兩邊相去各一寸半灸
一百壯無不差

霍亂已死有煖氣者灸承筋取繩量圍足從趾至跟
西捻取等折一半以度令頭至跟踏地處別縱上
至度頭即是穴灸七壯起死人又以鹽內臍中灸
二七壯

霍亂洞下不止艾一把水三升煮取一升頓服之良

又方香茅一把水四升煮取一升頓服之青木香亦佳

蠱毒宿食不消霍亂極鹹鹽湯三升熱飲一升刺口令吐宿食使盡不吐更服吐訖復飲三吐乃住此法大勝諸治俗人以為田舍淺近法鄙而不用守死而已凡有此病即須先用之

又方篇豆一升香薷一升以水六升煮取二升分服單用亦得

胞轉小便不通亂髮急纏如兩拳大燒末醋四合和二方寸匕服之訖即炒熟黑豆葉蹲坐其上

又方阿膠三兩水二升煮取七合頓服之

又方豉五合以水三升煮數沸頓服之

又方麻子煮取汁頓服之

又方連枷關燒灰水服之

又方筆頭燒灰水服之

又方灸玉泉七壯穴在關元下一寸大人從心下處取八寸是玉泉穴小兒斟酌取之

又法灸第十五椎五十壯

又法灸臍下一寸隨年壯一日四寸

吐逆霍亂吐血灸手心主五十壯

吐血生地黄肥者五升搗以酒一升煮沸三上三下

去滓頓服之

又方服桂心末方寸匕日夜可二十服亦治下血
忽吐血熟艾三雞子許水五升煮取二升頓服

又方燒亂髮灰水服方寸匕日三亦治舌上忽出血
如簪孔者亦治小便出血

中蠱下血日數十行苦瓠一枚以水二升煮取一升
稍稍服之當下蠱及吐蝦蟇科斗之狀一月後乃
盡又云苦瓠毒當臨時量用之又云用苦酒一升
煮

虎犬馬傷第十 針折入肉附

虎咬瘡煮葛根令濃以洗之十遍飲汁及搗為散以
葛根汁服方寸匕日五甚者夜二

又方青布急卷為繩止一物燒一頭然內竹筒中注
瘡口熏之妙

又方煮鐵令濃洗瘡

又方嚼栗子塗之良

剝死馬骨傷人毒攻欲死便取馬腸中屎塗之大良
又方取其屎燒灰服方寸匕

狂犬咬人毒有七日一發百日内殺人者每到七日
搗韭汁飲一二升當終身禁食犬肉蚕蛹若犯則
死不可救瘡未愈之間禁食生魚及諸肥膩冷食
但于飯下蒸魚及于肥器中食便發不宜飲酒過
一年乃佳

獬犬嚙人搗地榆絞汁塗瘡無生者取乾者以水煮
汁飲之亦可末之服方寸匕日三兼傳之過百日
止

又方搗韭絞汁飲一升日三瘡愈止

又方以豆醬清塗之日三四

又方刮虎牙或骨服方寸匕

獬犬毒燒虎骨傅瘡及慰又微熬杏仁搗研取汁服
之良又取燈盞殘油灌瘡口此皆禁生菜猪肉魚
酒

又方用韭根故梳二枚以水二升煮取一升頓服

又方桃東南枝白皮一握水二升煮取一升分二服

吐出犬子

又方服葭蓉子七枚日一

又方梅子末酒服

獐犬所齧惡血未盡灸上一百壯以後當日灸一壯
若不血出刺出其血百日灸乃止禁飲酒猪犬肉
凡犬齧人以熱牛屎塗之佳

針折入肉中刮象牙末水和聚着折針上即出
又方磁石吸鐵者着上即出

舌耳心目等大小便第十一

舌卒腫滿口溢出須臾不治殺人急以指刮破舌兩
邊去汁即愈

又方取釜下墨以酢厚傅舌上下脫去更傅佳

又方半夏十二枚洗熟以酢一升煮取八合稍稍含漱之吐出加生薑一兩佳

又方滿口含糖酢少許時熱通即止

舌上出血如泉燒鐵篋熟烙孔中良

舌強不語礬石桂心等分為末安舌下立差

耳中有物不可出以弓弦從一頭令散傅好膠注耳中物上停之令相着徐徐引之

耳聾乾盯聾不可出三年酢灌之最良繇塞之半日許必有物出

百虫入耳末蜀椒一撮以酢半升調灌耳中行二十

步即出

又方桃葉火熨卷之口塞耳立出

又方車𦍋脂傳耳孔自出肘後以療聾耳膿血

又方以芻涕灌耳中虫即出亦治耳聾

齒斷間血出不止生竹茹二兩醋煮合之

又方溫童子小便半斤取三合舍之其血即止

九孔出血搗荊葉取汁酒服二合一即荊芥

九種心痛取當太歲上新生槐枝一握去兩頭咬咀

以水三升煮取一升頓服

又方桃白皮煮汁空腹以意服之

婦人心痛布裏鹽如彈丸燒作灰酒服

又方燒秤錘投酒中服佳

又方炒大豆投酒中服佳

產後卒心腹痛桂心三兩酒三升煮取二升去滓分

三服日三

又腹中苦痛生牛膝五兩酒五升煮取二升去滓分

二服若乾牛膝根即酒浸一宿方可煮

奔豚氣急作湯以浸兩手足數數易之

又方灸章門百壯一名長平二穴在大橫外直臍肋
端

又方灸氣海百壯穴在臍下一寸半

又方灸關元百壯在臍下三寸

又方灸中極五十壯在臍下四寸

又方灸期門百壯直乳下第二肋端傍一寸五分

又方灸四滿二七壯穴夾丹田兩傍相去三寸即心
下八寸臍下橫文是也

奔豚腹中與腰痛灸中府百壯穴在兩乳上三肋間
耳聾有膿不差有虫先以繇纏去耳中汁以礬石末
粉耳中次以石鹽末粉其上食久乃起不過再永
差

聾耳桃仁熟搗以故緋絹裏內耳中日三易以差為
度

治底耳黃礬燒繇裏內耳中不過三日愈或以葦管

吹耳中

治虫心痛鶴虱末之密和梧子大服四十丸日三蜜湯下加至五十丸慎酒肉

又方鶴虱一兩末之空腹溫酢一盞和服之虫當吐出

又方服漆一合

熱翳漫睛以羊筋漱口熟嚼夜卧開目納之即閉目睡去膜明日差亦治眯目

眼暗以銅器盛大酢三四升煎七八日覆器溼地取銅青一合以三月杏白仁一升取汁和銅青傳之日不過三四度大良

又方含黃蘗一爪甲許使津置掌中拭目訖以水洗之至百日眼明此法乃可終身行之永除眼疾神良

雀目術令雀目人至黃昏時看雀宿處打令驚起雀飛乃呪曰紫公紫公我還汝盲汝還我明如此日日瞑三過作之眼即明曾試有驗

大小便不通葵子末一升青竹葉以水二升煮五沸頓服

又方葵子一升榆皮一升水五升煮取二升分三服又方葵子一升以水三升煮取一升去滓納豬脂一升空腹分二服

又方甌帶煮取汁和蒲黃方寸匕日三服

又方猪脂一升以水二升煮三沸飲汁立通

又方灸臍下一寸三壯

失欠頰車蹉一人以手指牽其頤以漸推之則復入矣推常疾出指恐悞齒傷人指也

又方消蠟和水傳之

目昧不出以蚕沙一粒吞之即出

卒食物入鼻有入腦羊脂如指大內鼻中吸上物隨脂下

鼻中出血不止搗楮葉汁飲三升大良

齒痛蚯蚓糞水和作稠泥團以火燒之令極赤如粉

以臘月豬脂和傅斷上日三兩度永差

又方馬齒菜一把嚼之即差

齒根動欲落生地黄縣裏着齒上咋之及咬咀以汁
漬齒根日四五并咽汁十日大佳

大便難好膠三寸芎白一把以水四升煮取一升半
頓服之即下

又方葵子汁和乳汁等分服之立出

大便失禁不拘老人小兒灸兩腳大指去甲一寸三
壯又灸大指竒間三壯

小便不通水四升洗甌帶取汁煮葵子取二升半分
三服

又方胡燕糞豉各一合和搗丸如梧桐子大服三丸
日三

又方髮去垢燒末一升葵子一升以飲服方寸匕日
三

又方石槽塞灰土井花水服之日三

又方服車前子末方寸匕日三百日止

卒不得小便車前草一把桑白皮半兩咬咀以水三
升煎取一升頓服之

婦人卒不得小便者杏仁二七枚熬末服之立通
又方紫葳末井花水服三指撮立通血出四五度服
之

大小便不利葵子二升消石二兩以水五升煮取二升分再服

小便不利大便數注灸屈骨端五十壯

胃反食則吐搗粟米作麪水和作丸如楮子大七枚爛煮內酢中細細吞之得下便已麪亦得用之

胃反食即吐出上氣蘆根節根各二兩細切以水四升煮取二升頓服之得下良

又方飲白馬尿即止

又方淘小芥子暴乾為末酒服方寸匕日三

又方灸兩乳下各一寸以差為度

上氣上酥一升獨頭蒜五顆先以酥煎蒜黃出之生

薑汁一合共煎令熟空腹溫服方寸匕

上氣嘔吐芥子二升末之蜜丸寅時以井花水服如
梧子大七丸日二亦可作散酒浸服治臍下絞痛
腳氣入腹困悶欲死吳茱萸六升木瓜兩箇切以水
一斗三升煮取三升分三服如人行十里久再進
一服或吐或汗或利或大熱悶即差此起死人方
卒噎滿口着蜜食之即下

又方刮椿杵頭細糠含之即下

又方老牛涎棗核大水中飲之終不復噎

齧齒及虫痛切白馬懸蹄如米許以絲裹着痛處孔
中不過三度

又方家中法以煮酒蠟少許任在虫孔子中以熱火
筋烙之令蠟融于孔立愈

熱病後眼暗失明以羊膽傅之旦暮各一

明日令髮不落牛膽中漬槐子陰乾百日食後吞一
枚十日身輕三十日白髮再黑百日通神

明目小黑豆每日空心吞二七粒

又方三月三日採蔓菁花陰乾治下篩空心井花水
服方寸匕久服可夜讀細書

目赤及翳烏賊骨鉛丹大小等分合研細和白蜜如
泥蒸之半食久冷着眼四眥日一

治三十年聾故鐵三十斤以水七斗浸三宿取汁入

麴釀米七斗如常造酒法候熟取磁石一斤研末
浸酒中三日乃可飲取醉以絲裏磁石內耳中好
覆頭卧酒醒去磁石即差

耳聾鳴汁出一二十年不差礬石少許以生菖蒲根
汁和點入耳中

耳聾巴豆十四箇成鍊松脂半兩合治丸如黍米大
絲裏以簪頭着耳中一日一易藥如硬微火灸之
以汁出乃愈妙

又方菖蒲附子等分末之以麻油和以絲裏內耳中
又方芥子搗碎以男兒乳和絲裏內之

又方作一坑可容二升許着炭火其中坑似窖形以

磚覆口上磚上作一孔可容小指磚孔上着地黃一升以木盆覆之以泥泥盆下勿泄盆底上鑽一小孔可容筯其孔上着三重布以耳孔當盆上熏久若悶去黃水髮裏鹽塞之不過二三度神効又方酒三升浸牡荊子二升碎之浸七日去滓任性服盡三十年聾亦差

又方硫黃雄黃各等分末之絲裏內耳中數日聞人語

中風大風水氣第十二

大風半身不遂蚕沙兩石熟蒸作直袋三枚各受七斗熱盛一袋着患處如冷即取餘袋一依前法數

數易百不禁差止須羊肚釀粳米芎白薑椒鼓等
爛煮熱喫日食一枚十日止千金不傳

百種風灸腦後項大椎平處兩廂量二寸三分各灸
百壯得差須取病人指寸量

卒病惡風欲死灸第五椎名曰臧輸一百五十壯三
百壯便愈

中風口僻眼急諸藥不能差者枳實上青刮取末欲
至心止得茹五升微火炒去溼氣以酒一斗漬微
火暖令得藥味隨性飲之大驗治緩風急風並佳
中風口喎炒大豆三升令焦以酒三升淋取汁頓服
之口噤不開亦治

又方大皂角一兩去皮子下篩以三年大酢和左喎塗右右喎塗左乾更塗之

卒氣短搗韭汁服一升立差

大風疾煉松脂投水中二十徧蜜丸服二兩飢便服之日三鼻柱斷離者二百日服之差斷鹽及雜食房室

又方天門冬酒服百日愈

大風灸百會七百壯

腎寒灸腎輸百壯

中風口喎灸手交脈三壯左灸右右灸左其炷如鼠屎橫安之兩頭下火

風勞毒種疼痛攣急桃仁一升研如常法以酒三升攪和頓服之厚衣蓋令汗不過三劑

猥退風葦麻子脂一升酒一斗銅鉢盛着酒中一日煮之令熟服之

失音濃煮桂汁服一升覆取汗亦可末桂着舌下漸漸咽汁

又方濃煮大豆汁含亦佳無豆用豉

歷節風松膏一升酒三升浸七日服一合日再數劑愈

冷氣氣短蜀椒五兩絹袋盛以酒一斗浸之二七日服之任意多少

卒上氣鳴急便欲死者搗韭汁服一升良

乏氣枸杞葉生薑各二兩咬咀以水三升煮取一升

頓服

心腹冷痛熬鹽一斗熨熬蚕沙燒磚石蒸熨取其裏
溫暖止蒸土亦大佳

虛勞浮腫灸太衝百壯又灸腎輸

虛勞不得眠酸棗榆葉等分末之蜜丸如梧子大每
服十五丸日再

又方乾薑四兩末湯和頓服覆取汗愈

一切虛羸鹿骨一具碎枸杞根切二斤二味各以水
一斗別器各煎汁五升去滓澄清仍合一器共煎

取五升日二服盡好將慎皆用大斗

補虛羸九月十日取生溼枸杞子一斗酒六升煮五沸出取研之熟濾取汁令其子極淨暴子令乾搗末合前汁微火煎令可丸酒服二方寸匕日二加至三方寸匕亦可加至五十丸

腹脹滿繞臍結痛堅不能食灸中守百壯穴在臍上一寸一名水分

脹滿氣聚寒冷灸胃管百壯三報穴在鳩尾下三寸
脹滿癥聚滯下冷疼灸氣海百壯穴在臍下一寸忌不可針

脹滿氣如水腫狀小腹堅如石灸膀胱募百壯穴在

中極臍下四寸

脹滿腎冷瘕聚洩利灸天樞百壯穴在臍傍相對橫去臍兩傍各二寸

諸冷極馬蘭子九升淨治去土空腹服一合日三飲及酒下之服訖須臾以食壓之取差乃止

骨蒸天靈蓋如梳大灸令黃碎以水五升煮取二升分三服起死人神方

又方取人屎灰以酒服方寸匕日三

走疰燒車釭令熱暫入水以溼布裏熨之

三十年氣疰鼓心半升生椒一合以水二升煮取半升適寒溫用竹筒縮取汁令病者側卧以手擘大

孔射灌之少時當出惡物此法垂死悉治得差百
千不可具述

欬嗽胸脇支滿多唾上氣酒一升半浸肥阜莢兩挺
經宿煮取半升分三服七日忌如藥法若吐多以
酢飯三四口止之

又方薑汁一升半沙糖五合煎薑汁減半內糖更煎
服之

又方白糖五分微煨令消內阜莢末方寸合利相得
先食服如小豆二丸

又方服芥子七丸以油酒下之

上氣欬嗽乾羸末三兩膠飴一斤二味和令調蒸五

升米下以棗大含稍稍咽之日五夜二

卅年嗽百部根二十一斤搗取汁煎如飴服方寸匕

日三

又方白蜜一斤生羌二斤取汁二味先將銅銚秤知
斤兩訖內蜜復秤知數次內羌汁以微火煎令羌
汁盡惟有蜜斤兩在丸如棗大含一丸日三禁一
切雜食

又方紫菀二兩款冬花二兩末之食後以飲服方寸
匕日三七日差

久水腹大如鼓烏豆一斗熬令香勿令大熟去皮為
細末錫粥皆得服之初服一合稍加之若初服多

後即嫌臭服盡即更造取差止不得食肥膩渴則
飲羹汁慎酒肉猪雞魚生冷酢滑房室得食漿粥
牛羊兔鹿肉此據大飢渴時食之可忍亦勿食也
此病難治雖諸大藥丸散湯膏當時雖差過後復
發惟此散差後不發終身服之終身不發矣其所
禁食物常須少噉莫隨意醎物諸雜食等

又方葶藶末二寸匕蒼耳子灰二寸匕調和水服之
日二

又方椒目沉水者取熬之搗如膏酒服方寸匕

又方水煮馬兜零服之

水腫利小便葶藶四兩生用桂心一兩末之蜜飲下

梧子大七丸日二以知為度

又方牽牛子末之水服方寸匕日一利止

又方郁李仁末麴各一升和作餅子七枚燒熟空腹
熟食四枚不知更加一枚加至七枚

大水頭面徧身腫脹苦瓠白穰實捻如大豆以麴裹
煮一沸空腹吞七枚至午當出水□升三四日水
自出不止大瘦乃差三日內慎口味也苦瓠須好
無厭翳細理研□□□有毒不堪用崔氏用子
作餠飪服二七枚若恐虛者牛乳服之如此隔日
作服漸加至三七枚以小便利為度小便若太多
即二日停止

水通身腫煎猪椒枝葉如錫空腹服一匕日三瘥以
汁洗之

又方苦瓠膜二分葶藶子五分熬搗為丸如小豆大
服五丸日三

又方單服牛尿大良凡病水無不差服法先從少起
得下為度

又方大棗肉七枚苦瓠膜如棗核大搗丸一服三丸
如行十五里久又服三丸水出更服一丸即止

又方煎人尿令可丸如小豆大日三服

又方葶藶桃仁各等分皆熬合搗為丸服之利小便
一曰用杏仁

又方搗生亭薺子酢和服以小便數為度

又方燒姜石令赤內黑牛尿中令熟服一升日一

又方灸足第二趾上一寸隨年壯又灸兩手大指縫
頭七壯

凡卒中風口喎以葦筒長五寸以一頭刺耳孔中四
畔以麴密塞之勿令泄氣一頭內大豆一顆并艾
燒之令然灸七壯即差患右灸左患左灸右耳病
亦灸之若不能語者灸第三指上百壯若眼反口
噤腹中切痛灸陰囊下第一橫理十四壯人卒死
者灸法同之

破傷風腫厚塗杏仁膏燒麻燭遙灸之

刺傷中風水刮箭羽下漆塗之

又方服黑牛熱尿一服二升三服即止

又方煮韭熟搗之

又方蠟一兩熱灸熨薄裏其上水出愈

千金寶要卷之三終

千金寶要卷之四

瘧痢癥等第十三

凡下痢熱烏梅一升黃連一斤金色者末之蜜和如
梧子大二十九日三夜二

積久三十年常下痢赤松皮去上蒼皮切一斗為散
麩粥和一升日三服百日差

下血日夜百七八十行黃連黃蘗各四兩呋咀醇酢
三升煮取一升半分再服

赤白帶下亂髮雞子大燒末水服不過三

下冷臍下攪痛赤石脂乾薑各十兩丸如豌豆服十
丸日三加至二十丸

卒下痢黃連五兩生薑一斤咬咀以水五升煮取一升頓服未止更服

久冷白痢日夜五六十行大小腹痛不可忍好麴末五升微熬令和溫清酒令熟和麴末一升空腹頓服日三服若至食時搗蒜一升令至熟下薑椒調和如常食法惟須稠勿加鹽以水和麴二升作索餅極爛煮之乾漉熱內蒜齏臼中相和一頓食之少與餘食至飢時仍準前食麴末酒比至差不過兩日

久冷或痢或不痢但患腰腹苦冷者上等新蜀椒三升用酢宿漬之以麴三升和椒一升緊拌煮作粥

空腹頓服之加芎藭鹽任性調和不差更作以差
為限不過三升椒即愈此不但治冷大治諸虛損
冷極有所益久當自知耳

瘡或間日或夜發者燒黑牛尾頭毛作灰酒服方寸
匕日三

又方無問新久者小便一升半蜜三匕同煮三沸頓
服每發日平旦時服自至發勿食重者漸退不過
三服差

一切瘡無問遠近正仰卧以線量乳間中屈從乳向
下灸度頭隨年壯男左女右

五臟諸瘡灸尺澤七壯穴是肘約上動脈

穰瘡法未發前抱一大雄雞時時驚動令雞作大聲
立差

卒暴癥腹中有物堅如石痛如斫刺晝夜啼呼不治
百日必死牛膝二斤咬咀暴之令乾以酒一升浸
之密塞氣口煎取半服半升一服便吐去宿食神
効

又卒暴癥取商陸根搗碎蒸之以新布藉腹上以藥
鋪布上以衣物覆藥上冷復易之數日勿息

凡所食不消取其餘類燒作末酒服方寸匕便吐去
宿食即差如食桃不消者以時無桃就樹間得搞
桃燒服亦可

卒食不消欲成癥積者煎艾汁如飴取半升作一服
便利吐去宿食神良

又方白艾五尺圍一束薏苡根一大把二味煎服
食魚肉等成癥結并諸毒氣狗屎五升燒末絲裹之
以酒一斗浸再宿濾取清分十服日三服三日使
盡隨所食便出矣

雜中食癥實不消心腹堅痛以水三升煮白鹽一升
令消分三服自吐亦治暴癥

患癥結病及瓜病似瓜形日月形或在臍左右或在
臍上下若鰲在左右肋下或當心如合子大先針
其足以椒熨之取一新大盆受一斗者盆底鑽一

百二十孔孔上着椒三合上着一重紙紙上着冷
灰一升灰上着熱灰半升上着剛炭火一斤經一
食頃盆底熱徹當病上初安氈一重即安火盆火
盆大熱以漸更加一重若火更熱不可忍加至三
重暫歇一口冷飲還上火消二分許即停經三日
□□及至七日決得頓差然後食美食自補若小
不差作露宿丸服之方在第十六卷中

驚癥腹堅硬腫起大如盆眠卧不得取藍一斤搗水
三升絞取汁服一升日二

又方蒟藳根白芨一握研取汁水和服之

食□得病為驚癥在心下堅強雞屎一升炒黃取五

合以酒一升浸半為末以所浸酒服方寸匕日二
三市中作一劑

蛟龍病開皇六年三月八日有人食芹得之其人病
發似癲癩面色青黃因食寒食餚過多便吐出蛟
龍有頭及尾從茲有人患此疾令服寒食餚二斗
大驗

米瘕常欲食米若不得米則胸中清水出雞屎一升
白米五合合炒令米焦搗末以水二升頓服取盡
須臾吐出病如研米若無米當出痰自此永憎米
不復食

頭風吐逆第十四

凡食後吐酸水乾薑茱萸各二兩治篩酒服方寸匕
日二胃冷服之立驗

嘔噦蘆根切三升以水一斗煮取四升分四服

乾嘔吐逆涎沫出者半夏乾薑等分呔咀以漿水一
升半煮取七合頓服之日三

乾嘔酒浸馬屎一宿取汁服之

又方灸心主尺澤亦佳

又方灸乳下一寸三十壯

乾嘔不止粥食湯藥皆吐不停灸手間使三十壯若
四厥脉沈絕不至者灸之便通此起死人法

治噦煮豉三升飲汁佳

又方空腹飲薑汁一升

又方濃煮蘆根汁飲之

又方灸承漿七壯炷如麥大又灸臍下四指七壯
惡心苦嘔穰并子一升碎以酒水三升煮取一升頓
服須臾吐下如蝦蟇衣三升

又方服小便百日佳

又方麻子一升熬令香熟搗取酒三升熟研濾取一
升飲盡日二服盡□石差一切病自能食飲不能
酒者任性多少

食飲輒吐頓服生熟湯三升即止

吐逆食不住灸胃管百壯三報

吐逆飲食却出灸脾募百壯三報章門也

咽痛逆氣不能食麻子一升熬令黑以酒一升淋取汁空心一服一升漸至二升多汗好覆勿觸風冷此方無理產婦及丈夫中風如角弓反張口噤不開

治婦人氣平旦服烏牛屎日一止

腰痛以酒單服鹿茸與角方寸匕日三

腰腎痛導引法正東坐收手抱心一人于前據躡其兩膝一人後持其頭徐牽令偃卧頭到地三起三卧止便差

腰痛灸法宜針決膝腰句尺一中青赤路脉出血便

差

又方灸脚跟上橫文中白肉際十壯良

又方灸足巨陽七壯巨陽在外踝下

又方灸腰自竅七壯在尻上約左右

又方灸八竅及外踝上骨約中

腰卒痛灸窮骨上一寸七壯左右各一寸七壯

頭風大豆三升炒令無聲先以一斗二升瓶盛清酒

九升乘豆熱即傾酒中密泥頭七日溫服之

又方服荊瀝不限多少取差止

又方搗蒺藜根一升酒二升漬服汗出止

又方末蔓荊子二升酒一升絹袋盛浸七宿溫服三

合日三

又方臘月烏雞屎一升炒黃末之絹袋盛以酒三升浸溫服任意常令醺酣

又方七月七日麻勃三升麻子一石末相和蒸之沸湯一石五斗三徧淋之煮取一石神麴二十斤漬之令發以黍米兩石五斗釀之熟封三七日服清一升百日身中澀皮入風胸隔五臟骨髓伏風百病悉去之

頭風沐方葶藶子煮沐不過三四度愈

又方蜀椒二升以水煮取汁沐髮良

白屑以桑灰汁沐頭去白屑神良

白髮還黑烏麻九蒸九暴末之以棗肉丸久服之佳
又方隴西白芷旋覆花秦椒各一升桂心一尺治下
篩以井花水服方寸匕日三三十日白髮還黑禁
房室

千金寶要卷之四終

千金寶要卷之五

疫瘴渴淋第十五

令瘟不相染人汲水瓶上繩長七寸盜着病人卧席下良

又方以繩度所住戶中壁屈繩則斷之

又方桃木蠹屎末之水服方寸匕

又方木豉等分酒漬服之妙

又方正旦吞麻子赤小豆各三七枚又以二七枚投井中

又方新布袋盛大豆一升内井中一宿出服七枚
又方松葉末之酒服方寸匕日三

又方常以七月七日合家向日吞赤小豆二七枚
又方常以七月七日男吞大豆七枚女吞小豆二七枚

又方正旦取東行桑根大如指長七寸以丹塗之挂
門戶上又令帶之

又方常以月望日細剉東引竹枝煮湯浴
瘴氣蒜五子并皮碎之豉心一升以三歲男兒尿二
升煮五六沸去滓服之良

又方青竹茹二升以水四升煮取三升分三服汗不
止者白朮葉作飲方寸日飲口

盜汗韭根四十九枚水二升煮一升頓服

又方豉一升以酒二升漬三日若服不差更合服不
過三劑

消渴甘草乾薑各二兩咬咀水三升煮取升半去滓
分二服又法有大棗十二箇

渴利生枯萋根三十斤切以水一石煮取一斗半去
滓以牛脂五合煎水盡以溫酒食如雞子大日三
服

渴口便利復非淋榆白皮二斤切以水一斗煮取五
升一服三合日三

又方小豆藿一把搗取汁頓服三升

又方薔薇根水煎服之佳

又方三年重鵲巢燒末以飲服之

又方桃膠如彈丸含之咽津

又方蠟如雞子大以酢一升煮二沸適寒溫頓服之
熱渴頭痛壯熱及婦人血氣上衝悶不堪者茅根切
三升搗取汁渴即飲之令盡

消渴病百日以上者不得灸刺

消渴乾浮萍枯萋根等分末之以人乳汁和丸如梧
子空腹飲服二十九日三三年病者三日愈治虛
熱大佳

治渴黃連一斤生地黄一斤又云十斤絞地黄取汁
浸黃連出燥曝之燥復內之令汁盡乾之搗末蜜

丸如梧子每服二十九日三食前後無在亦可為散以酒服方寸匕

大渴深掘大桔萐根厚削皮至白處以寸切水浸一日夜易水經五日取出爛搗研之以絹袋濾之如出粉法乾之水服方寸匕日三四亦可粥乳酪中食之不限多少取差止又云水和桔萐散服方寸匕亦可蜜丸如梧子大每服三十丸

又方取七家井索近桶口結燒作灰井花水服之不過三服差

又方取豉漬汁任性多少飲之

又方濃煮竹根取汁飲之以差止

又方以青梁米煮取汁飲之以差止

消中日夜尿七八升者鹿角炙令焦以酒服五分匕
日三漸加至方寸匕

又方漚麻汁服一升佳

又方葵根如五升盆大兩束又云五六斤以水五斗
煮取三斗宿不食平旦每服三升

諸淋細白沙三升熬令極熱以酒三升淋取汁服一
合

淋痛蒲黃滑石等分末之酒服方寸匕日三

氣淋船底胎如鴨子大水三升煮取二升頓服

又方水三升煮豉一升一沸去滓內鹽一合頓服亦

可單煮鼓汁服

又方水一斗煮比輪錢三百文取三升溫服之

又方搗葵子末湯服方寸匕

又方空心單茹蜀葵一滿口止

又方熬鹽熱熨小腹冷復易亦治小便血

又方臍中着鹽灸三壯

石淋車前子二升絹袋盛水九升煮取三升頓服之

石即出先經宿不得食

又方取浮石使滿一手治下篩以水三升酢一升煮取二升澄清服一升不過三服石出亦治嗽醇酒煮之

又方桃膠棗許大夏以三合冷水冬以三合湯和服日三當下石子如豆卵石盡止亦治小便出血又方灸水泉三十壯足大敦是也

膏淋搗葎草汁二升酢二合空心頓服之當尿小豆汁也又濃煮汁飲亦治淋瀝

熱淋葵根一升冬用子夏用苗切大棗二七箇以水三升煮取一升二合分二服熱加黃芩一兩出難加滑石末二兩血者加茜根三兩痛者加芍藥二兩加藥水亦如之

又方白茆根切四斤以水一斗五升煮取五升服一升日三夜二

又方常煮冬葵根飲之

血淋生大麻根十箇以水五升煮取二升頓服之亦治小便出血

又方大豆葉一把水四升煮二升頓服之

又方葵子一升水三升煮取汁日三服亦治虛勞尿血

又方灸丹田隨年壯又灸伏留五十壯又云隨年壯五淋灸懸泉十四壯穴在內踝前一寸斜行脉上是中封之別名

又方灸大敦三十壯

卒淋灸外踝尖七壯

小便血胡麻三升搗細末以東流水二升漬一宿平旦絞去滓煮兩沸頓服之

小便出血龍骨細末之溫水服方寸匕日五六服一云酒服

又方搗荊葉取汁酒服二合

又方酒三升煮蜀當歸四兩取一升頓服

又方煮車前根葉子多飲之佳

又方刮滑石末水和傳繞小腹仍繞陰際佳又治小便不通

又方酒服亂髮灰一云水服

又方酒服葵莖灰方寸匕日三

頭面手足癩瘡漏第十六

凡口吻瘡以經年葵根欲爛者燒作灰熱傅之佳
燕吻瘡白楊枯枝鐵上燒取諸及熱傅之佳

唇上瘡經年不差八月藍取汁洗三日差

諸瘡因風致腫燒白芋灰溫湯調之傅上厚三分乾
即易不過五度差

又方櫟根皮三十斤剉水三斛煮令熱下鹽一把令
的的然熱以浸瘡當出濃血日日為之差止

反花瘡并積年諸瘡取牛蒡根一云牛蒡根熟搗和
臘月猪脂封上差止

又方馬齒菜搗封差止

惡露瘡搗薤葉傳瘡口以大艾炷灸藥上令熱氣入
內即差

惡瘡燒扁竹灰和楮白汁塗之

又方羊屎麻根燒煙斷膏和封有汁乾傳

惡瘡似火爛白馬屎暴乾以河水調煮十沸絞取汁
洗之

身瘡頭瘡菖蒲末傳上日三夜二

惡瘡十年不差似癩蛇脫皮一枚燒末之猪脂調傳
醋調亦得

又方苦瓠一枚咬咀煮取汁洗瘡口日三又煎以塗
瘡甚良皆先以泔洗三日差

又方鹽湯洗搗地黃葉占之

又方燒猓猪屎傳之

又方燒葭苕子末傳之

諸瘡久不差并六畜瘡棗膏三升水三斗煮取一斗半數洗取愈

代指甘草二兩咬咀水五升煮取一升半漬之若無用芒硝代之

又方以唾調白碯砂搜麴作梔子盛唾着碯砂如棗大以爪指着中一日差

又方以毛雞黃土作泥泥指上令厚五分內糖灰中煨令熱可忍泥乾易數度差

又方刺指熱飯中二七徧愈

又方以麻沸湯漬之即愈

又方單煮地榆湯漬之半日差

又方先刮去膿血炙魚鮓皮令溫以纏裹周匝痛止
便愈

又方蜀椒四合水一升煮三沸以漬之

又方取姜黃芎葉煮湯漬之

指痛欲脫猪脂和鹽煮令消熱內其中食久住千金

翼作和乾薑

手足指掣痛醬清和蜜溫塗之

又方灸指端七壯

手足指逆臚此緣廁上搔頭還坐廁上以指倒將二
七下即差

凍指馬屎三升以水煮令沸漬半日愈

人脚冬夏常拆裂雞屎一升水二升煮數沸停小冷
漬半日差亦用馬糞

又方羊膠膠乾故帛貼上

九漏成鍊松脂末之填瘡孔令滿日三四度七日差
又方馬齒莧陰乾臘月燭燼等分末之以臘月猪脂
調先以暖泔清洗瘡拭乾傅之日三

又方乾牛屎乾人屎搗先幕縣于瘡上縣上着屎虫
聞屎香出若搔即舉縣去之更取縣着屎如前虫

出盡乃止

又方苦瓠四枚大如盞者各穿一孔如指大置湯中煮十數沸取一竹筒長一尺內一頭瓠孔中一頭注瘡孔上冷則易之徧止

又方煮鹽花以麴攤病上內鹽花麴匡中厚二寸其下以桑葉三重藉鹽候冷熱得所可忍冷則無益熱則肉破一日一度候病根勢消則止若已瘡者搗糝穀末粉之

又方櫟北陰白皮三十斤剉之以水一石煮取一斗去滓煎如糖又取都廁上雌雄鼠糞各十四枚燒令汁盡末內煎中溫酒一升投煎中合攪之羸人

五合服之當有虫出

漏作瘡孔末露蜂房臘月豬脂調傅孔上

瘡因風致腫櫟木根皮一斤濃煮入鹽一把漬之

灸瘡不差者每日于上別灸六七壯自差

灸瘡中風冷腫痛但向火灸之瘡得熱則瘡快至痛

止日六七灸愈

諸漏霜下瓠花暴乾末傅之

又方搗土瓜根薄之燥則易不限時節

又方故布裏鹽如彈丸燒令赤末酒服

又方服白馬屎汁一升

又方正月雄狐屎陰乾末之水調服

又方鹽麴和燒灰傅之

又方水研杏仁服之

又方猪脂一升酒五合煎沸頓服之

漏下槐子燒末酒服方寸匕日三立差

一切冷癰燒人吐出蛔虫為末先以甘草湯洗瘡後
着灰無不差者慎口味

鼠漏瘡差復發以不經水猪脂呔咀生地黄內脂中
令足相淹和煎六七沸桑灰汁洗瘡去惡汁以此
膏傅日一易

鼠漏腫核未成膿以柏葉着腫上熬鹽着葉上熨之
令熱氣下即消

螻蛄瘻櫛葉灰先以泔清煮櫛葉取汁洗拭乾以灰
內瘡中

蜂瘻瘻漸大者熬鹽熨之三宿四日不差至百日成
瘻其狀大如四五寸石廣三寸中生蜂作孔乃有
數百以石硫黃隨多少然燭燒令汁出着瘡孔中
須臾間見蜂數十惟蜂盡差

又方人屎蛇脫灰臘月猪膏調傳之

又方蜂窠灰臘月猪脂調傳孔中

瘻瘻雄雞屎灰臘月猪脂調封之

蜚蠊瘻牛屎灰和臘月猪脂傳之

又方蜚蠊所推丸末傳之

又方乾牛屎末傅瘡則撥却更厚封差止

又方熱牛屎塗之數數易應有蜣螂出

蚯蚓瘻蚯蚓屎雞屎末之用社猪下頷髓和傅之

蝎瘻五六孔相通者搗茅根汁着孔中

蛇瘻蛇脫皮灰臘月猪脂和封之

顛當瘻搗土瓜根傅至差慎口味

雀瘻取母猪屎灰和臘月猪脂傅瘡虫出如雀形

膿瘻桃花末和猪脂封之佳

石瘻兩頭出令人寒熱搗槐子和井花水封之

灸漏法葶藶子二合豉一升搗令極熟作餅如大錢

厚二分許取一枚當瘡孔上作大艾炷如小指大

灸餅上三炷一易三餅九炷隔三日復一灸之如是頭瘡不可灸葶蘆氣入腦殺人

又方七月七日日未出時取麻花五月五日取艾等分合搗作炷用灸瘡上百壯亦灸癰瘰

九漏灸肩井二百壯

又方灸鳩尾骨下宛宛中七十壯

又方遶四畔灸差

諸惡漏中冷息肉灸足內踝上三壯二年六壯

癰瘰白蘊蚕治下篩服五分匕日三十日差

又方故鞋羶替燒末五匕和酒一升平旦向日服之行須臾吐鼠三朝服

又方狼屎末傅之

又方五月五日取一切種種雜草煮汁洗

一切瘰癧及觸處但有肉結凝似作瘰癧及癰節者以
獨頭蒜截兩頭留心大作艾炷隨蒜大小貼瘰癧子
上灸之勿令上破肉但取熱而已七壯一易日日
灸之取消止

瘰癧灸兩胯裏患瘰癧處宛宛中日一壯七日止神驗
又方灸五里人迎各三十壯

又方灸背兩邊腋下後文上隨年壯

又方灸耳後髮際直脉上七壯

去面黥黥成鍊松脂為末溫酒服三合日三服盡三

升無不差

又方白附子末酒和傳之即落

脚氣腫已入脛至小腹脹小便澀少取烏特牛尿一升一服日二取消乃止又云羸瘦人二分尿一分牛乳合煮乳結服

口中瘡久不差入胸中並生瘡三年已上不差者濃煎薔薇根汁含之又稍稍咽之日三夜一冬用根夏用莖葉

又方角蒿灰傳之一宿知二宿差有汁吐不得咽也癰搗刺薊汁服之又服地黃汁佳又燒蛇脫一具酒服又服驢尿良又搗葭苈根蜜和傳之一無根字

又方熱搗煎餅不限多少日一徧薄之良

又方醋煎艾塗之

又搗羊蹄根和乳塗之

瘰癧昆布二兩洗切如指大酢漬含咽汁盡愈

又方海燕一斤又云三兩小麥麴一升以三年酢一升麴末暴乾往反酢盡搗為散酒服方寸匕日三

忌努力

瘰癧上氣短氣灸肺輸百壯

瘰癧上氣胸滿灸雲門五十壯

肉瘤勿治治則殺人又云不得針灸

陰癰取楊柳枝脚指大長三尺二十枚水煮令極熱

以故布及氈掩腫處取熟柳枝更互柱之如此取差

浸淫瘡以煎餅乘熱搗之亦治溼癬

又方猪牙車骨年久者椎破燒令脂出熱塗之

又方取苦練皮或枝燒作灰傅乾者猪膏塗并治小

兒秃瘡諸惡瘡

癰瘡酢一升溫令沸以生薤一把內酢中封瘡上差止

又方炒臘月糟薄之

又方燒故履系末傅之

又方燒松根取脂塗之

燥癩瘡酢和灰塗之又熱牛屎塗之

癩疥瘡癢不可堪羊蹄根淨去土細切熟熬以酢和
熟搗淨洗瘡傳上一時間以冷水洗之日一又陰
乾作末癢時搔汁出以粉之又以生葱根搗之
又方灸足大指奇間二七壯灸大指頭亦佳
白殿平旦以手掉取韭頭露塗之極效

痔第十七

痔以蒲黃水服方寸匕日三良又取桑耳作羹空腹
飽食之三日食佳

痔下血及新產漏下好礬石一兩附子一兩末之白
蜜丸如梧子大酒服二丸日三稍加不過數日便

斷百日服之終身不發一方有乾薑一兩

五痔十年者塗熊膽取差止一切方皆不及此神良
又方七月七日多採槐子熟搗取汁內銅器中重縣
密蓋着宅中高門上暴之二十日已上煎成如鼠
屎大內穀道中日三亦主瘻及百種瘡

又方痔下血及新產漏下常食篇竹葉及煮羹粥大
佳

又方虎頭犀角末之如雞子大和不經水豬脂大如
雞子塗瘡上取差

五痔取槐根煮洗之

又方取桃根煮洗之

痔出膿血有虫傍生孔竅槐白皮一担剉內釜中煮
令味極出置大盆中適寒溫坐其中如浴狀虫悉
出冷又易之不過二三即差

久冷五痔便血灸脊中百壯

五痔便血失屎灸回氣百壯穴在脊窮骨上

肛出女萎一升以器中燒坐上熏之即時入

脫肛蒲黃二兩以猪脂和傅肛上內之二三愈

腸隨肛出者生枯萋根取粉以猪脂為膏溫塗隨手

押按自得縮入

冷痢脫肛枳實一枚石上磨令滑澤鑽安柄蜜塗灸
令暖慰之冷更易之取縮入止

又方鐵精粉內上按令入即愈

又方生鐵三斤以水一斗煮取五升出鐵以汁洗日

再

因寒冷脫肛灸臍中隨年壯

又灸橫骨百壯

又方灸龜尾七壯即後窮骨是也

千金寶要卷之五終

千金寶要卷之六

小有居士河陽郭思纂

千金論曰上醫醫未病之病中醫醫欲病之病下醫醫已病之病思以謂知病于未病之前者此上智之所能也知病于欲病之初者此中智之所及也若夫已病而求醫則常情同然不必論其智不智也孫氏曰聖人設教欲家家自學人人自曉尊親有疾不能療之者非忠孝也斯言可謂切至矣

氣不調百病自生衆病積聚皆起于虛又曰虛生百病藥石有相欺者入人腹中遂相鬭爭力甚刀劍言不知性氣者不可服也凡服食藥餌須量自己性理所宜不可見彼得力我便服之人患瘡痍未瘳不得

合陰陽

婦人妊娠食羊肝令子多厄食山羊肉令子多病食
驢肉延月食兔犬肉令子無音聲并缺唇食騾肉產
難食雞子及乾鯉魚令子多瘡食襪并鴨子令子倒
出食雀肉并豆醬令子面多黥黯黑子食雀肉飲酒
令子心淫情亂不畏廉恥食鱉令子短項食冰漿絕
胎多經大驚者生子患癩向非常地大小便必半產
殺人穢汚死喪家人來看視產婦則難產傷兒不依
產圖令子母多妨產乳若在反支月者浣濯水以器
盛出此忌月方覆之產婦人衆看則難產臨產憂悵
則難產兒已生不得自視穢汚便利于懸厠之上成

十二痼疾產後百日内勿行房大忌上廁只室中上盆佳暑月產卧忌取涼百日忌服轉瀉藥月經不去大忌合陰陽生十二疾卧濕冷地大忌合陰陽生十二疾大忌以冷水洗浴合陰陽生十二疾

小兒初生不以繇裹指拭口中青泥惡血則入腹生百病初生舉之遲則中寒臍帶隔衣咬斷之不得以刀子截臍帶留至足跌短則中寒下痢斷臍後浴者水入臍令兒腹痛臍帶中多有虫不去之則入腹成疾臍留六寸長則傷肌短則傷臟臍不以時截及按汁不盡則寒生臍風兒生男以父女以母故衣裹之過厚皮膚害血脉發雜瘡而黃新生兒衣暖大厚令

筋骨緩弱解脫兒臍及換衣如冬月須閉戶生三日
朱蜜食多則脾胃冷腹脹喜陰痢氣急變噤而乖臍
帶瘡未愈數洗浴令兒患陰頰兒太飽則吐及風中
臍夏不去熱乳令兒嘔逆冬不去寒乳令兒欬痢母
新房以乳兒令兒羸瘦交脛不能行母有熱以乳兒
令變黃不能食母怒以乳兒令喜驚發氣疝又令上
氣顛狂母新吐下以乳兒令兒虛羸母醉以乳兒令
兒身熱腹滿乳兒當極按散其熱氣勿令奔出乳兒
不得用宿乳母欲寐則不得乳兒恐失飢飽及填兒
口鼻也浴兒水不冷熱得所則令兒驚亦致五臟病
兒冬不可久浴久浴則傷寒夏不可久浴久浴則傷

熱數浴背冷則發癰小兒不浴又令兒毛落衣暖至汗出却外風入腹為病因驚怖大啼多為病因先不哺乳吐而變熱者為癰新生無病懼不可逆針灸衣甚薄則乳食不消大便醋臭此欲為癖也乳哺食節作疾新生一歲兒外人來氣息忤之則為客忤病雖是家人或別房異戶從外還者不避之為客忤雖是乳母及父母從外來亦能令兒為客忤一應親戚及外來人有衣服經履鬼神麤惡暴氣或牛馬之氣并能令兒為客忤一應人執作喘息及乳母乳氣未定者并能為客忤乳母遇醉及房勞喘後乳兒最劇能殺兒凡諸乘馬行得馬汗氣息未盥洗易衣裝而便

向兒邊者令兒中馬客忤一歲兒勿見馬來及聞馬
鳴驚能令兒作客忤兒衣布帛絲中及履中不得有
頭髮白衣不得用青帶青衣不得用白帶皆能為客
忤凡非常人及諸物從外來亦驚小兒致病欲防之
法當將兒避之若不避者當燒牛屎令常有煙氣置
戶前則善秋初夏末晨夕暴冷不避之多患肚熱下
痢小兒解着傷風亦作傷寒病尋常晚夜及陰雨夜
小兒衣物不得在露地有釣星鬼禽喜落毛羽于人
中庭置兒衣中便令兒作癇病必死七八月尤忌兒
生未能行而母再有娠使兒飲此乳作魘病小兒飲
食過度不知自止作疾小兒夏月積冷洗浴過度及

乳母亦將冷水洗浴以冷乳飲兒兒壯熱忽值暴雨涼即令兒病痢等夏月暴寒小兒不避之入胃則暴病中客忤心腹脹滿刺痛口噤氣急停屍卒死者服張仲景備急丸

人失明之本有十六件事生食五辛接熱飲食熱食麪食飲食不已房室無節極目遠視數看日月夜視星火夜讀細書月下看書抄寫多年雕鏤細作博奕不休久處煙火泣淚過多刺頭出血過多又由馳騁田獵冒涉風霜迎風追獸日夜不息之所致也

地因寒暑風溼皆作蒸氣人足履之謂之風毒名為脚氣婦人產後尤宜慎此四時之中不得久立久坐

溼冷之地令人作脚氣病酒醉汗出脫衣靴襪當風
取涼皆成脚氣患脚氣人忌大怒忌房室忌牛羊肉
蒜薹菜菔菜蔓菁瓠子酒麪酥油乳糜猪雞鵝鴨不
得犯之一方用鯉魚外魚亦忌又忌生果酸酢之食
宜食生牛乳與生栗子及粳梁粟米醬豉菹韭薤椒
薑橘皮

病有三患一患覺之晚二患驕狠恣傲三患狐疑不
決犯之多枉傷性命故曰法為信者施不為疑者設
欲臨近亡人宜將少金牙散塗鼻孔耳門及視疾者
亦然亦宜帶絳囊一方寸匕男左女右

新食畢取風者令人患胃風因醉取風者令人患漏

風新沐浴畢取風者令人首風新房室畢取風者令人患內風尊貴人骨弱肌膚盛因疲勞汗出偃卧不時動搖被微風所及得血痺疾凡常之日忽然暴熱頓取涼快意生病亦然暴寒亦然

冬時嚴寒最宜周密若觸冒之者為傷寒四時之氣皆能為病其傷寒尤重以其殺厲之氣故也辛苦之人春多患溫病以冬時多觸冒寒冷所致時行之氣犯之多病所謂時行之氣者春時應暖而反大寒夏時應熱而反大冷秋時應涼而反大熱冬時應寒而反大溫凡熱病大病新差之後食豬肉及羊血肥魚油膩等物必大下痢醫所不能治食餅餌菜羹飽哺

鰾炙棗栗諸果物脯脩及堅實難消之物胃氣尚虛弱不能消化必更結熱下之則大痢難禁不下之必死下之復危皆難治也不可不慎但得食糜粥寧少食令飢勿飽不得他有所食引日轉久可漸食羊肉白糜若羹汁雉兔鹿肉不可食猪狗肉當靜卧勿早起梳頭洗面非但不可體勞雖言語亦不得多亦不得生心用意煩勞凡上氣事並令人勞復女勞當舌吐數寸而死凡差未滿百日氣力未平復而以房室者畧無不死未滿五日食一切肉麪病更發大困食生魚鮓下痢必不止食生菜令人顏色終身不平復病新汗解飲冷水者損心胞令人虛補不復食生棗

及羊肉者必膈上作熱蒸食犬羊等肉者骨中蒸熱
食魚肉與瓜生菜令人身熱食鱸者病發必大困早
起勞多及美飲食過多致發欲死

穀疸者由失飢大食胃氣衝熏所致酒疸者由大醉
當風入水所致女勞疸者由大勞大熱而交接畢入
水所致黃疸有人以竹筒使人極吹病人鼻中者無
不死大慎之

夏傷暑至秋作瘡瘧冬中于風寒氣藏于骨髓中至
暑有所用力腠理開又中邪氣能作瘧肺有熱因有
所作用力腠理開能令作瘧

交接損令人卵縮筋攣

食生物令虫卵生入腹者成虫蛇及魚鼈勞倦或飲
食過常作吐血

服藥吐利後常須閉口少語于無風處溫牀暖食將
息

凡人執作汗出當風因以房室過度醉飲飽滿行事
令心氣逼迫短氣脉悸得風癰病

熱沐髮而濕結之腦汗未止得濕癰病

因大驚及當風從高墜下致喜悲善恐怖如有鬼物
患

有所擊仆若醉飽入房汗出當風則必傷脾

凡患痢服止藥初間痢須轉劇愚人不能便不服其

藥此誤也但服不過再三服之痢病通忌生冷酢滑
猪雞魚油乳酪酥乾脯醬粉鹽所食諸食皆須大熟
爛為佳亦不得傷飽

凡疳鹽醬酢酥油棗皆忌惟白飯豉苜蓿苦苣蕪菁
不在禁限

凡日月蝕時忌食飲腹中生蠱虫及房室生子不具
足必患月蝕瘡日月蝕不得與兒乳日月生後乃不
忌令人口臭齒斷宣露常有血出舌上生瘡

飲酒當風入肺膽氣妄泄即令人目青氣喘酒客勞
倦當風喜怒氣含于肺面目黃腫即頭眩欬逆上氣
時忽忽欲絕心下弦急不能飲食或吐膿血胸痛引

背支滿欲嘔

七氣者寒氣熱氣怒氣悲氣喜氣憂氣愁氣此七種氣積聚堅大如杯若棗在心腹中疾痛不能飲食時來時去每發欲死如有禍祟

尸疰鬼疰者即五尸之中尸疰也又挾諸鬼邪為害者也其大畧令人寒熱淋瀝沉沉嘿嘿不的知其所苦而無處不惡累年積月漸就頓滯以至於死死後復注易傍人乃至滅門覺如此候宜急療之

人有九虫其虫凶惡人之極患也常以白筵草沐浴佳根葉皆可用既是香草又尸虫所惡也凡服補藥及治諸病皆須先去諸虫并痰飲宿癖醒醒除盡不

爾必不得藥力脾勞熱有虫在脾中令人好嘔肺勞
熱生虫在肺腎勞熱四肢腫急有虫曰蟻虫如菜中
虫在腎人得傷寒及天行熱病腹中有熱及人食少
腸胃空虛若齒斷無色舌上盡白甚者唇裏有瘡四
肢沉重忽忽喜眠當數看其上唇內有瘡唾血唇內
如粟瘡者心內懊懣痛悶者此有三虫在上蝕其五
臟下唇内生瘡者其人喜眠此虫在下蝕其下部人
不能知可服蝕虫藥不爾蠶虫殺人熱病蝕毒令人
喜寐不知痛處而面赤如醉下利膿血當數視其人
下部大小之孔稷稷然亦則是蠶虫也劇能殺人
若有所用力舉重若入房過度汗出如浴水則傷腎

人因身勞汗出衣裏冷濕久而得腎著之病身體重腰以下如帶五千錢腰中冷如冰又其人本來不吃忽然寒吃而好真寒反常性此腎之傷也取寒眠地卧冷濕地氣所傷則腰痛墜墮傷腰則腰痛房室後用則腰痛肝傷善夢心傷善忘脾傷善飲肺傷善痿腎傷善唾骨傷善飢肺傷善嗽遠思強慮傷人憂恚悲哀傷人喜樂過度傷人忿怒不解傷人汲汲所願傷人戚戚所患傷人寒暄失所傷人

五勞七傷有小腹急痛膀胱虛滿手足逆冷食飲苦吐酸痰嘔逆泄下少氣目眩耳聾口焦小便自利者虛損少氣腹脹內急拘引小腹至冷不得屈伸不能

飲食寒熱頭痛手足逆冷大小便難或復下痢口乾
夢中泄精或時吐逆恍惚面色枯痺又復微腫百節
酸疼者

五勞七傷虛羸不足面色黎黑手足疼痛久立腰疼
起則目眩腹中懸急而口絕傷外引四肢者

虛勞寒口飲在脇下決決有聲飲已如從一邊下決
決然也有頭並衝皮起引兩乳內痛裏急善夢失精
氣短目眊眊忽忽多忘者

五勞七傷小腹急臍下膨亨兩脇脹滿腰脊相引鼻
口乾燥目暗眊眊憤憤不樂胸中氣急逆不下飲食
莖中策痛小便黃赤尿有餘瀝夢與鬼神交通去精

驚恐虛乏者

凡男女有因積勞損或大病後不復常苦四體沉滯
骨肉酸疼吸吸少氣行動喘悞或小腹拘急腰背強
痛心中虛悸咽乾唇燥面體少色或飲食無味陰陽
廢弱悲憂慘戚多卧少起者

有大勞虛劣寒熱嘔逆下焦虛熱小便赤痛客熱上
熏頭痛目疼骨肉痛口乾者

有虛勞不足四肢煩疼不欲食食則脹汗出者

有虛勞少氣胸心淡冷時時驚惕心中悸動手脚逆
冷體常自汗腸鳴風濕者

有虛勞損羸乏欬逆短氣四肢煩疼腰背引痛耳鳴

面黎黑骨間熱小便赤黃心悸目眩者

有大虛不足小便數噓吸焦燭引飲膀胱滿急者

有左脇氣衝膈上滿頭上有風如虫行手足頑痺鼻
塞脚轉筋兩目時腫痛者

有虛損短氣咽喉凝唾不出如膠塞咽喉者

有五勞六絕其心傷者令人善驚妄怒無常者

有五勞六絕其脾傷者令人腹滿喜噫食竟欲卧面
目痿黃者

有五勞六絕其肺傷者令人少精腰骨痛四肢厥逆
者

有五勞六絕其肝傷者令人少血面黑者

有金匱要略卷之六
有六勞六絕其腎傷者有積聚少腹腰背滿痺欬唾
小便難者

六絕之為病皆起于大勞脉虛外受風邪內受寒熱
令人手足疼痛膝以下冷者

有五勞六絕腹中雷鳴時時泄痢者

有五勞六絕或閉或痢面目腫心下憤憤不欲語憎
憎聞人聲者

有五勞七傷八風十二痺無有冬夏悲憂憔悴者凡
是病皆須服之者

有虛勞百損者

有五勞六極七傷虛損者

男子女人虛損傷絕頭目眩骨節煩痛飲食微少羸瘦百病者

有虛勞腎氣不足腰痛陰寒小便數囊冷濕尿有餘瀝精自出陰痿不起忽忽悲喜者

有五勞七傷六極強力行事舉重重病後骨髓未滿而行房室所食不消胃氣不平者

有五勞七傷每事不如意者

有陰下濕癢汗出或生瘡莖中痛者

有溺血者

有膀胱冷欬唾有血喉鳴喘息者

有膀胱腎冷坐起欲倒目眊疏氣不足骨痿者

有膀胱寒小便數漏精稠厚如白米泔者

有胞屈僻津液不通者

有尿白濁者

有胞轉者

有上焦熱腹滿而不欲飲食或食先吐而後下肘攣痛者

有上焦飲食下胃汗出面背身中皆發熱者

有上焦冷下痢腹內不安食好注下者

有上焦閉塞乾嘔嘔而不出熱少冷多好吐白沫青

涎吞酸者

有中焦實熱閉塞上下不通隔絕關格不吐不下腹

滿彭彭喘急者

有中焦熱水穀下痢者

有中焦寒洞泄下痢或因霍亂後瀉黃白無度腹中虛痛者

有下焦熱大小便不通者

有下焦熱或下痢濃血煩悶恍惚者

有下焦熱毒痢魚腦雜痢赤白臍下小腹絞痛不可忍欲痢不出者

有膀胱三焦津液不下大小腸中寒熱赤白泄痢及腰脊痛小便不利及婦人帶下者有下焦虛寒津液不止短氣欲絕者

有下焦虛寒損或見血後便轉此為亡血或利或不
利

有下焦虛寒損或先便轉後見血此為遠血或利或
不利好因勞冷而發者

有三焦虛損或上下發泄吐唾血皆從三焦起或熱
損發或因酒發者

有手足厥冷脉絕者

有下焦虛寒損腹中瘀血令人喜恚不欲聞人語胸
中噎塞而短氣者

有吐下汗出而小便復利或下利清穀裏外熱脉微
欲絕或發熱惡寒者

凡霍亂務在溫和將息若冷則遍體轉筋此病定一日不食為佳仍須三日少少喫粥三日已後可依常食息七日勿雜食為佳所以養脾氣也

有霍亂吐下脹滿食不消心腹痛者

有霍亂吐利止而身體痛不休者

有霍亂轉筋血冷汗出嘔哕者

有霍亂吐利已斷汗出而厥四肢拘急不解脉微欲絕者

有霍亂已服理中四順熱不解者

有婦人霍亂嘔逆吐涎沫者慎不可下

有年老霍亂羸劣冷柔惡心食飲不化心脹虛滿拘

急短氣嘔逆四肢厥冷心煩氣悶而須汗者

有毒冷霍亂吐利煩嘔轉筋肉冷汗出手足指腫喘息唾死絕語音不出者

有霍亂盡宿食不消積冷心腹煩滿鬼氣者

有霍亂洞下不止者

有霍亂引飲飲輒乾嘔者

有先服石人因霍亂吐下服諸熱藥吐不得止因即變虛心煩手足熱口乾燥欲得水嘔逆迷悶脉急數者

有時行熱病後毒未盡因霍亂吐下仍發熱心胸欲裂者

有霍亂皆因飲食非關鬼神因飽食耽膾復餐乳酪
海陸百品無所不噉眠卧冷席多飲寒漿胃中諸食
結而不消所致思謂此說止為貴者言若貧下此症
亦以瓜李生冷不慎致然

霍亂人忌與米飲胃中得米即吐不止但與厚朴葛
根飲若冬瓜葉飲但沾漬咽喉而不可多與若服湯
時隨服吐者候吐定乃止診脉絕不通以桂合葛根
為吐下心煩肉熱汗不出不轉筋脉急數者可犀角
合葛根為飲吐下不止發熱心煩欲飲水可少飲米
粉汁為佳若不止可與葛根薺苳飲服之

婦人霍亂嘔吐者

霍亂四逆吐少嘔多者

霍亂久將遠行預備者

霍亂永不發丸者

中熱霍亂暴利心煩脉數欲得冷水者

陰陽二氣擁而反戾陽氣欲升陰氣欲降陰陽乖隔
變成吐利頭痛如破百節如解遍體諸筋皆為回轉
論症雖小卒病之中最為可畏雖臨深履危不足以
喻之

人生放恣者衆盛壯之時未自慎惜快情縱慾極意
房中稍至年長腎氣虛竭百病滋生時服石散真氣
既盡石氣孤立惟有虛耗唇口乾焦精液自洩或小

便赤黃大便乾實所食之物皆化作小便此皆由房室不節之所致也

熱結中焦則為堅

下焦熱則為溺血令人淋閉不通

氣淋之為病溺難澀常有餘滯

石淋之為病莖中痛溺不得出

膏淋之為病尿似膏自出

勞淋之為病勞倦即發痛引氣衝下

熱淋之為病熱即發甚則尿血

下焦結熱小便赤黃不利數起出少莖痛或血出溫病後餘熱及霍亂後當風取熱過度飲酒房勞及行

步冒熱冷飲逐熱熱結下焦作淋及散石熱動關格
小腹堅胞脹如斗諸有此淋悉治之立驗
錄忌如左

喪孝

產乳

音樂

一切魚

一切肉

誼戲

房室

酢滑

生冷

蒜

粘食

米豆

油膩

右並忌不得食及不得用心其不禁者並具本方之
下再發若不爾若雖差復發復發不可治
婦人產後飲水不即消三焦決漏小便不利仍相結
漸漸生聚遂流諸經絡故也

忌腹上出水出水者一月死大忌之

第一唇黑傷肝

第二缺盆平傷心

第三臍出傷脾

第四背平傷肺

第五足下平滿傷腎熱結為淋者

人氣急積久不差成水病者

有患水腫細腹堅如石小勞苦足脛腫小飲食便氣急此終身疾不差服丹參亦可愈

酒客有虛熱當風飲冷水腹腫陰復脹滿者

水病有通身洪腫者流腫者百藥治不差而欲死者有大腫眼合不欲開短氣欲絕者

男子女人新久腫得暴風入腹者

婦人新產上廁風入臍腹中如馬鞭者噓吸短氣欬嗽者

耆婆萬病丸

牛黃 麝香 犀角 一方云一銖今各二分 桑白皮 茯苓

乾薑 桂心 當歸 芎藭 芍藥 甘遂

黃芩 蜀椒 細辛 桔梗 巴豆 前胡

紫苑 蒲黃 葶藶 防風 各二分 蜈蚣 齋 石蜥蜴

人參 寸 朱砂 雄黃 黃連 大戟 芫花

禹餘糧 芫青 七枚

右三十一味並令精細牛黃麝香犀角朱砂雄黃禹

餘糧巴豆別研餘者合搗重絹下篩以白蜜和更搗三千杵密封下破除日平旦空腹酒服三丸如梧子大取微下三升惡水為良若卒暴病不拘平旦早晚皆可服但以吐利為度若不吐利更加一丸或至三九五丸須吐利為度不得限丸數病強藥少即不吐利更非他故若其發遲以熱飲汁投之若吐利不止即以醋飯兩三口止之服藥忌陳臭生冷醋滑粘食大蒜猪雞魚狗牛馬驢肉白酒行房七日外始得一日服二日補之得食新米韭骨汁作羹粥臠食之三四頓大良亦不得全飽產婦勿服吐利以後常須閉口少語于無風處溫牀暖室將息若旅行卒暴無飲

以小水送之為佳若一歲以下小兒有疾者令乳母服兩小豆亦以吐利為度近病及卒病皆用多積久疾病即少服常取微溘利為度崔氏無黃芩桑白皮桔梗防風為二十七味

萬病丸治症開錄如左

卒病欲死

蠱毒吐血腹痛如刺

卒中惡口噤

五疰鬼刺客忤

猫鬼□□□

瘡病未發前一日

諸有痰飲

患冷癖

宿食不消

癥瘕積聚

拘急心腹脹滿心痛

上氣喘逆胸滿不得卧

傷寒時行

大痢

疳濕

水病

頭痛惡寒

小便不通

大便不通

耳聾耳鳴

鼻衄

癰腫

疔腫

犯疔腫血出

胸背腰脇腫

癰瘡用萬病丸傳之

瘰癧

痔瘡

冷瘡積年不差者

癰瘡

惡刺

蝮蛇螫

蝎螫

蜂螫

婦人諸疾胎衣不下

小兒客忤

小兒驚癇

小兒乳不消心腹脹滿

仙人玉壺丸

雄黃 藜蘆 丹砂 礬石一作礬 巴豆

八角附子各二兩

右六味先搗巴豆三千杵次內礬石又搗三千杵次內藜蘆三千杵次內附子三千杵次內雄黃三千杵次內丹砂三千杵內蜜又搗萬杵若不用丹砂內珍珠四兩無在每內藥輒治五百杵內少蜜恐藥飛揚治藥用王相吉日良時童子齋戒為良天晴明日無雲霧白晝藥成封密器中勿泄氣着清潔處大人服丸如小豆欲下病者宿勿食平旦服二丸不知者以粥飲發之令下下不止飲冷水以止之病在膈上吐膈下利或但噫氣即已若欲漸除及將服消病者如

麻子大三丸卒中惡欲死不知人以酒若湯和二丸
強開口灌喉中鬼疰病百種不可名漿水服二丸日
再

玉壺丸治症開錄如左

男女與鬼交通歌哭無常

腹中若有虫欲鑽脇出狀急痛一止一作

憂恚氣結在胸心若連噫及欬胸中刺痛

心腹切痛及心中熱

癖飲痰飲

諸疰

卒中氣氣但出不入并逆氣衝喉胃中暴積聚

癰結堅痞

積寒熱痞

食肉不消腹堅脹

腹中三虫

下痢重者

卒關格不得大小便欲死

瘡已發未發

卒霍亂心腹煩滿吐下手足逆冷并寒熱往來

傷寒較瀉時氣熱病

淋瀝疲瘦百節酸疼

頭卒風腫

癰疽疔瘡癰瘰及欲作瘰

鼠瘻

中水毒

齒痛

耳聾膿血汁出及卒聾

風目赤或癢視物漠漠淚出爛

中蠱毒吐血腹內如刺

中蛇蝮諸毒

獐犬所咋

狂馬所咋

婦人產後餘疾及月水不通往來不時

婦人胸中苦滯氣氣息不利小腹堅急繞臍絞痛
小兒百病驚癇痞塞及有熱

小兒大腹及中熱惡毒食物不化結成積聚

小兒寒熱頭痛呼熱及吐衄

小兒羸瘦下痢不能食食不化

欲問人孝省人病先服之及繫頭上

頭上繫玉壺丸辟百鬼

獨宿山澤冢墓廟社叢林之中燒一九百鬼走去
以蠟和一九如彈丸著絳囊繫臂男左女右山精
鬼魅皆畏之

千金須知

中慢驚為陰癇

緩縱為疳

淋為癰

黃為痺

強直為瘕

喘嗽為欬逆

隔氣為膏盲

熱死為暈

怔忡為悸

利為滯下

臟毒為痢之蠱毒

腸風為腸滯下血

咳逆為噦逆

服金石藥為服石

度者量也

漬者浸也

和者調也

傳者塗也

暴者瞀也

呔咀者秤畢細切也

三兩者今之一兩

三升者今之一升

方寸匕者正方一寸散子以不落為度

錢匕者五銖銅錢上全抄也

錢五匕者今五銖錢邊五字者以抄之令不落為度

半錢匕者一錢抄取一邊

梧桐子大者以二大豆準之

刀圭者如梧桐子大

一撮者四刀圭

如彈丸如雞子者十梧桐子準之

一升者取平升為正

一把者二兩

草一束者三兩

桂一尺者剉去皮半兩

甘草一尺者二兩

蜜一斤者有七合

猪膏一斤者二升二合

半夏一升者洗畢五兩

椒一升者三兩

吳茱萸一升者五兩

兔絲子一升者九兩

菴藺子一升者四兩

蛇牀子一升者三兩半

地膚子一升者四兩

巴豆以枚計者去皮心二分準豆六枚

附子烏頭以枚計者去皮半兩準二枚

枳實以枚計者去穰二分準二枚

棗三枚準一兩

生薑一累半兩

千金寶要卷之六終



陳氏小兒病源方論

江蘇古籍出版社

四庫未收書提要

掣經室外集卷三

陳氏小兒病源方論四卷提要

金陳文中撰文中字文秀宿州符離人官太常明大小方脈于小兒瘡疹尤造其妙金亡歸宋處連水十五年詳鄭全序案醫科一十有三小兒為啞科其治尤難是編分養子真訣小兒變蒸候又形證門及面部形畝皆先論後方鄭全云是書畝其形狀別其證候跡其方論釐為一卷今作四卷疑後人所分故書中有稱陳氏云者考諸家目錄所載宋代小兒方症各書今多不傳此本依宋刻影寫亦僅存之祕笈也

[illegible]

嘗聞范文正公之言曰不為宰相當為良
醫夫以宰相之尊豈醫者之卑所事同日
語反而思之宰相以道濟天下醫者以術
濟斯人其位望雖不同其存心於濟人一
也余見世之所謂醫者以病試藥以藥試
人比比皆是間有一劑而愈者出于幸也
孰能收萬全之効乎淳祐庚戌來遊漣水
所見鑿者惟陳公文秀一人而已陳公明

大小方脉於小兒瘡疹尤造其妙連水自
守將蕭宣使以下與夫時官富民之家多
以疾篤為憂群鑿環視縮手無措而公獨
優悠和緩隨證施治皆收奇功至於閭閻
細民以急告者公不以其家之窘窶匍匐
徃救所賴以全活者不可枚舉公又慮目
之所不見力之所不及者必罹夭枉之禍
於是面其形狀別其證候跡其方論釐為

一卷名曰小兒病源方論板而行之其意
欲使天下後世俱受其惠吁陳公之心其
文正公之心乎公姓陳名文中字文秀宿
之符離人也金亡歸

宋處漣水十五年

漣人無小大識與不識皆稱之為宿州陳
令居維揚鑒道盛行有子業儒呼臚喝六
之報其在是乎余得其書味之不釋手嘉
其用心古而擇術精故叙所見於卷末時

寶祐甲寅漣水戶曹鄭全子英序

陳氏小兒病源方論目錄

○卷之一

養子真訣

小兒胎稟

胎稟怯弱

養子調攝

論下胎毒

哺兒乳法

辨兒虛實

辨兒冷熱

病宜早鑒

養子十法

赤流丹毒

冰黃散

葛根白朮散

小兒變蒸候

變蒸形證

變蒸期候

神仙黑散子

桂芍散

卷之二

形證門

手紋三關圖

辨三關手紋訣

面部形圖

辨面色主病訣

辨兒形色歌附在後

肝臟形屬圖

肝臟受驚積冷熱論

心臟形屬圖

心臟受驚積冷熱論

脾臟形屬圖

脾臟受驚積冷熱論

肺臟形屬圖

肺臟受驚積冷熱論

腎臟形屬圖

腎臟受驚積冷熱論

○卷之三

驚風門

論驚搐病源

服藥次序

辨不救證

辨風搐源因

辨臟腑驚證

驚癇忤三證不同

論急驚風證

論急驚病源

論慢驚風證

論慢驚病源

論慢脾風證

方藥

芎藭散

油珠膏

補脾益真湯

前朴散

二聖元

長生元

塌氣元

遠志煎

疎隔元

牛黃元

醉紅散

不驚元

○卷之四

驚風引證

論寒痰作搐

論風痰搐搦

慢驚風證

急驚風證

痘瘡引證

泄瀉用藥

咬牙寒戰

瘡痘痒塌

表虛不長

裏虛不長

瘡不成痂

誤食生冷

身溫煩渴

瘡不起發

痘證驚搐

宣解之過

瘡爛膿淫

陳氏小兒病源方論目錄畢

[illegible]

陳氏小兒病源方論卷一

太醫陳文中述

養子真訣

○小兒胎稟

豪貴之家居於奧室懷孕婦人飢則辛酸鹹辣無所不食飽則恣意坐卧不勞力不運動所以腹中之日胎受軟弱兒生之後洗浴襁包藏於幃帳之內不見風日譬如陰地中草木少有堅實者也

○胎稟怯弱

小兒因胎稟怯弱外肥裏虛面皖白色腹中虛響嘔吐
乳妳或便青糞或頭大顙開若失治者後必爲慢驚
風而難愈也宜預服長生圓

○養子調攝

養子若要無病在乎攝養調和

喫熱

喫軟

喫少

則不病

喫冷

喫硬

喫多

則生病

忍三分寒

喫七分飽

頻揉肚

少洗澡

婦人乳汁者血也其血屬陰味甘而性冷飲乳小兒因
用湯水撮繳唇口致令冷氣入腹傷動脾胃遂成大
患也

○論下胎毒

古方言小兒始生落草之時便服朱砂輕粉白蜜黃連水欲下胎毒蓋今之人比古者起居攝養大段不同其朱砂輕粉白蜜黃連乃能傷脾敗陽之藥若與服之後必生患或吐或泄或驚悸大抵人之所生猶喘急或腹脹或腹中氣響或驚悸大抵人之所生猶樹木而有根本則枝葉茂盛若人之根本壯實則耐風寒免使中年之後服脾胃藥矣丹田三里穴也凡下胎毒只宜用淡豆豉煎濃汁與兒飲三五口其毒自下又能助養脾元消化乳食

○哺兒乳法

小兒百日晬內或嘔吐乳妳或糞青色用年少婦人乳汁一盞入丁香十枚去穢陳皮一錢於磁器內同煎一二十沸却去丁香陳皮稍熱與兒服之

○辨兒虛實

小兒面紅如桃花色大糞黃稠小便清澈手足和暖乃表裏俱實其子易養也不宜服藥切不可繳撮唇口亦不可服鎮心涼藥恐傷動脾胃嘔妳糞青而生驚掣之患

小兒面紅色乃爲童顏外實也

小兒大糞黃稠內實也

已上三證並不宜服藥

小兒吐乳食者胃冷也

小兒乳食不消化者脾虛也

小兒大便秘臭氣者飽傷也

已上三證宜多服長生元

小兒面眊白色者氣血衰少也入更加木香當歸木香散內

小兒大糞青色胃與大腸虛冷也入加丁香厚朴木香散內

小兒嘔妳者胃中寒也入加丁香陳皮木香散內

已上三證並宜服長生元木香散木香散內依前証各加二味

辨兒冷熱

小兒熱證

兩腮紅

大便秘

小便黃

渴不止

上氣急

脉息急

足脛熱

服上不可
熱藥

小兒冷證

面眇白

糞青色

腹虛脹

嘔乳妳

眼珠青

脉微沉

足脛冷

服上不可
冷藥

病宜早醫

昔韓伯休有病不服藥先當擇醫若不擇醫恐不死於病而死於藥

經云談方說藥易明脉識證難

古語云貧無達士將金贈病有閑人說藥方

病不早治

治不對證

迷邪謗正

順同惡異

病淹日久

困乃求鑒

縱得良醫

活者幾希

孫真人云能醫十男子莫治一婦人能治十婦人莫療一小兒醫有十三科最莫難於小兒也

養子十法

一要背暖

經云其背脊骨第三顚下去骨兩傍各一寸半是肺腧二穴也若背被風寒傷於肺腧經使人毫毛聳直皮膚閉而爲病其證或咳或嗽或喘或嘔或吐逆及胷滿增寒壯熱皆肺經受寒而得之故宜常令溫暖

二要肚暖

俗曰肚無熱肚肚者是胃也爲水穀之海若冷則物

不腐化腸鳴腹痛嘔噦泄瀉等疾生焉經云胃熱能消穀必能飲食故肚宜暖

三要足暖

經云足是陽明胃經之所主也俗曰寒從下起此之謂也

四要頭涼

經云頭者六陽之會諸陽所媵也頭腦爲髓之海若熱則髓溢汗泄或顛顛腫起或頭縫開解或頭瘡目疾俗曰頭無涼頭故頭宜涼

五要心胃涼

其心屬內火若外受客熱內接心火則內外俱熱也

其證輕則口乾舌燥頤紅面赤重則啼叫驚掣故心胃宜涼

六者勿令忽見非常之物

小兒忽見非常之物或見未識之人或雞鳴犬吠或見牛馬等獸或嬉戲驚觸或聞大聲因而作搐者緣心氣乘虛而精神中散故也常用補心溫氣藥治之如用鎮心法水銀牛黃朱砂金銀腦子等藥則成慢驚風搐如腹脹足冷者難治也

七者脾胃要溫

經云脾爲黃婆胃爲金翁主養五臟六腑若脾胃全固則津液通行氣血流轉使表裏沖和一身康健蓋

脾胃屬土而惡濕冷飲乳小兒多因變蒸上唇腫而頭熱或上氣身熱父母不曉妄作傷風傷食治之或以解藥出汗或以食藥宣利或以涼藥鎮心或以帛蘸湯水振繳唇口致令冷氣入兒腹內傷兒脾胃搏於大腸故糞便青色久而不已者即吐吐而不已者作搐見兒作搐又言熱即生風轉用涼藥治之因此敗傷真氣而不救者多矣經云脾土虛弱肝木盛冷故筋攣而作搐宜用補脾溫胃下氣藥治之藥性既溫則固養元陽冷則敗傷真氣是以脾土宜溫不可不知也

八者兒啼未定勿便飲乳

嘔妳蜚青色緣兒在胎之時其母取冷過度冷氣入於胎胞之中兒生之後因悲啼未定便與乳妳與冷氣蘊搐於腹內久而不散傷兒脾胃輕則嘔妳蜚重則腹脹肚鳴氣逆涎潮以致難愈急宜服長生園以治之

九者勿服輕朱

輕粉

味辛

性冷

下痰損心氣

朱砂

味甘

性寒

下涎損神氣

二味相合雖下痰涎其性寒冷損心損神亦不可獨用也

若兒胎受壯實服之軟弱也

若兒胎受怯弱服之易傷也

新生嬰兒下胎毒墜痰涎多致損害皆是輕朱二味之所誤也

十者宜少洗浴

小兒一週之內皮毛肌肉筋骨髓腦五臟六腑榮衛氣血皆未堅固譬如草木茸芽之狀未經寒暑嬌嫩軟弱今嬰孩稱爲芽兒故也一週之內切不可頻頻洗浴恐濕熱之氣鬱蒸不散身生赤遊丹毒俗謂之赤流片片如胭脂塗染皆腫而壯熱若毒入腹者則腹脹硬氣以致殺兒此因洗浴而得也若肌肉寬緩腠理開泄包裹失宜復爲風邪所乘而身生白流皆

腫而壯熱也或增寒壯熱鼻塞腦悶或上氣痰喘咳嗽吐逆種種之疾皆因洗浴脫着而得也爲兒父母宜鑑之哉

治赤流丹毒

可用一小篋刀子䟽去流頭赤暈惡血毒汁次以冰黃散塗之

冰黃散

土硝一兩

大黃細末一錢

二味相合新汲水調攪勻用雞羽蘸藥時時塗掃勿令乾

芎根白朮散治一切赤白丹腫毒

白朮一錢

茯苓

乾葛

木香

赤芍藥

甘草炙各錢半

枳殼

去穢
錢半
炒

右爲散每服三錢水一盞煎七分去滓溫服量兒大

小加減

小兒變蒸候

小兒有十變五蒸者乃生精神意智也五臟五腑以應
十干其心包絡與三焦合而成六臟六腑以應十二
經絡也

小兒變蒸者俗謂之牙生骨長譬如蚕之有眠龍之脫

骨虎之轉爪皆同此類變生而長也

○變蒸形證

變



生五臟
主其裏

始得之上唇有白珠泡子身熱
微欲驚悸或嘔噦至七日變訖

變兼蒸



生五臟
主其表

始得之上唇微腫有如卧蚕身體壯熱額
熱或乍涼乍熱唇口鼻乾噤氣嘔逆時欲
驚夜多啼哭至十三日變兼蒸訖

三大蒸



主其
表裏

唇口乾燥咳嗽悶亂噤氣腹痛及
身体骨節皆痛或目上視時驚悸

○變蒸期候

小兒始生至三十二日爲一變生癸

長腎臟氣足少陰經

六十四日(二變一蒸)生壬

長膀胱腑氣足太陽經

九十六日(三變)生丁

長心臟氣足少陰經

一百二十八日(四變二蒸)生丙

長小腸腑氣足太陽經

一百六十日(五變)生乙

長肝臟氣足厥陰經

一百九十二日(六變三蒸)生甲

長膽腑氣足少陽經

二百二十四日(七變)生辛

長肺臟氣足太陰經

二百五十六日(八變四蒸)生庚

長大腸腑氣足陽明經

二百八十九日(九變)生己

長脾臟氣足太陰經

三百二十日(十變五蒸)生戊

長胃腑氣足陽明經

心包絡為臟屬手厥陰經

三焦為腑屬手少陽經

右一臟一腑俱無形狀故不變不蒸也

前十變五蒸既訖後又有三大蒸

六十四日為一大蒸

計三百八十四日

又六十四日為三大蒸

計四百四十八日

又六十四日為三大蒸

計五百一十二日

至五百七十六日變蒸既畢

所以變者生五臟也變而蒸者養五腑也

兒乃成人也其血脉方充骨節始榮生精神長情性有

異於前

當變蒸之時看兒子唇口如上唇微腫有如卧蚕或有珠泡子者是變蒸證切不得艾火着灸即宜少與乳

食亦不可妄投藥餌若不依此必致殺兒文中屢見有此故書以告

神仙黑散子治小兒變蒸與傷寒相似者當詳其證若上唇中心有白點子者爲宜服此

麻黃

去節

大黃

杏仁

和皮各一錢

右燒存性爲末每服一字水半盞煎服抱兒於溫暖處連進有微汗身涼即瘥

惺芎散治小兒變蒸發熱或咳嗽痰涎鼻塞聲重

茯苓

白朮

人參

去蘆

甘草

桔梗

細辛

去苗

川芎

各等分

右為麤末每服三錢水一茶盞煎七分去滓稍熱不
飢不飽時服

陳氏小兒病源方論卷一


陳氏小兒病源方論卷二

太醫 陳 文中 著述

鰲 岑 熊 宗立 類正

形證門

手紋
三關
之圖



○辨三關手紋訣

夫小兒三歲以前血氣未定呼吸至數太過難以準候若有疾必須看其虎口紋脉辨驗形色可察其病之的要食指初節爲氣關中節爲風關末節爲命關古人云初得氣關病易治傳入風命便難陳

氣關易治

風關病深

命關黑死

有此通度三關脉候是極驚之候必死餘並可醫

男看左手

女看右手

青是四足驚

赤是水驚

黑是人驚

辨三關病源之訣未易言之詳見吳洪方及范元鼎虎口脉紋掌訣鄭氏幼幼新書此則持其大畧矣

面部形圖



陳氏云青主肝實白主肝虛赤主肝熱青主風入肺赤主肺氣熱一云紅赤而慘主傷寒

面青眼青肝之病面赤心之病面白肺之病面黃脾之病面黑腎之病先欲別其五臟所主次看稟受盈虧昭氣虛實明其形候審定生死然後施治是爲良醫也

○辨面色主病訣

詞曰

兒子天中青 多因菓子癥 若也天中紫
採食所傷因 黃色天中見 看來乳積成
龍角青筋起 皆緣四足驚 或然虎角黑
水撲是其形 赤色印堂上 兒驚必是人
眉間赤黑子 急療莫沉吟 紅赤眉毛下
分明死不生

又歌曰

面色黃時疳積攻 青而黯色是驚風
吐而亂白兼黃白 若是傷寒色赤紅

。木方東屬肝。

○五臟受驚馬積冷熱形證圖



詩曰

肝驚起髮際
肝積在食倉
肝冷面青白
肝熱正眉當

○肝臟受驚論

論曰候起髮際其色淺白若至丞相印即變驚風渾身

發熱夜間多啼宜下驚風藥若退即可調治若其色不退下至東岳即有死候耳前穴黑金克於木若是外候鼻乾燥眼睛吊上肝主筋筋縮則睛無光即是腎絕瞳子不轉即是肝絕爪甲黑也

○肝臟受積論

論曰候起食倉其色微黃下侵顴眉即是受積黑睛黃赤早晚發熱則愛睡乃死候啼哭無淚是也

○肝臟受冷論

論曰面青淡白眼中心淚出齒齦淡白口中清水大便酸氣日中多睡夜間煎逼是也

○肝臟受熱論

○ 火方南属心 ○

論曰候起正眉薄有赤氣即衝丞相心裏於肝兩眼亦
赤多有眼脂小者吐妳大者吐食有痰生風早晚發
熱多啼少睡



詩曰

心驚在印堂

心積額角荒

心冷太陽位

心熱面頰裝

○心臟受驚論

論曰候起印堂其色微黑下至眉心赤則生風若至鼻柱即有死候皮無血色更生血黧水克於火惡即兩日亥子難過外候多焦渴喫乳不收舌出口外是也

○心臟受積論

論曰候起額角太陽穴虛兩眼白赤小便如泔面合地卧即吐熱氣此惡候也

○心臟受冷論

論曰候起太陽黑筋脉子來侵印堂面色淡赤目即無光要轉妳食口吐清水日多煩渴

○心臟受熱論

脾屬中央土。

論曰候起面頰更臉赤色多驚少睡髮乾煩渴鼻下赤爛口氣衝人牙齦惡臭睡卧開口多有煩躁外候則吐虫也。



詩曰
脾驚正髮際
脾積唇應黃
脾冷眉中岳
脾熱穴太陽

○脾臟受驚論

候起髮際其色微青即傳於肝若至眉心其色漸赤即傳於心若至鼻柱其色必白若分兩耳黑氣連之即生驚風如此不退周時必死其候唇不蓋齒口無津液此是脾絕四肢逆冷此是胃絕胃主四肢五日後寅卯時死外候則瀉黑血也

○脾臟受積論

論曰口唇黃色兩眼沉腫早晚面浮太陽穴調外候頭疼腹脹大便秘食不消化頻頻夜起傷冷則瀉白糞若臟熱則赤若冷熱不調則赤白痢

○脾臟受冷論


論曰候起眉心中岳其色淡白來侵鼻柱元珠外候糞

金方西属肺。

白食不消化泄瀉無時下應唇白乃嘔逆面色黃赤

脾臟受熱論

論曰候起太陽穴白薄皮起如竹膜口唇乾燥兼有口氣外候小便赤大便秘夜間顛抖



詩曰

肺驚髮鬢赤

肺積髮際當

肺寒人中見

肺熱面頰傍

○肺臟受驚論

論曰候起髮鬢其色微赤傳於司空則生驚風外候氣喘無力多啼叫若至鼻梁即主死候作鵝聲喉中響哭無淚鼻乾黑燥是也

○肺臟受積論

論曰候起髮際其色微赤下至眉心腹脹惡心若至鼻梁更到準頭即是死候氣喘不迴只三日午未時死

○肺臟傷寒論

論曰候起人中下至承漿下頤春即青夏即赤秋即白冬即黑外候鼻涕流两眼赤昏兩頰赤喘氣喉響其惡候則面黑咬人鼻黑身熱氣喘不定是也

○ 水方北屬腎 ○

○ 肺臟受熱論

論曰候起面頰其色青白到衝承漿若外候鼻中出血
夜間多啼有煩躁甚則為疳也



詩曰

腎驚耳前穴
腎積眼泡相
腎冷額色紫
腎熱赤食倉

○腎臟受驚論

論曰候起耳前穴其色微黃下侵潮旦若外候夢中咬牙乃侵地閣則生惡候面黑惡叫汗出如膠粘其耳前穴黑也

○腎臟受積論

論曰候起兩眼深沉其色微黑眼睛微赤外候停耳兼龔顙門生瘡愈而又發是也

○腎臟受冷論

論曰候起額上色紫而微青下侵中岳滿面青白多喎頑涎亦多睡少精光也

○腎臟受熱論

論曰候起食倉其色微赤下到準頭而還日久涎爛外
候耳重聽多眼脂小便赤色是也

○辨兒形色歌

紫色紅傷寒

青驚白色疳

黑時因中惡

黃即困脾方

陳氏小兒病源方論卷二

陳氏小兒病源方論卷三

驚風門

小兒驚風二證方書未嘗分析詳細蓋驚自驚風自風當分別而治療之世俗通言熱極生風殊不知寒暑燥濕之極亦能生風見兒作搐不察形氣虛實便用牛黃朱砂腦麝之劑以致不救者多矣深可憫念今將祖父秘授小兒驚風二證源用方論集成一卷綴梓以廣其傳庶使小兒不致夭枉亦不失祖父濟人之意文中謹述

○論驚搐源因

蓄氣而作搐

結氣而成癇

小兒多因驚怖而風冷之氣蓄於咽喉間搏於心肺傳入肝膽其氣上不能升下不能降使津液上帶不得流行故痰涎壅閉而作搐矣○如腹中氣逆顛門腫陷則難愈

治法先去痰涎次固元氣元氣盛則津液行血氣流轉自然不搐

○服藥次序

先服

芎藭散

用法斡去寒痰冷涎

次服

油珠膏

潤心肺補脾腎

後服

益真湯

溫壯元氣

助服

前朴散

寬上實下

○辨不救證

搖而不休休而再搖

驚叫發搖汗出足冷

痰滿喉口開目直

○論風搖源因

一 小兒誤服涼藥鎮心宣導或用帛蘸湯水綴展唇

口因此傷動脾胃或泄瀉或腹脹或腹中氣響

二 小兒面少血色常無喜容不看上而視下

三 小兒顙顙高急頭縫青筋時便青糞

四 小兒肌體肥壯糞如青涕或如凍汁

五小兒時時

時時

驚風

已上五證忽時嘔吐者必成陰癇俗謂之慢驚風

醫患之家不究病之原因不分陰陽表裏又不察色脉虛實妄謂熱即生風便餌牛黃朱砂腦麝鎮心等藥因此敗傷真氣搖而不救者多矣蓋真氣者元陽也其藥性溫則固養元陽冷則敗傷真氣故宜用溫中下氣藥治之

○論臟腑驚證

(肝驚)

眼赤糞青

(膽驚)

面青下白

(心驚)

面臉紅赤

(小腸驚)

夜啼至曉

(脾驚)

五心熱乾嘔

(胃驚)

腹脹不食

(肺驚)

氣喘呖水

(大腸驚)

喉中疾作聲

(腎驚)

夢中咬牙

(三焦)

睡中驚哭

○驚癇忤三證相似

(驚)

即發拳搐

(癇)

即搐搦

(忤)

則掣掣

○論急驚風證

小兒平常無事忽發壯熱手足搐搦眼目戴上涎潮壅塞牙關緊急身熱面赤此(急驚風)證

急驚屬

(陽)屬腑

當治以涼

○論急驚病源

小兒素熱或因食生冷油膩鬲實有痰致肝有風熱而爲是病

○論慢驚風證

小兒面青白身無熱口中氣冷多啼不寐目睛上視項背強直牙關緊急嘔涎潮或自汗此慢驚風證

慢驚屬陰屬臟當治以溫

○論慢驚病源

小兒吐瀉惡心口乾吐奶舌出紅眼閉搖頭髮直心悶氣麤兩脇動口生白瘡

○論慢脾風證

夫小兒臟腑嬌嫩皮骨軟弱血氣未平精神未定言語未正經絡如絲脉息如毫不可妄投藥餌亦不可湯繖口舌無病者在手撮養如法調護正氣有疾者先

看外證詳明虛實而為治矣

①小兒頭雖熱眼珠青白而足冷

②小兒頭雖熱或腹脹而足冷

③小兒頭雖熱或瀉而足冷

④小兒頭雖熱或嘔而足冷

⑤小兒頭雖熱或渴而足冷

已上五證忽然吐而作搐者名曰慢脾風速與

補脾益真湯一服每服三錢更加全蝎一枚

如因驚而搐者宜與

前朴散一服每服三錢更加附子前胡各半錢

小兒亦有下虛上實裏寒外熱之證

方藥

芎蝎散治小兒腦髓風顛顛開解皮肉筋脉急脹腦骨
縫青筋起面少血色或腹中氣響時便青白色沫或
嘔吐痰涎欲成慢驚風搐足脛冷者或大人氣上衝
胷滿頭面腫痒

川芎

華撥各一兩

蝎稍去毒錢煨

細辛去苗

半夏

酒浸一宿湯洗七次焙乾各二錢

右為細末熱湯調稍熱空心服一周兒每服抄一小
銅錢量兒大小加減

若痰滿胷喉中眼珠斜視速與服

目上直視覩不轉睛者難救

或痰氣壅塞不能嚥藥用一指於兒喉靨中探吮就幹去寒痰冷涎氣稍得通以藥灌之次服補脾益真湯或以油珠膏選用之

疾之生死大抵在人之主持此方家傳累世活幼甚效文中今以刊行流布使養子之家無夭橫之痛幸甚

油珠膏補脾腎潤心肺專治氣逆嘔噦及風痰作搐並宜服之

石亭脂

硫黃中揀取如蠟色者

滑石各半兩

半夏

酒浸七次焙湯

黑附子炮去

天南星

瀾浸一宿湯

右爲細末每服一錢匕用冷清齋半盞滴麻油一點如錢大抄藥在油珠上須臾墜下却去其齋與兒服隨後更用溫清齋三五口壓下肚飢時服訖候一時久喫乳食量兒大小加減藥

補脾益真湯治小兒胎稟怯弱外實裏虛因嘔吐乳妳糞便青色而成慢驚風氣逆涎潮眼珠直視四肢抽搐或因變蒸客忤而作或因持拘驚嚇而作或因誤服鎮心寒涼藥而作

木香

當歸

人參

黃耆

丁香

訶子肉

陳皮

厚朴姜製

甘草炙

肉豆蔻

麩裏

草果

茯苓

白朮

官桂

半夏

湯泡七次
姜汁製

附子

炮各等分

全蝎

去毒微炒
一個

右咬咀每服三錢水盞半姜二片棗一枚煎六分去滓肚飢稍熱服服訖心腹揉動以助藥力候一時久喫乳食

渴者去附子丁香肉豆蔻加茯苓人參

瀉者加丁香訶子肉

嘔吐者加丁香半夏陳皮

腹痛者加厚朴良姜

腹脹者加厚朴丁香前胡枳殼

咳嗽加前胡五味子去附子官桂草果肉豆蔻
痰喘加前胡枳殼赤茯苓去附子丁香豆蔻草果
足冷加附子丁香厚朴

氣逆不下加前胡枳殼去當歸附子肉豆蔻

惡風自汗加官桂黃耆

已上加減與正方同等分

此藥性溫不燥亦治大人渴疾湯飲盛穀蕩滌脾胃
以致臟腑虛弱喫食減少精神無力日久衰困而成
淹滯之患

前朴散治心腹結氣或嘔噦泄瀉腹脹時痛或發驚悸

並宜服

前胡

白朮

人參去蘆

陳皮

良姜炒

藿香

甘草炙

厚朴姜製各等分

右咬咀每三錢水一大盞煎至七分去滓稍熱肚飢時服

（二聖元）治小兒腹脹足冷面冷或腹中氣響而足冷或水瀉而足冷或渴面足冷或糞青足冷或頭溫足冷或脉沉微而足冷

石亭脂

如蠟塊一兩

黑附子

炮去皮半兩

右爲末飯丸如黃米大周歲兒每服十九空乳汁

送下候一箇時久得喫乳量兒大小增減元數秘傳

累驗

長生元寬上實下補脾治痰止瀉

檳榔

枳實

炒各一兩

木香半兩

砂仁

半夏

姜製

丁香

肉豆蔻

煨黑

全蝎

去毒尖

右爲末飯元如黍米大一周兒服五十元空心乳汁

下粥湯亦可服訖半時久得吃乳食日二服

塌氣元治小兒脾虛腹脹或疳瀉黃瘦

青皮一兩

葶撥

胡椒略半

木香

二錢半

全蝎

五枚

右爲末醋糊元如黃米大一周兒服十五元乳汁下
粥湯亦得空腹日二服訖候半時得吃乳食量兒大
小加減

遠志煎治小兒身體壯熱驚悸心神不寧

遠志

去土草水煑焙

茯神去木

羚羊角屑

甘草

炙

蕪荑各三錢

蝎梢十枚去毒

右爲末醋糊元黍米大一周兒每服一百元乳汁或
米飲下服訖候一時久得喫乳食量兒大小及病輕
重加減元數

疎隔元治諸驚亦治疳出聖惠方急驚最効

乾薑

五枚以酒醋炙酥

青黛

木香

檳榔

麝香

續隨子

去殼紙裹
油各一錢

右爲末煉蜜元如菽豆大一周兒每服十五元二三歲加至三十元空心清米飲送下服訖一時久得喫乳食

牛黃元治小兒心經積熱兩腮紅如臙脂手足常熱唇口乾燥亦治急驚

牛黃一錢

天竺黃二錢

鬱金三錢真如
蟬肚者

梔子仁四錢

爲末和均煉蜜元黍米大一周兒每服三十元薄荷湯下量兒加減

醉紅散治小兒急慢驚風潮搐涎盛口眼偏斜精神昏悶

天南星

一枚大者酒浸濕
焙熟焙乾

蜈蚣

一條酒炙

白僵蚕

炒去絲

全蝎

去毒各七枚

天仙子一字

朱砂別研

紫苑

杏仁

龍骨

防風

龍膽草

蟬退

百合

牛黃

別研

白芷

麝香各一錢

升麻

三錢

大黃煨四錢

酥一兩

蜜三兩

右件藥先以牛黃麝香朱砂各研為末除酥蜜外十五味搗為麤末用水一升入銀鍋內煎至三合以新

綿瀝去滓却入鍋內入牛黃麝香朱砂末及酥蜜等以柳篋不住手攪慢火熬如稠餚方止入瓷合內盛密蓋收之

周歲兒每服一雞頭實大沸湯化下日二三服量兒大小加減

不驚元治小兒因驚氣而吐逆作搐痰涎壅塞手足掣瘈眼睛斜視

枳殼去穢炒淡豆豉

右為末每服一字病甚者服半錢不拘時候服日三服急驚者薄荷自然汁調下慢驚者荊芥湯入酒三五點調下

凡小兒急慢驚風若睛珠上視或上氣喘急足脛
若冷者難愈腹中急脹眼睛上視不回者必難治
也

陳氏小兒病源方論卷三

[illegible]

陳氏小兒病源方論卷四

驚風引證

○論寒痰作搐

太師賈平章

寶祐戊午兩淮間

子宣機三歲頭熱目赤痰藪不

已一鑿言風熱盛痰涎作文中

曰因脾肺虛而風冷

寒痰所作又一鑿言熱即生風冷即生氣文中曰不

然三冬盛寒冷則生風九夏炎炎熱則生氣蓋風者

百病之長也若寒得風而謂之風寒若熱得風而謂

之風熱若燥得風而謂之風燥若濕得之而謂之風

濕此非獨熱而生風也如暗風破傷風臍風慢驚風
急驚風及風癇驚癇食癇等證而皆作搐非但熱而
生風也

宣機病始因頭熱目赤便以涼藥餌之致令寒氣客
於喉嚨之間與津液相搏又生痰勦證其喉嚨中寒
痰冷氣壅塞不通故頭熱目赤無由得愈治法當斡
去喉嚨中寒痰令氣得通其病可得而愈遂投芎蝎
散一服用手法斡去寒痰冷涎四五口次以油珠膏
一服而愈

論風痰搐搦

尚書洪端明

寶祐戊午
淮東運使

子始生未及三箇月腹脹滿足

肚冷顙門高急上氣涎潮四肢搐搦同坐衆官皆言
死證洪公曰我在前死了七八箇兒子皆是這般證
候此兒足見難鑿枉廢生受亦不召鑿視之或者言
告文中因徃視而謂之曰小官人此證候死不得尚
可救治運使曰此兒必死毋勞用計衆官皆喜陳君
高明既有救療之心運使從說乃用油珠膏一服次
用長生元一服便下黃稠粘涎約半盞內有白妳塊
如小豆大十餘塊是風痰結聚乳妳一併便下後用
前胡厚朴散加附子兩片二服而愈

淮西戴運使小娘子始生周歲腹中氣響痰涎壅閉手
足抽掣欲與芎蠟散斡取痰涎運使曰兒子小難以

依此施治文中曰前制叅劉菊坡小兒始生五箇月因作搐乃服芎蝎散幹去痰涎次服油珠膏即愈菊坡贈一跋於卷末今運使小娘子因驚嚇蓄冷氣於喉齧間傳入肝膽其氣上不能升下不能降使血氣不能流轉故痰涎壅閉而作搐也若不依此施治必不起遂以芎蝎散一服用手法幹去喉齧中寒痰約半盞次用油珠膏二服後補脾益真湯三服再前胡厚朴散長生元各二服而愈

安撫葉大監

寶祐戊午淮東制叅

子始生八箇月搐不休乃驚食

二痢證也因驚怖未定心氣不足便餌乳妳使冷氣與乳妳併搐於腹內故腹中氣響上下衮衮其氣上

則吐下則瀉今搏於脾胃則脾土虛弱肝木盛冷故
筋掣而作搐用油珠膏一服次芎蝎散送下二聖元
一服其搐止又瀉如泔水用補脾益真湯二服次日
又搐腹中氣響上膝芎蝎散一服用手法將匙於喉
中探幹出痰涎數口即止只腹中氣響攻上不納乳
妳肚中急脹用塌氣元一服後服長生元愈安撫贈
一跋於卷

○慢驚風證

楊州安通判子始生未滿月頭溫足冷腹中氣響涎潮
搐搦名曰胎風因乳母飲冷過度冷氣搏於胎胞之
中兒生之後又因帛蘸冷水繳展唇口致令冷氣入

兜腹中故頭足冷腹中響涎潮搐俗謂慢驚風欲與
油珠膏府判曰小兒純陽熱即生風何敢服附子硫
黃文中曰若與朱砂腦麝等涼劑斷然不救况兒未
經寒暑臟腑嬌嫩骨脉軟弱當溫養正氣氣盛則寒
痰消腹中不響其搐自止用油珠膏八服後補脾益
真湯而愈

○急驚風證

兩淮咨議蕭宣使生子一年三箇月忽然發熱兩腮紅
如臙脂足脛熱大便堅秘小便赤少忽然而搐名曰
急驚風諸醫治之未効召文中以遠志煎連進三服
而愈

痘瘡引證

夫小兒患痘瘡文中所用之藥無不應手取効今略舉數家以爲引證

○泄瀉用藥

漣水知軍蕭宣使孫女三歲痘瘡始出泄瀉

予用木香散送下豈蔻元一服瀉止

至九日其瘡不肥滿根窠不紅咬牙喘渴宣使謂熱毒在裏痘瘡不靨欲與清涼飲

予曰若與清涼飲則耗真氣必致喘渴而死宜木香散

如丁香四枚官桂一錢

二服又異攻散一

服至十日其瘡蒼蠟色咬牙喘渴皆止

至十三日瘡痂不落痒難忍足指冷咬牙喘渴不已

予用異攻散加丁香半錢官桂一錢連二服至十

七日愈

○咬牙寒戰

漣水軍都總轄李路分孫七歲痘瘡七日痒塌寒戰咬
牙飲水始召予視之

予欲進異攻散次用木香散

路分畏藥熱不肯服

予曰其瘡痒塌寒戰咬牙飲水是脾胃肌肉虛也
如與水飲則轉渴不已而死矣當用木香散異攻

散急救表裏三日各三服至十五日愈

○瘡痘痒塌

連水機密官周統制孫三歲痘瘡八日發熱腹脹足指冷咬牙飲水其瘡痒塌搔之血出成凹坑

予曰發熱腹脹足指冷者脾胃虛也痒塌者肌肉虛咬牙飲水者津液衰也若熱去即死矣經云陰虛則發熱宜木香散加丁香三十枚官桂一錢服之可也

統制曰如何更加丁香官桂

予曰丁香攻裏官桂發表其表裏俱實則不致痒塌喘渴而死木香散連二服又異攻散三服至十

七日愈

○表虛不長

前淮東運使洪中書子三歲痘瘡七日如穀粟中書曰如何細碎不長

予曰爲表虛不壯熱也可服異攻散

中書曰莫不太熱

予曰熱則氣血和暢自然出快以異攻散加附子三片官桂半錢親煎與服至九日根窠紅滿光澤

至十三日愈

○裏虛不長

又一直閣七歲痘瘡四日身熱渴瀉不止

予曰身熱瀉渴者表實裏虛也木香散連三服瀉渴皆止其瘡光澤肥紅而愈

○瘡不成痂

楊州王咨議女九歲痘瘡十四日不成痂膿水出不乾咬牙飲水

予曰氣血衰則咬牙內虛則煩渴宜木香散加丁香二十枚官桂半錢日夜三服至十七日瘡痂落而愈

○悞食生冷

淮東制參喬宗承子十三歲痘瘡十一日悞食柑子因發熱痒渴

予曰柑子味酸收斂津液故發熱痒渴用人參麥
門冬散三服愈

○身溫頻渴

淮東制參毛監丞五子皆出痘瘡三子不服而愈一登
仕十三歲身溫頻頻要水喫其瘡細碎

予曰是肌肉虛津液少也木香散加丁香二十枚
官桂半錢日夜三服瘡出根紅快透至十一日痂
不落又木香散加木香半錢官桂一錢連二服至
十七日愈

又一直閣十歲痘瘡出口乾渴不止

木香散每服三錢重水二盞淡煎時時服首尾四

服而愈

○瘡不起發

楊州通判王宣機二子皆出痘瘡大者七歲始出自利
兩次其瘡細碎不光澤不起發

予用木香散加丁香三十枚官桂半錢連二服瀉
止瘡出快透

至十三日其瘡不結靨不成痂批塌膿水粘衣身痒
不得眠

予曰痘始出時瀉今乃痒塌不靨是內虛也木香
散加木香官桂各半錢連二服仍以敗草散摻其
瘡爛至十八日愈

○痘證驚搐

王宣機小直閣二歲發熱驚搐足冷痘瘡欲出不用
異攻散三服共加丁香四十五枚附子一錢第二日
木香散加丁香附子木香桂各半錢連二服其搐止
足暖瘡出而愈

○宣解之過

淮東趙制幹子十五歲身壯熱哽氣醫謂傷食感應元
一服瀉二行仍壯熱哽氣又一醫言傷寒（小柴胡湯）
加枳殼其身不壯熱口乾足冷

予曰始初身壯熱哽氣便是痘瘡之證口乾足冷
者感應元瀉得裏虛也身不熱者柴胡解得表虛

也若加喘渴則脾肺虛而不救矣以木香散加丁香官桂各半錢二日進五服第三日瘡出第七日成膿泡子微渴人參白朮散一服又木香散一服十三日痂落而愈

○瘡爛膿淫

淮東帥機趙通判女七歲痘瘡十三日衄塌破爛膿水出粘衣坐卧不得

予用木香散三服又用敗草散摻攤席上及乾貼即乾愈

陳氏小兒病源方論卷四

